

11-pela manmeri dai long AirLink balus

VERONICA HATUTASI i raitim

ILEVENPELA pipel, tupela em ol pikinini krismas bilong ol tu na tri i bin dai aste moning taim wanpela AirLink balus i bungim birua long Kimbe insait long Wes Nu Briten provins.

AirLink em wanpela long ol tet level balus kampani we i save ron insait long Niugini Ailans rijon.

Ripot we Wantok i kisim long Kimbe plis stesen i tok balus i wok long ron long Hoskins i go long Kandrien long samting olsem hap pas 10 moning, taim em i bungim birua na pundaun klostu long Togulo Divisen 2, wanpela welpam blok long Kimbe.

Ol dai bodi i stap nau long Kimbe haus sik. Ol no autim yet nem bilong ol inap long ol i toksave long ol famili na hauslain bilong ol pastaim.

Ripot i tok ples i bin wok long ren taim balus i tekov na bungim birua.

Olgeta 10-pela pasindia na pailot bilong Simbu i dai long birua ya. Faivpela em ol man, tripela meri na tupela liklik pikinini. Ripot i tok balus i bin bungim birua i no longpela taim bihain tasol long em i tekov. Sampela

withes bilong Togulo welpam husat i bin lukim birua i tok ol bin harim wanpela bikpela pairap antap long klaut na ol i lukim tel bilong balus i kam daun. Bihain long en, ol kago i pun-

daun na bihain bodi bilong balus i pundaun namel long ol welpam diwai.

Ripot i tok olgeta bodi i bin pas long bodi bilong balus na dai na nogat wanpela i bin flai i kamaut long

graun. Wantok i no bin inap long kisim moa toktok long dispela samting long Kimbe haus sik o long AirLink opis long Kimbe, Kandrien na Madang het opis.



Susa i lusim ol famili nau...

• Wanpela susa bilong Bundi insait long Mosbi siti i lusim famili na i go marit long las mun. Ol famili bilong em i kisim em i go long givim lain bilong man.

Angau haus sik kisim bikpela komplek

...Wenge laikim Ombudsmen i sekim

FRANCO NEBAS na YAKAM KELO i raitim

ANGAU haus sik long Lae i kam aninit long bikpela toktok bihain long sampela wokmanmeri i laikim olgeta bod memba na bosmeri bilong Angau Margret Samei long ol i mas pinis long wok. Bikos ol i tok planti samting long sait bilong mani, menesmen bilong haus sik, ol paul pasin, marasin i sot na ol arapela sevis i no kamap gut.

Ol dispela lain nes, dokta, ol arapela wokman bilong haus sik na sampela komyuniti lida tu i sapot wantaim na givim petisen ya i go long Morobe Gavana Luther Wenge na Morobe Edministreta Aine Sengero long glasim na mekim sampela samting long dispela.

Gavana bilong Morobe provins Luther Wenge i bin kisim dispela komplek bilong ol woka bilong Angau haus sik na i askim bod long stapim posisen bilong sief eksekutiv opisa Margret Samei inap wok painimaut i go insait long dispela hevi na komplek bilong ol wokmanmeri bilong Angau haus sik.

Mista Wenge i tok long kamapim wok painimaut insait long ol dispela

komplek, bai ol i askim Ombudsmen Komisn long sekim ol dispela painimaut. Na tu bai ripot i go long Minista bilong Helt Ludger Mond na Provinsel Eksekutiv Kaunsel.

Tasol siaman bilong Angau haus sik bod Ross Humphries i tok dispela komplek i kamap long sampela lain husat i no raitim nem ples klia, pes bilong ol i no klia, nogat edres long dispela komplek pepa (petisen) we i mekim dispela petisen ino wanpela tru komplek.

Mista Humphries i tok dispela em wanpela o tupela man tasol i laik autim bel hevi bilong ol bikos ol i traim long kisim bek wok bilong ol wantaim Angua haus sik tasol bod i no kisim ol long wok (em ino kolim nem).

Mista Humphries i tok bod i bin makim gen Margret Samei olsem sief eksekutiv opisa bilong Angau haus sik bihainim lo bilong publik sevis jenerel oda we Dipatmen bilong Pesenel Menesmen i go pas long en. Ol i no kalapim wanpela rot long laik bilong ol, em i tok.

Siaman i tok baset bilong Angau haus sik long dispela yia em K3 milien tasol. Ol i bin askim long K8 milien tasol gavman i katim baset bilong ol wankain olsem olgeta haus sik insait long kantri. Long dispela as, planti samting i sot olsem marasin, ol nupela betisit na arapela moa bilong haus sik i yusim. Tupela krismas i go pinis, haus sik i save kisim olsem

K6.1 milien, tasol dispela taim nau, ol samting i go hat olgeta bikos long liklik baset ol i gat long yusim.

Insait long petisen i gat planti bikpela toktok we ol wokmanmeri bilong Angau i autim we i tok planti samting i bagarap bikos long menesmen bilong Margret Samei na ol bod bilong haus sik long las yia i kam.

Wantok i askim Margret Samei long Trinde aste olsem sapos i tru wanpela mama bilong ples Yalu i bin dai bikos ol nes na sista long Angau haus sik ino bin sevim em long Mei, 1998. Tasol Misis Samei i tok em i no laik bekim dispela askim bikos em i nogat wanpela pepa o rekot bilong dispela hevi. Na em i no klia sapos mama ya i bin dai. Dispela mama i bin gat bikpela sik tru we sampela nes i ting em i gat bagarap long lewa o kidni bilong em bikos bros bilong em i solap. Em i kam long haus sik long Mei 29, 1998 tasol ol sista i no sevim em bikos ol i tok em i nogat sik pepa bilong klinik we i salim em i kam long Angau.

Wantok i askim tu sapos i tru wanpela meri hap Kabwum na Boana i bin dai long ples bihain long em i bin go long karim pikinini long las yia mun Mas 1998. Dispela meri i bin gat bel long karim tupela pikinini (twins) na i go long haus sik long Mas 6, 1998. Ripot i tok bihain long em i karim pikinini, bodi bilong em i dai, tasol em i no stap longtaim gut long haus sik na ol i rausim em i go aut. Papa bilong meri ya i karim em i go

kamap long Mobil Sevis Stesin long wetim PMV long go long ples. I nogat wil sia bilong em i ken sindaun long em. Ripot i tok meri ya i dai long Mei 30, 1998. Ol lain i komplek olsem haus sik i gat sosel sevis bilong helpim ol manmeri olsem tasol bilong wanem na ol i no laik i givim meri ya wanpela wil sia bilong em i ken yusim na go long ples.

Sief Eksekutiv Opis Margret Samei i tok ol i no bin kisim ol pepa na rekot bilong dispela meri inap Tunde dispela wik. Dispela em bihain long komplek i bin kamap.

Wantok i askim tu long ripot bilong sampela mani i bin lus o wokman i stilim klostu olsem K15,000. Misis Samei i tok dispela hevi i go pinis long han bilong lo na ol lain i gat nem long dispela sas i save go kam long kot.

Margret Samei i tok em i no inap toktok moa o bekim planti askim long dispela hevi o komplek bilong ol wokmanmeri egensim em na ol bod memba bilong Angau haus sik bikos bod siaman Ross Humphries bai mekim ol toktok bilong ol.

Misis Samei i tok long Fraide tumoro, bai i gat miting wantaim Morobe Gavana Luther Wenge we siaman Ross Humphries bai go bungim em na ol i toktok long dispela hevi. Olsem na Mista Humphries bai mekim moa toktok long bekim ol komplek insait long dispela petisen pepa, Misis Samei i tok.

INSAIT

• Raskol stilim mani bilong Gumine memba. - pes 2

• Ol papa-mama bungim hevi long Skul fi pes 3



• Tokpilai wantaim Kanage

- pes 25 na 26

• Sik AIDS bikpela long Westen Hailans. - pes 7

• Lukim ron bilong sip LUSHIP

- pes 13

PLIS RIPO

Hagen:

Wanpela plisman long Mendi i kisim sas long gat wanpela sab masin gan wantaim long en.

Plis ripot i tok dispela man i bilong Wes Nu Briten na em i wok long karim hai pawa gan insait long kol snot poket bilong em taim ol plis long Mendi i bin holim pasim em las wik taim ol i kari-maut wok patrol.

Provinsal Plis Komanda Simon Kauba i tok dispela plisman i bin wok long go long Mendi taun wantaim narapela tupela poroman long wanpela Toyota lenkrusa taim ol plis patrol yunit i stapim na kwestenim ol.

Plis i bin askim draiva long laisens na taim ol i wokim sekap long ol pasindia long dispela ka, ol i painim gan long plisman ya. Plis i bin painim tu ol katres long poket bilong tupela poroman bilong dispela plisman. Plis i bin kisim tripela man i go long stesen, kwestenim na sasim ol. Tupela poroman bilong plisman i bilong Mendi yet.

Isten Hailans:

Wanpela kalabusman husat i bin aut long daireksen bilong praim ministra long Krismas na Nu yia bilong larim go fri 186 kalabus lain insait long ol haus kalabus long PNG, em ol plis long Isten Hailans i holim pasim em gen long wokim ol kriminel pasin gen.

Dispela em long bagarapim meri, laik kilim narapela man na ol arapela moa birua olsem.

Provinsal Plis Komanda bilong Isten Hailans Edward Kinamun i tok plis i bin holim pasim dispela fri kalabusman husat em no autim nem bilong en tasol em gat 28 krismas.

Mista Kinamon i tok man ya em i wanpela long ol faipela kalabusman husat ol bin larim i go fri long Bihute haus kalabus long Goroka bihainim daireksen bilong Praim Minista Bill Skate.

Em i tok dispela man em wantaim narapela tupela poroman bilong em i bin brukim banis long haus bilong wanpela misinari bilong narapela kantri i wok long Goroka na bagarapim pikinini meri bilong em long las wik Trinde.

Mista Kinamon i tok tu olsem plis i bilip olsem dispela man tasol i bin laik kilim tupela voluntia woklain bilong Swiselan long Goroka na tu ol arapela bikhet pasin moa long taun.

Plis i sasim em long stilim wanpela gavman ka tu we em i wok long yusim na plis i holim pasim em bihain long sampela lain i toksave long plis.

Mista Kinamon i tok em i wari long ol i larim fri ol kain man olsem long kalabus.

Nu Ailan:

Tupela meri i bin dai long Kavieng las wik bihain long kros-pait insait long famili.

Ol ripot i tokaut long nem bilong wanpela olsem Aprie Leo Mataring husat i gat 22 krismas na em i bilong Mussau Ailan long Nu Ailan provins yet. Em gat tupela pikinini.

Ripot i tok meri ya i bin dai long Kavieng haus sik bihain long wanpela pait i kamap long famili.

Narapela meri we Rimis Opnai Taipei husat i gat 27 krismas. Em i bilong Nu Hanova insait long Nu Ailan provins yet. Em bin dai bihain long ol i paitim em long nek.

WANTOK

All departments. Phone: 325 2500 - Fax: 325 2579 P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon. Advertising Manager: Mike Kanin. Acting Editor of Wantok: Yakam Kelo. Lae Office: Franco Nebas Ph/Fax: 472 0164. Papers distributed by air throughout PNG. Available by air mail subscription within Papua New Guinea and overseas. Email address: word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Kaiabe i no amamas long salim ges bisnis

YAKAM KELO i raitim

OL Gavana bilong wanwan provins i no bin hariap long kamapim Nesanel Ges Kopresen kampani we ol i bin pasim tok pinis insait long palamen las yia long kamapim. Dispela Nesanel Ges Kopresen kampani bai wok aninit long nupela lo bilong Oil na Ges lejislesen we palamen i bin pasim long Oktoba las yia.

Memba bilong Komo Magarima Alfred Kaiabe i tok kros long dispela wik olsem ol Gavana i no mekim wok bilong ol hariap na nau bikpela ges kampani, Oil

Search we i go pas long Hides Gas projek long Moran na Kutubu long Sauten hailans provins i laik salim wok bisnis bilong em i go long wanpela Australia ges kampani ol i kolim Santos Limited.

Oil Search i laik salim ges projek bilong em long K191 milien i go long Santos ges kampani bilong Australia.

Mista Kaiabe i tok kros tu long lejisletiv kaunsel bilong palamen long wanem as na ol tu i no bin stretim hariap lo bilong oil na ges hariap na nau dispela ges kampani laik salim bisnis bilong em long ausait kampani.

Mista Kaiabe i tromoi tok olsem em i ting sampela kain

hait pasin i stap insait long dispela pasin bilong westim taim bilong putim lo bilong oil na ges long pepa. Na nau Oil Search i laik salim bisnis bilong Hides Gas taim dispela lo i no redi yet.

Mista Kaiabe husat tu em siaman bilong Sauten Hailans Oil na Ges Tas Fos komiti long lukluk insait long dispela kain hevi.

Memba bilong Komo Magarima i tok em i no amamas tru bikos Papua Niugini bai lusim bikpela mani tru we dispela mani inap stap long kamapim ol gutpela wok na sevis insait long kantri.

Mista Kaiabe i askim nesanel gavman long noken transferim dispela bisnis i go

yet long Santos Limited kampani bilong Australia yet inap ol lida bilong PNG sindaun na hariap skelim ol wok bilong ol pastaim.

Em i askim Minista bilong Petroleum na Ges Sir Rabbie Namaliu long holim bek dispela trensefa pastaim na ol gavman memba i stretim dispela samting pastaim.

Long palamen bung long Oktoba las yia, olgeta Gavana bilong wanwan provins i bin wanbel long pasim lo bilong oil na ges insait long kantri. Bikos insait long dispela lo, i gat hap we i tok olgeta provinsi gavman insait long kantri bai i gat sea long dispela bisnis bilong ges insait long kantri.

Raskol stilim K55,400 bilong MP Wamil


BEN TAUMAI i raitim

OL raskol i stilim K55,400 sek mani bilong memba bilong Gumine, Joe Wamil Aul Kupa long Sirinam wara klostu long Ramu Suga long Fonde las wik.

Samting olsem 8-pela raskol i holim pas Mista Kupa wantaim meri bilong em na 8-pela wantok bilong ol. Ol raskol i tokim Mista Kupa na ol lain bilong em long slip het i do daun long Lendkrusa ka bilong em na ol i draivim dispela ka i go daun long Sirinam wara olsem 5 kilomita i go daun.

Long hap, ol i sekim Mista Kupa na ol lain bilong em na stilim K55,400 sek mani bilong memba. Mista Kupa i tingting long yusim dispela mani long baim wanpela Toyota Lendkrusa ka bilong distrik edministreta bilong ilektret bilong em. Ol i stilim tu K3,550 kes mani bilong tambu brata bilong Mista Kupa na K100 kes mani bilong meri bilong Mista Kupa.

Ol i stilim tu .99 milimita laisens gan



• Joe Wamil Aul Kupa.

(pistol), palimen ID kat, Save kat trenseksen akaun, Insurens kat, Medikel Insurens kat, laisens bilong draiv na Lendkrusa bilong Mista Kupa.

Mista Kupa i tok bihain long ol i sekim

ol, ol raskal i lusim ol na i ranawe i go wantaim Lendkrusa. Long dispela taim, ples i go tudak, na Mista Kupa wantaim ol lain bilong em i wokabout i go bek long haiwe na painim helpim. Wanpela ka i kam na i kisim ol i go long Walium we ol i toksave long plis long hevi bilong ol. Ol plisman long Walium i kisim ol i go long Madang na ol i givim wankain ripot long Madang plis stesin.

Mista Kupa i tok ol raskol i bin holim pas ol wantaim ol faktori gan (2x SLR, 2xM16, 2x303 na 2 pam eksen gan). Olgeta raskol i putim ami yunifom na i bin bihainim ol long Wara Rais yet i go olgeta long Ramu Suga na long Ramu Suga ol i abrusim ol na i go pas. Ol i go long maus rot bilong Ranara na Tauta na putim rot blok wantaim dyna bilong ol.

Taim memba wantaim ol lain bilong em i kamap, ol i blokim rot na holim pas MP na wanpela raskol i go insait long ka bilong MP na ol i draiv i go long Surinam wara.

Wes Nu Briten lusim gutpela wokman

PETER MAIME i raitim

DIPATMEN bilong Wes Nu Briten i stap wantaim bikpela wari bihain long wanpela sinia pablik sevan bilong em i dai long Sarere las wik.

Nem bilong dispela man em Alois Cantomu. Em i bin sik sampela taim bipo em i bungim indai bilong em. Em i lusim 4-pela pikinini husat bai stap wantaim mama bilong ol.

Asde ol wok manmeri bilong Wes Nu Briten Dipatmen i bin pasim wok long tingim indai bilong Mista Cantomu na tu long stap long las gut bai lotu bilong em long Kimbe Katolik Sios.

Tude bai Gavana Bernard Vogae na Provinsal Edministreta John Maela bai kisim bodi bilong Mista Cantomu wantaim famili bilong em long helikopta i go long ailan Balivitu insait long Bialla Distrik. Long hap Mista Vogae

wantaim Mista Maela bai givim bodi bilong Mista Cantomu i go long han bilong ol lain bilong em. Ol haus lain bilong em bai planim bodi bilong em long Balagore viles, em ples stret bilong Mista Cantomu.

Mista Maela i tok olsem Mista Cantomu em wanpela man husat i save givim moa taim long wok bilong em. Em i tok, em i bin gat bikpela tingting long sevim ol narapela manmeri na i no save bisi tumas long wok bilong em yet o gat taim long ol famili bilong em.

Em i tok, ol planti wok manmeri husat i save wok wantaim em i nau pilim olsem ol i lusim wanpela gutpela poroman bilong ol. Tude sampela bilong ol dispela pablik sevan bai kisim moto bot na kirap long bik moning i go long Balivitu ailan bipo bodi i go long hap long helikopta.

Laip bilong Mista Cantomu i go olsem: Long 1967 em i bin pinisim gret 12 long Ulapia

Kolis long Is Nu Briten. Long 1968 em i bin wokim riliis trening long Unapau, em tu i stap long Is Nu Briten. Long 1969 i go 1971 em i bin skul long Bomana Katolik Seminari long Mosbi long kamap wanpela pater. Long 1972, em i bin mekim pastoral wok long Rabaul.

Bihain em i lusim na go joinim PNG Difens Fos long 1973. Em i bin kamap olsem Seketeri bilong Fainens na Plening wantaim Difens Fos long 1980. Long 1981, ol i bin makim em olsem namba tu Seketeri bilong Difens Fos.

Long 1982, em i bin lusim Difens Fos na kamap olsem Provinsal Seketeri bilong Dipatmen ov Wes Nu Briten. Long 1983, ol i bin makim Mista Cantomu olsem Asisten Seketeri bilong Bialla Distrik.

Long mun Septemba 1986, em i bin risain long pablik sevis na sanap long Wes Nu Briten rijional sia long 1987. Em i lus na Lucas Waka i bin winim dis-

pela ileksen. Em i bin stap long ples long 1990.

Long 1991, em i go wok gen long Provinsal Palamentri Sevis long Wes Nu Briten Provinsal Gavman. Long 1992 na 1993 em i bin Ekting Provinsal Seketeri bilong Wes Nu Briten. Taim Provinsal Gavman i panim pinis wanpela Provinsal Seketeri, em i go wok olsem Pes Seketeri bilong Fainens na Plening.

Long 1996 na 1997, em i wok olsem Distrik Menesa long Bialla. Las yia em lusim Bialla na wet long kisim nupela wok bilong em olsem Distrik Menesa long Balivitu na em i bungim indai bilong em.

Provinsal Edministreta, Mista Maela i singaut i go long ol yangpela manmeri bilong Wes Nu Briten long bihain pasin na wok bilong Mista Cantomu. Em i tok pasin bilong givim taim na sevis i go long ol pipel i bikpela samting tru.

Jas Ikuram laik pinisim kot bilong plis

YAKAM KELO i raitim

NESENEL Kot i surukim kot bilong PNG Plis Asosiesen egensim Plis Komisina Peter Aigilo i go moa long neks wik Mande Februari 8, 1999. Dispela em bihain long Jas Kubulan Los i no bin laik harim kot bilong ol long las mun.

Insait long dispela kot we i Plis Asosiesen i sanap long en i askim long putim bek olupela NCD Plis Komanda John Wakon na Plis Task Fos long wok bilong ol bikos

Jas Los i bin mekim oda long Plis Komisina Peter Aigilo long i no ken mekim senis long Sief Supritenden John Wakon na ol plis task fos memba. Tasol Komisina Aigilo i no bin bihainim dispela oda na em i go het na saspenim arapela sinia plis opisa olsem Joe Gawi komanda bilong Plis Task Fos, Thomas Eluh Plis Prosekyuta na Joan sinia CID plis-meri.

Nesanel Kot jas husat bai harim dispela kot em Paul Ikuram. Na em i askim Plis Asosiesen na loya bilong Plis Komisina long stretim olgeta wok bilong ol redi bikos long neks wik, em i no inap westim taim. Bai em i harim dispela kot na pasim disisen hariap tasol.

Long las mun, Jas Los i tok em i no inap harim dispela kot, i no bikos em i bin harim pinis dispela kot. Em i laik bai arapela jas husat i save go pas na harim ol sivel kot i ken harim dispela kot. Jas Los em jas husat i save go pas long harim ol kriminel kot.

Plis Asosiesen i kisim kot egensim Plis Komisina Peter Aigilo long sas bilong sakim kot oda (oda we Jas Los i bin mekim long las wik). Na tu ol i laik kotim Mista Aigilo long pepa ol i bin mekim long kot long las wik long stapim Plis Komisina long noken mekim senis long Mista Wakon na ol plisman bilong em.

Dispela em tupela kot we i sut long wanpela bikpela hevi tasol. Na Jas Kubulan Los i tok em i ken harim dispela tupela kot tasol em i laik larim long ol jas husat i save holim o sivel kot long harim dispela.

Loya bilong Plis Asosiesen Michael Wilson long Warner Shan loya i askim long dispela kot long Mista Aigilo i sakim oda bilong kot i mas kamap. Tasol loya bilong Plis Komisina Sirigoi Thirwall na Aisi Koiri loya i tok dispela kot pepa o injansen i no bin go long Mista Aigilo hariap pastaim long kot oda i bin kamap. Olsem na em i no bin redim gut ol bekim bilong dispela. Olsem na em i askim kot long surukim dispela kot i go moa inap Misat Aigilo i ken stretim gut ol ripot na toktok bilong em long dispela sas.

Loya bilong Plis Asosiesen i sanap long poin bilong Plis Komisina i mas kisim bek John Wakon, Joe Gawi, Thomas Eluh na Joan bikos i no gat gutpela as bilong saspensim ol long wok.

Sas bilong Mista Wakon em long mekim ol toktok long nius, sas bilong Joe Gawi em long i no harim tok long go lukim Plis Komisina na sas bilong Eluh na Joan em long i no bihainim oda. Tasol loya bilong ol i tok, dispela i nogat strongpela as bilong saspenim ol 21 de na lusim wok bilong ol.

Nu Ailan Gavman holim miting long Lihir

PETER MAIME i raitim

PROVINSAL Eksekutiv Kaunsel bilong Nu Ailan Provinsal Gavman i bung tude long Lihir Ailan long toktok long sampela ol bikpela samting long provins.

Miting ya inap long kamap long Kavieng tasol ol i kisim i go long Lihir bikos Provinsal Gavman i laik sindaun na toktok wantaim ol papa graun bilong Lihir Gol Main, Lihir Gol Maining Kampani na Nimarmar Developmen Atoriti o lokol gavman

long kamapim sampela ol gutpela tingting long wok bung wantaim. Dairekta bilong Provinsal Palamentri Sapot Sevis, Ben Ramesen i tok, em i no inap toktok long wanem samting bai kamap long Provinsal Eksekutiv Kaunsel miting. Em i tok

em bai autim ol-disisen na toktok bihain long PEK i tok orait na pasim. Gavana Paul Tohian na Deputi Gavana Sailas Sabagas aste i go pinis long Lihir wantaim ol narapela memba bilong PEK. Presiden bilong Nimamar

Developmen Atoriti, Clement Gargar wantaim ol memba bilong ol i bin givim bikpela welkam long Mista Tohian na ol lain bilong em long Lihir ples balus. Miting bilong PEK bai ol i holim long konfrens rum bilong Lihir Papindo Hotel.

Planti papamama paul long baim skul fi

VERONICA HATUTASI i raitim

PLANTI papamama na ol skul pikinini long ol skul insait long kantri i no klia tumas long wanem mak bilong ol skul fi ol bai peim taim 1999 skul yia i bin stat long Mande dispela wik.

Insait long sampela krismas nau, ol skul insait long kantri i save sasim tupela fi. Em long skul fi na projek fi. Projek fi em ol Skul Menesmen Bod insait long wan wan skul yet i save sasim long karamapim ol projek we skul i save kamapim insait long wanpela yia, wantaim tu ol arapela samting olsem peim ol ensileri o woklain husat i no stap long peiril sistem bilong skul. Dispela em ol lain olsem ol sekyuriti gad, taipis na laibrierien.

Paul o ino klia i kamap moa yet insait long planti ol skul long NCD we long tupela wik i go pinis, NCDC Edukesen Bod i givim daireksen long olgeta skul long sivi long noken sasim ol projek fi na tu peim liklik hap mani olsem skul fi. Long NCDC dairektiv, ol elementer pikinini bai i skul fi. Ol gred 3 i go long 6 i peim K4 na gred 7 na 8 i peim K81.

Dispela em bikos NCDC bai givim mani i go long ol wan wan skul bilong ol projek na ol arapela samting we skul i laikim, sapos ol (skul) i raitim sabmisen na salim aplikesen i go long ol NCDC Edukesen Bod.

Sampela skul i bihainim daireksen bilong NCDC Edukesen Bod tasol sampela skul, moa yet ol sios ejensi, i sasim ol skul fi yet. Ol i tok ol bai givim bek mani i go long ol papamama taim ol i kisim skul subsidi peimen long NCDC. Sampela i tok ol bin stretim ol samting we i sut long ol skul na subsidi fi long las yia yet. Ol bin givim ol skul fi deposit fom long ol

papamama long las yia yet taim skul yia i pas na planti papamama i wokim pinis ol peimen long beng. Na dispela toksave bilong NCDC long noken peim ol subsidi fi na ol arapela samting we i sut long skul fi i kam leit.

Sampela hetmasta i autim wari we ol bai kisim mani long karimaut ol arapela wok olsem peim olsapot woka bilong skul.

Sampela i tok tru, dispela tingting we NCDC i wokim long rausim projek fi na daunim skul fi i daunim hevi long planti papamama we long olgeta yia taim skul i stat, ol i save kisim hatpela taim long painim mani. Tasol long wankain taim tu, dispela pasin i mekim ol papamama i no givim bikpela tingting long ol duti bilong ol olsem ol i gat bikpela wok long helpim long edukesen bilong ol pikinini. Olsem na sampela i tok ol bai lukluk na hop rot we NCDC i kirapim bai i go het na wok gut.

Long ol Niugini Ailans skul, ol papamama na ol sumatin i klia na ol i no bin gat komplek taim skul i stat long dispela wik Mande na ol i peim wanem fi wan wan skul bilong ol i sasim. Dispela i kamap bikos i bin gat gutpela toksave long disepela samting we ol Provinsal Edukesen Bod i putim kamap long redio na pablik i harim na klia long en.

Wantok i bin kisim toktok long ol hetmasta bilong sampela skul insait long NCD na Niugini Ailans long dispela samting.

Sen Peter Chanel Praimeri skul long Erima insait long NCD em i wanpela Katolik Sios ejensi skul. Long Mande taim ol papamama i go lusim ol pikinini long skul, ol bin kisim toktok olsem ol baim yet ol fi we skul i bin makim long las yia. Tasol taim ol i kisim skul subsidi mani long Nesanel Gavman, ol bai peim bek ol mani bilong ol papamama. Wanpela bod memba husat i no laikim nem bilong em i kamap long niuspepa i tokim

Wantok olsem planti skul insait long NCD i bin bihainim sekula 219 we Provinsal Edukesen Bod i bin givim aut long Oktoba 13, 1998. Long dispela taim, bod i bin makim ol skul fi we ol elemeteri skul i peim K50 long wan wan pikinini, greds 3 inap long 6 i peim K60 na greds 7 inap long 8 i peim K200. Bihainim dispela, planti skul bod ov menesmen i bin putim mak long ol skul fi.

Long ol sios ejensi skul, Katolik Sios Edukesen Bod i bin makim K70 projek fi. Tasol Sen Peters Erima i bin daunim mak i go long K55 bikos insait long tupela yia, ol bin sasim moa projek fi taim skul i sanapim tupela nupela dabel klasrum bilong ol greds 7 na 8 top ap klas bilong em.

Bod memba ya i tok long mun Novemba skul i bin givim ol beng deposit pepa long ol papamama long putim ol skul fi mani i go long beng. Planti skul i no moa kisim kesmani skul fi long skul bikos long pret bilong raskol pasin we i wokim ol holap. Orait, planti papamama i painim skul fi mani na putim pinis long beng. Na em i hat long wokim senis taim samting i go pinis long beng. Antap long dispela, sampela papamama i no peim yet ol skul na projek fi bilong las yia. Tu, planti ol skul i luksave long hevi bilong mani we gavman i gat, bod memba i tok. Olsem na ol i tokim ol papamama long baim yet ol fi tasol taim ol i kisim ol subsidi mani long Gavman, ol bai givim bek mani bilong ol.

Bod memba i tok skul i wokim ol top ap klasrum wantaim projek fi mani ol papamama i peim na tu ol arapela fan resing skul i wokim. Em no bin kisim wanpela ausait helpim. Long dispela yia, skul i gat tripela projek long plen bilong em na ol bai kos bikpela mani long ol.

Sacred Heart Praimeri skul long NCD em i narapela Katolik Sios ejensi skul. Prinsipal Kesia Tagamasau i tok skul i bihainim ol

toktok bilong NCDC Edukesen Bod na em i no sasim skul na projek fi bikos NCDC yet i lukautim dispela.

"Ol papamama i peim K4 na K81 tasol na NCDC bai peim olgeta arapela samting olsem pawa na telipon bil, wara, mentenens, ol nupela bilding na oksileri woklain. Dispela em taim skul i putim sabmisen pepa i go long bod," Misis Tagamasau i tok. Em i tok planti papamama i bin peim ol fi we skul i makim long las yia tasol ol bai givim bek mani taim ol (skul) i kisim gavman subsidi long neks wik.

Ted Diro Praimeri skul insait long NCD em i wanpela gavman skul. Prinsipal Misis Joan Kalama i tok skul i bihainim toktok bilong NCDC Edukesen Bod husat i wokim dispela samting long helpim ol papamama na rausim hevi long ol. Tasol em i tok ol papamama i kisim fri tiket na ol bai ino nap gvim bikpela tingting long wok bilong ol olsem pilaim bikpela rol long skul bilong ol pikinini.

Prinsipal bilong Boreboa Praimeri skul long NCD Tua Haro i tok skul i bihainim dairektiv bilong NCDC Edukesen Bod tasol em i autim wari long rot bilong painim mani long peim ol sapot woklain.

Em i tok bipo long ol skul i kisim subsidi mani, ol i mas givim fainensel ripot bilong ol.

Asisten Edukesen Seketeri bilong Wes Nu Briten Joseph Malagisa i tok ol papamama i no komplek tasol ol i amamas long peim ol fi we Provinsal Edukesen Bod bilong ol i makim. Ol sumatin long provins i peim projek fi we i gat mak yet long ol wan wan level na yu ken ritim long Wantok stori long Pes 4.

Long Not Solomons, ol sumatin i peim skul fi na mak bilong ol fi i stap insait long stori long dispela pepa. Ol papamama na sumatin i no paul o komplek long ol fi, Provinsal Edukesen Seketeri Tony Tsora i tok.



NIUGINI AILANS NIUS

WANTOK

NIUSPEPA BILONG OL PAPUA NIUGINI

Politiks bilasim skul subsidi

OL SKUL long olgeta hap long kantri i bin stat pinis long dispela wik. Planti ol papamama i bin ron i go i kam long putim ol pikinini bilong ol long skul. Ol papamama i save wari long ol pikinini bilong ol na mekim bikipela wok tru long helpim ol liklik bilong ol.

Gavman i bin tok long givim skul subsidi long sapotim ol wan wan skul long provins. Dispela skul subsidi i no klia long tingting bilong planti ol papamama. Planti i ting, gavman bai baim olgeta skul fi. Long tingting bilong ol, dispela i min fri edukesen.

Ol papa mama nau i kirap nogut olsem mari gavman i givim i liklik tru na ol yet mas peim bikipela hap. Planti papamama i kisim sok long dispela samting bikos sampela hai skul i sasim ol long peim K500 o K600.

Ol bos bilong edukesen i asua long dispela samting. Ol i no laik tokim ol papamama long dispela samting bipo yet. Ol i mas pret long opim maus bilong ol.

Minista bilong Edukesen, Muki Taranupi tu i no laik mekim kilia long dispela samting bilong skul subsidi. Em tu mas pret long Praim Minista, Bill Skate long opim maus bilong em.

Ol papa mama nau i kisim hat taim. Sampela sumatin bai lusim skul bikos ol i no inap long baim skul fi.

Strong bilong Kina i daun, planti lain i pilim pen long dispela taim. No ken givim moa pen long ol papamama.

Nau em taim bilong tok tru na noken bilasim politik long skul subsidi.

Buka papamama wari long salim ol pikinini long ol skul long bikailan

VERONICA HATUTASI i raitim

TAIM 1999 skul yia i stat long dispela wik, ol skul atoriti na ol papamama i gat wari long spes bilong putim ol skul pikinini. Dispela i kamap bikos long hevi long sait bilong politik we ol Bogenvil lida i gat long nesanel na provinsal level long dispela taim.

Bikos long lidasip pait long kirapim Bogenvil Rikonsiliesen gavman, Buka distrik i les na laik kam aninit long nupela rifom.

Na sapos nogat ol bai bruk lus long bikailan Bogenvil na kamap namba 20 provins bilong PNG.

Long dispela samting na ol papamama long Buka i wari long sefti na sekyuriti long ol pikinini bilong ol na ol i no laik salim ol i go long ol Hai Skul long bikailan Bogenvil.

Asisten Edukesen Seketeri long Bogenvil, Tony Tsora i tok opis bilong em i toktok long ol papamama long noken wari bikos planti pikinini bilong bikailan Bogenvil i stap long ol Hai skul long Buka bikos sindaun long distrik i kamap orait pinis.

Na ol (edukesen opis) i bilip olsem ol pipel long bikailan bai no inap long bagarapim ol sumatin maski hevi long politikel level i stap, tasol ol papamama i no pilim olsem em i seif long larim ol pikinini i bilong ol i go long ol hai skul long bikailan.

Mista Tsora i tok em i laikim ol lida i mas stretim dispela hevi kwiktair na ol pikinini i ken skul gut wantaim nogat pretpasin.

Em i tok bikos Buka distrik i kamap gut, ol hai skul i wok long kisim ol pikinini long

olgeta hap bilong provins na ol i pulap.

Ol Hai skul we i op long provins nau em Hutjena na Tartena insait long Buka distrik, Nissan Hai skul long Atols, Arawa long Sentrel na Tonu Hia skul long Saut wes Bogenvil.

Mist Tsora i tok Asitavi Hi skul long Wakunai eria i op bek gen long dispela yia, bihain long ol bin pasim long mun Jur las yia. Ol bin pasim skul bikos sampela hevi i kamap we ol papagraun i laikim moa kompens-

esen long graun skul i stap long en.

Na tu ol raskol i go insait long skul na mekim nabaut long ol tisa na sumatin.

Nupela Hai skul long Bana eria insait long saut wes Bogenvil na ol i kolim long Bana Hai skul i op tu long dispela skul yia. Mista Tsora i tok nupela skul ya i kirapim tupela Gret 7 klas na em i kisim ol sumatin bilong Bana eria.


Hutjena Hai skul long Buka i go insait long nupela edukesen rifom na long dispela yia,

em i kisim tupela Gret 11 klas.

Mista Tsora i tok Hutjena i kamap olsem wanpela Sekonderi Skul na bai i no inap kisim ol Grets 7 na 8 sumatin.

Em i tok long dispela yia, Gret 7 i aut na long neks yia, Gret 8 bai i aut tu.

Bihainim dispela, ol papamama long ol Buka skul i wari bikos ol i pret long salim ol pikinini bilong ol i go long ol hai skul long bikailan Bogenvil.



WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

ANTAP • Ol liklik sumatin bilong Monoitu praimer skul long Siwai Sautwes Bougenvil wantaim peris pris, Pater Dario.

Ol Wes Nu Briten skul kisim namba wan hap long skul subsidi

OL SKUL insait long Wes Nu Briten i kisim pinis Nesanel Gavman skul subsidi fi bilong namba wan kwata long dispela yia. Dispela mani mak inap long K695,838.

Asisten Edukesen Seketeri John Malagisa i tok em bin kisim dispela mani long las wik insait long sinia nesanel edukesen opisas komprens we ol bin holim long Rabaul, Is Nu Briten provins. Mista Malagisa i tok ol opisa bilong em i wok long redim dispela mani long katim i go long ol skul na tilim i go long ol long neks wik.

Em i tok ol i skelim mani ya i go long ol foapela skul level insait long provins na mak i go olsem:

- Ol Elemeteri skul em ol i katim K60,932 long ol;
- Ol Praimeri skul i kisim K383, 43;
- Ol Hai skul i kisim K162,000; na
- Ol Teknikol skul i kisim K89,475.

Wan wan sumatin long Elementeri 1 inap long 2 em Gavman skul subsidi bai peim K20 long ol, long Gret 2 inap long 5 em K30 long wan wan pikinini na Grets 6-8 em K40. Long ol Hai skul na Vokesenel sumatin, subsidi helpim em K1.50 long wan wan sumatin taim mak bilong ol CODE sumatin em K40 long wanpela sabsek.

Mista Malagisa i tok hamas mani Nesanel Gavman i givim olsem skul subsidi helpim em inap long kandim bilong ol skul pikinini long olgeta level insait long provins.

Em i tok divisen bilong em i amamas olsem ol papamama i peim ol projek fi na olgeta samting i go gut taim 1999 skul yia i bin stat long dispela wik Mande.

Em i tok bikos long ol toksave we divisen bilong em i bin putim kamap long Redio Wes Nu Briten, ol papamama i kisim ol kliapela toktok long ol skul na projek fi na ol bin peim ol dispela yet wantaim nogat komplem.

Mak bilong ol projek we Provinsal Edukesen Bod i bin makim na ol papamama i peim long ol pikinini i go olsem, K30 long ol Elementeri, K40 long ol Komyuniti skul.

Ol de sumatin long Grets 7-8 i peim K100 taim ol boda long sem gret i peim K250. Ol de sumatin long Grets 9 na 10 i peim K300 taim ol boda long wankain gret i epim K600.

Ol de sumatin long Grets 11 na 12 i peim K300 taim ol boda long wankain gret i peim K650.

Ol de sumatin long Vokesenel, Seketeriel na Kapentri skul i peim K300 taim ol boda i epim K550.

Mista Malagisa i tok long dispela yia, wankain plen bai i stap olsem las yia na dispela em long Nesanel na Provinsal Gavman i serim wok long baim ol skul subsidi.

Nesanel Gavman bai i epim namba wan na tri kwata taim Provinsal gavman i peim namba tu na foa kwata.



AITAPE NIUS

Wok i stat bilong wokim ol skul na haus sik

WOK bilong mekim ol skul na haus sik em wanpela bikpela program. Aitape Daiosis bai wokim 65 haus tisa, na haus bilong ol nes, 37 dabol klasrum, 5-pela laibreri, 5-pela edministretiv blok, elementeri skul, tupela vokesenel skul, tupela aidpos, tupela sab-helt senta, ol toilet na wara saplai.

Ripot i kam long Aitape i tok dispela bai kisim samting olsem 18 mun long wokim ol haus bilong ol tisa na nes. Tasol sapos ol inap mekim foapela haus long wanpela mun, i luk olsem ol bai pinisim wok long 10 mun taim.

Nawae konstraksen kampani i winim kontrak bilong putim simen long ol klasrum na mekim ol haus kuk na ples bilong was was wantaim ol haus tisa na nes haus. Ripot i tok olgeta kapa na v-krimp bilong wol i kamap pinis long Aitape bilong wokim ol skul, wantaim ol gata na plang. I gat foapela tim bilong wokim dispela ol wok. Wan wan tim i gat 5-pela wokman na ol go insait long ol nupela ples wantaim rotari tim bilong mekim wok.

Noken kaikai ol pis long lagun

Ripot i tokaut tu olsem insait long wanpela wok painim we ol saveman bilong Nesenel Helt Dipatmen laborator long Mosbi i tesim foapela pis na tupela kuka na ol i painim olsem ol dispela pis na kuka i gat bikpela namba tru bilong binatang nogut we inap kamapim bikpela sik sapos ol man i kaikaim ol. Long dispela as, helt dipatmen i mekim strongpela tok lukaut i go long ol pipel long Aitape long noken kaikai ol pis, kuka na ol samting bilong solwara long ples we tsunami i bagarapim inap ol i mekim moa wok painim na painim sapos ol pis na ol kuka na ol samting bilong solwara i nogat moa ol binatang nogut bilong kamapim bikpela sik.

Bruda Philip lusim Aitape

"Sic transit gloria mundi," em wanpela hap tok Latin na i min olsem, "olgeta gutpela samting i mas pinis". Wankain tasol ol pipel bilong Aitape na Aitape Daiosis wantaim Aitape Daiosis Rihabilitesen Komiti i lusim wanpela gutpela wokman tru. Bruda Philip husat i bin lusim Sidni long Austrelia tripela wik bihain long tsunami i bagarapim ol ples bilong Sissano, Warupu, Arop, na Malol long Julai 17, bihainim askim bilong Edministreta bilong Aitape Daiosis, Pater Austen bilong go wok long Aitape, bai go bek long Sidni bihain long 6-pela mun wok long Aitape.

Ripot i kam long Aitape i tok olsem Bruda Philip i gat bikpela save tru bilong wok bilong mekim ol rot, haus sik, skul na ol arapela samting long daiosis, insait long taim hevi bilong tsunami i bin kamap. Em i mekim planti gutpela na bikpela wok tru na nau em i mas go bek long kantri bilong em.

Long dispela as, ol pipel bilong Aitape i salim bikpela tok sori i go long Bruda Philip na tenkim em tu long gutpela wok em i bin mekim.

Koronai nau siaman bilong Aitape Distrik Disasta Komiti

NESENEL Disasta komiti i makim sinia lokol kot mejistret long Aitape, Richard Koronai olsem nupela siaman bilong Aitape Distrik Disasta Komiti (ADDC). Mista Koronai i wok longpela taim wantaim gavman. Long wanpela taim em i bin wok olsem provinsel edministreta na i wok longpela taim olsem wanpela sinia mejistret.

Insait long namba faiv miting bilong ADDC long Januari 5, ADDC i pasim tok long makim wanpela sab-komiti bilong mekim wanpela wok painim long glasim hevi bilong kaikai insait long olgeta kea senta na ol ples.

Dispela wok painim bai tokaut kila wanem taim ol i mas stapim sevis bilong givim kaikai long ol ol pipel long ol kea senta na ol ples i kisim bagarap long tsunami. Dispela komiti i go pinis long ol kea senta na ol ples bilong mekim dispela wok painim.

ADDC nau i gat wanpela seketeri. Ol i wet yet long kisim wanpela Eksen Plen Monita na wanpela Eksekutiv Opisa husat i mas makim tu Nesenel Disasta na Imejensi Sevis. Olgeta i mas wok bung wantaim siaman long mekim gutpela wok na bringim sevis i go long ol pipel.

AusAID na NDES i tok ol bai givim ol masin olsem kompyuta na printa wantaim ol arapela samting bilong wok long opis i go long ADDC bilong mekim ol dispela wok. Long wankain taim nupela edministreta bilong Vanimo, Maran Nataleo i bin go long dispela namba wan miting bilong ADDC.

Dairekta Jenerel bilong Nesenel Disasta na Imejensi Sevis, Ludwig Kembu na Siaman bilong Praim Minista Fan bilong Aitape, Bernard Bhoulai i go lukluk raun tu long Aitape long Januari 4.

Ol i go wantaim Gabriel Tuan bilong AusAID na ol wokman bilong Nesenel Dipatmen bilong Helt na Edukesen. Astingting bilong dispela wokabaut bilong ol em bilong paitim toktok wantaim ADDC ol plen bilong karim aut Rikaveri Eksen Plen na tu helpim long kamapim ADDC Sekretariat.

105,600 pipel bilong Sandaun i no kisim gutpela helt sevis

WENCESLAUS MAGUN i raitim

105,600 PIPEL bilong Sandaun Provins i no kisim gutpela helt sevis bihain long 25 haus sik bilong ol Sios long Aitape, Vanimo, Telefomin na Anguganak eria i no kisim mani Nesenel Gavman i promis long givim ol na i no givim ol olgeta mani bilong 1998. Ol i bungim wankain hevi long dispela yia.

Tupela Katolik Daiosis (Aitape na Vanimo) Baptist Sios long Telefomin na Kristen Breden Sios long Angugank i no karim aut gut helt sevis bikos ol i bin sot long mani. Aitape Daiosis i gat wanpela Rurel Haus Sik, 10-pela Sab-Helt Senta, na i lukautim 60,247 pipel. Vanimo Daiosis i gat faipela Sab-Helt Senta, tripela Aidpos na i lukautim 12,000 pipel. Baptist Sios long Telefomin i gat wanpela Rurel Haus Sik, tupela Sab-Helt Senta na i lukautim 19,500 pipel. Kristen Breden Sios long Anguganak i gat wanpela Helt Senta, tupela Sab-Helt Senta na i lukautim 13,851 pipel.

Wanpela ripot i kam long Medikel Kaunsel bilong ol Sios long Sandaun i tokaut olsem, long 1998 ol dispela Sios Helt Sevises i bin askim Nesenel Gavman long givim ol K1,073,600 bilong givim helt sevis. Tasol gavman i givim ol Sios K272,000 na i no bin givim K801,600.

Bikos long dispela as, planti ol helt sevis long Sandaun long 1998 i bin pas inap long 6-pela wik long Jun. 15-pela man i dai bikos long dispela as na ol Sios i sori tru long laip bilong ol pipel na i opim gen ol sios helt sevis tasol MCH program i pas yet i kam inap nau.

Ripot i tok tu olsem maski i gat bikpela toksave i tokaut olsem Helt Dipatmen Baset i go antap long K62.6 milion long dispela yia, long lukluk bilong ol Sios helt sevis long Sandaun, dispela tok em i no tru. Bikos ol i bin aplai long K1,073,600. Tasol Provinsel Edministresen i katim i go daun long K600,000. Dispela bai mekim ol Sios Helt Sevis long katim daun wok man meri bilong ol long 169 i go daun long 149 long dispela yia. Bai i nogat posisen bilong 16 nes opisa na dispela inap kamapim bikpela hevi (moa bikpela long hevi bilong 1998).

Ripot i tok wantaim disisen bilong Provinsel Edministresen long daunim baset bilong ol Sios helt sevis long dispela yia, i luk olsem bai i gat bikpela hevi tru long dispela yia.

Ripot i autim bel hevi bilong ol tu olsem ol i no amamas long Sandaun Provinsel Edministresen long holim pas mani AusAID i bin salim i go long baim ol Sios helt woka long April 1998. Provinsel Edministresen i givim ol Sios Helt Sevis dispela mani long Desemba 31, 1998 taim olgeta wok bilong yia i pinis.



• Ol bikman bilong ples, viles kot mejistret, wod memba, na ol yut na meri lida husat i kisim kos bilong lukautim bus, abus bilong bus, graun ol samting bilong graun, wara, solwara na ol samting bilong ol i kisim skul long Samap ples.

Skul bilong lukautim envaironmen long Samap ples

SKUL bilong lukautim bus, graun, ol binatang, pisin, abus, solwara, wara, na ol samting bilong ol (envaironmen) stat long Januari 11 i go pinis long Januari 16 long Samap ples long Is Kos bilong Turubu insait long Wewak distrik i bin kamap gut tru.

Is Sepik Lokol Envaironmen Faundesen (ESLEF) i go pas long ronim dispela kos wantaim helpim bilong Yunaited Nesens Developmen Program anit long Global Envaironmen Fasiliti, non-gavman ogenaisesen liklik grant projek.

Astingting bilong dispela wok-sap em bilong skulim ol pipel

bilong ples long pasin bilong lukautim ol nambis ples bilong ol. Ol i gat tingting long kamapim wanpela han buk bilong ol lokol wail laip wokman na kamapim wanpela komyuniti konsevesen bai-lo bilong ol ples i stap long nambis insait long ol eria husat i stap insait long dispela program.

Sapos i gat mani ol bai pinisim olgeta wok bilong raitim dispela buk na kamapim long namel bilong dispela yia.

Samting olsem 50 bikman bilong ples, ol mejistret bilong ples, wod memba, yut na meri lida bilong ol ples long ailan bilong Wewak na ol Schouter

Ailan insait long Wewak Distrik i bin kamap long dispela miting.

Dispela ol lain i salim bikpela tok tenkyu i go long ESLEF na Yunaited Nesens Developmen Fan bilong putim mani i go insait long long ESLEF long ronim dispela skul. Ol i tenkim tu seketeri bilong Dipatmen bilong Konsevesen bilong salim wanpela saveman long dipatmen i go skulim ol.

ESLEF i tenkim tu presiden bilong Wewak Ailan Lokol Level Gavman long sapatim ol wantaim sampela mani long ronim dispela skul.

Katolik Sios i sot long pater bilong wanem?

I GAT planti man i soim interes long kamap pater insait long Katolik Sios bilong Papua Niugini na Solomon Ailan. Tasol i gat planti hevi long wanem i nogat inap skul na ol samting bilong glasim sapos ol dispela man i ken go skul pater o bilong skulim ol gutpela pater bai ol i ken go helpim ol pipel. Bisop bilong Kundiawa, Reveren William J. Kurtz i tok.


I gat tupela bikpela hevi i mekim dispela samting i kamap. Wapela em hevi bilong autim Gut Nius na narapela em hevi bilong kism Gut Nius long pasin Melanesia.

Bisop Kurtz i tok Katolik Sios i gat bikpela wok bilong autim Gut Nius na mekim Kristen bilip i kamap Kristen bilip bihainim kalsa bilong Melanesia.

Em i tok bikos i no gat inap skul na ol samting bilong glasim ol man husat i gat laik long kamap pater em i hat long testim na painim aut sapos ol dispela man i gat laik tru bilong kamap pater o nogat.

Bisop Kurtz i tok, PNG nau tasol i wok long develop na i gat kankain samting i wok long kamap long sait bilong politik. Long wankain taim, Gut Nius i no planim i go insait long kalsa bilong ol pipel bilong PNG. Olsem na ol kendidet i ken gat kankain tingting, taim ol i tok ol i gat laik long kamap pater. Sampela taim ol i lukim skul pater olsem wanpela rot bilong go kism gutpela skul, na painim gutpela wok na gat pawa. Em i tok i gat moa hevi i stap pinis, kain olsem i nogat planti lokol pater i kism skul bilong kamap tisa na skulim ol seminarian.

"Bikpela salens em bilong ol seminarian long stap olsem man Melanesia na long wankain taim



• Bisop William Kurtz i odenim Pater Peter Kaman long Ogus 15, 1995.

bilip long Jisas Kraus, kism em i go insait long laik bilong ol na autim Gut Nius," Bisop Kurtz i tok.

Em i tok Sios i laikim ol pater husat i bungim Jisas sampela taim long laik bilong ol insait long kalsa bilong ol yet. Kain ol man

olsem inap autim Gut Nius long ol pipel bilong ol yet. Dispela em ol kain pater Sios i laikim long bihain taim husat inap karim Katolik Sios i go het yet long PNG na mekim ol Melanesia pipel i laikim bilip na kalsa wantaim.

Ol meri ELCPNG Hagen distrik i gat haus malolo

WENCESLAUS MAGUN i raitim

OL meri bilong Evanjelikal Luteran Sios bilong Hagen Distrik, i go het pinis long kirapim wapela haus bilong slip na malolo bilong ol kam man meri na ol wok man meri bilong Sios husat i go long Hagen na painim ples bilong slip. Yu inap painim dispela ples baksait long het opis bilong ELCPNG Hagen Distrik insait long Hagen siti.

Presiden bilong ELCPNG Hagen Distrik, Reveren Zau Rapa i tok, as tingting bilong kirapim dispela haus malolo em bikos sios i painim olsem planti taim, ol wokmanmeri bilong sios i go long Hagen i save painim ples bilong slip. Olsem na long helpim na givim dispela sevis, sios ol mama bilong ELCPNG Hagen Distrik i askim Luteran Sios long helpim ol na kirapim dispela sevis.

Luteran Sios i amamas long tingting bilong ol mama na i askim Luteran Developmen Sevis (LDS) wapela han insait long sios long painim mani bilong kirapim dispela projek. Kos bilong dispela projek i sanap olsem moa long K210,000. Taim LDS i painim sampela mani, em i toksave long ol meri bilong Hagen Distrik na ol i go het long kirapim dispela haus malolo long 1996.

Reveren Rapa i tok olgeta wok i pinis nau na ol i askim ol yut long

wokim blain bilong banisim dispela haus. Long wankain taim ol i wet tu long kism ol bet, sia, tebol na ol kain samting bilong putim insait long dispela haus.

Reveren Rapa i bilip olsem olgeta wok bilong dispela haus malolo bai pinis long mun Mas o April long dispela yia.

Dispela haus i gat tu stori. I gat 10-pela bed ru we inap kism tupela man o tupela meri long wanpela rum. I gat toilet na ples bilong was was long wan wan rum. Ples bilong slip i stap antap na long aninit em ples bilong kuk kaikai, miting, na i gat opis, na bak stoa.

Reveren Rapa i tok nau yet ol mama i no makim kos bilong kism malolo long dispela haus tasol em i bilip long neks wik samting ol bai save long kos bilong slip long dispela haus malolo.

"Mi lukim olsem Hagen siti i go bikpela. Ol wokman bilong sios na arapela lain i kam long Hagen i painim ples bilong slip. Mi laikim Westen Hailens Provinsel Gavman i mas luksave long wok bilong Sios insait long provins na sapotim sios long wanem sios i mekim planti wok insait long provins," Reveren Rapa i tok.

Ol mama bilong 13-pela seket insait long Hagen Distrik i memba bilong dispela projek.

TU MINIT TINGTING

Man i semim tru narapela man

LONG wanpela ples, wanpela man i semim tru narapela man long ai bilong ol pipel. Man ya i kros na i ran i go long pasto na i autim wari bilong em. Long belhat bilong em, em i laik go bek nau tasol na bekim nogut long narapela man.

Pasto i tokim em olsem, "Maski Yu go bek long haus pastaim, yangpela.

Yu wet liklik."


"Tasol em i semim mi nogut tru," man ya i tok.

"Mi save pinis," pasto i tok. "Na bilong dispela tasol na yu mas go bek long haus pastaim. Man i semim yu i olsem man i bin tromoim graun i gat wara long pes bilong yu."

"Tru tumas!" yangpela man i tok. "Na nau mi laik go rausim dispela graun long pes bilong mi, long bekim nogut bilong mi."

"Yangpela, yu harim! Nau em i gutpela taim long lainim wanpela samting: em i moa isi long rausim graun i gat wara long taim em i drai pinis. Olsem, moabeta yu go long haus na givim taim bai graun i drai pastaim."

Em i pasin bilong yumi, long taim wanpela man o meri i bin nogutim yumi, nau tasol yumi laik bekim na singaut long bikpela kompensesen. Tasol long taim ai bilong yumi i ret, na bel i paia, na yumi kros - long dispela kain taim yumi save aipas, na



FR MIHALIK i raitim

tingting bilong yumi i save paul. Yumi no inap lukim gut wanpela samting na skelim gut.

Watpo yumi no laik go long kot long taim yumi kros long kompensesen? Yes, long Olpela Testamen yet i gat tok long "bekim ai long ai, na tit long tit, na han long han..." Lukim tasol: Kism Bek 21: 23-25 na Wok Pris 24:19-20. Tasol lukim tu dispela poin bilong Baibel: wan wan man nating i no inap bosim dispela lo bilong bekim. Nogat. Em i tok: Wanpela kot tasol inap bekim rong na skelim kompensesen. Tasol watpo yumi no laik go long kot? Nogat, yumi laik stretim rong nau tasol.....Em i no Kristen pasin. Em i no stretpela pasin.

Long Rom 12:19 Sen Pol i rait: "God i gat tok olsem: 'Bekim rong, em i wok bilong mi. Mi yet bai bekim rong bilong yu, na yu sanap long sait bilong God long taim bilong bekim na kompensesen, kas bilong yu. Bai yu win tru na pinisim kros.

Moa long 300 pipel kism baptismo

MOA long 300 pipel i kism baptismo na ol kristen bilip bilong ol i no strong tumas tu i strongim bilip bilong ol long niu yia long wanpela lotu kem long Aroma nambis, long Sentrel Provins.

Dispela Waro-Iruonei kem i kamap long de foa i go pinis long Januari 10, na i pulim planti kristen husat i holim strong bilip bilong ol yet na ol lain bilip bilong ol i pundaun.

Wanpela man i go pas long dispela bung, Kini Gabi i tok astingting bilong dispela kem em bilong strongim bilip bilong ol kristen long hap. Em i bilip dispela kem i karim kaikai long wanem planti lain i pilim God long laik bilong ol.

Mista Gabi i tok dispela em i namba wan taim ol i mekim kain bikpela bung we ol pipel bilong Waro

na Iruonei ples i kam inap long Mosbi i bung.

Em i tok narapela bikpela samting i kamap long dispela kem em, wanpela ai pas man i autim Gut Nius. Nem bilong dispela ai pas man em, Wagi John husat i go pas long toktok.

Evenjelis John i toktok long "Spirit Rivaivel insait long Misin", na i tok strong olsem olgeta manmeri na pikinini i mas tanim bel.

Mista Gabi i tok bikos dispela kem i kamap gut ol lain i go pas, i tingting long holim wankain kem long Jun long Gavuone seket, em tu long Aroma nambis.

Long dispela kem ol i gat tingting long kism moa yut i go insait long senisim laik bilong ol bai ol i ken kamap gutpela kristen.

Sios i mas painim rot bilong sanap strong

KATOLIK Sios i mas painim rot bilong sanap strong na lukautim em yet na long wankain taim autim Gut Nius long PNG taim kantri i wok long bungim ol kain kain sosel na politikel hevi, Bisop bilong Wabag, Reveren Herman Raich i tok.

Em i tok tu olsem long Sios i gat wok bilong helpim ol pipel bai ol i gat strongpela bilip na dispela i ken senisim laik bilong ol. Ol misinari i kam na mekim hat wok long autim Gut Nius na bringim sampela sevis i kam bilong helpim ol pipel. Tasol i gat bikpela hol i stap namel long

tingting bilong Sios long kamap gutpela Kristen na tu long pasin manmeri na pikinini i save mekim olgeta de.


Em i tok Sios i mas givim moa taim long autim Gut Nius yusim kalsa na laikstail bilong ol pipel Sios i wok wantaim ol. Nau yet sampela ol seminarian i kamap pater pinis i go long skul we i senisim planti tingting na pasin bilong ol na ol i no pas tru wantaim kalsa bilong ol na Kristen komyuniti.

Narapela bikpela wok bilong Sios em i olsem olgeta bruda, sista, pater na le man o meri i

mas gat wok long mekim insait long Sios.

Wanpela gutpela piksa long PNG em Blesed Peter Torot., wanpela katekis husat i dai long han bilong ol Japan long taim bilong wol woa tu. Taim ol misinari i stap long haus kalabus, Peter Torot i karim Sios i go yet.

Bisop Raich i askim Pop John Paul II long luksave long Melanesia kalsa na long larim Sios i autim Gut Nius long stail na pasin bilong Melanesia. Em i bilip sapos Rome i mekim olsem bai Sios long Melanesia i kamap trupela Katolik Sios.



Hailans Nius

Plis stapim masin gan i go long Simbu

PLIS long Sauten Hailans i bin holim pasim tripela man husat i laik traim long kisim wanpela masin gan i go long Simbu.

Wanpela bilong ol dispela man em wanpela plisman. Plis i bin mekim rot blok long moning 3.30, taim ples i tudak yet long hailans haiwe na bin holim ol dispela lain long wanpela haia ka ol i bin kisim long Hagen na yusim.

Sauten Hailans Provinsal Plis Komanda, Suprintenden Simon Kauba i bilip ol i bin kisim dispela masin gan long yusim long bai-ileksen long Simbu.

Taim plis i putim rot blok, ol i bin lukim wanpela nupela retpela Toyota Len Kruser ka i ron long rot i go long Mendi taun. Ol patrol plis i bin stapim dispela ka na askim dravia long laisens. Taim draiva i givim laisens, plis i luksave olsem em dispela man long Simbu plis i bin laikim.

Bihain plis i sekim narapela tupela pasinda, wanpela pasindia em wanpela plisman bilong Wes Nu Briten husat i save wok long Simbu. Plis i bin sekim gut long ka na ol dispela tripela man na panim wanpela 71. sabmasin gan i hait aninit long koat o kol set bilong dispela plisman. Draiva na narapela pasindia i bin gat sampela ol bulet na megesin bilong gan ya.

Plis i bin kisim ol tripela man ya i go long Mendi Plis Stesin na sasim ol long ol i nogat laisens long holim dispela gan, ol bulet na megesin na putim ol long sel.

Ol lain plis i sasim ol em Draiva, Sedy Wena bilong Marane viles, Gembogl distrik long Simbu, plisman Roderick Kiala bilong Talesea Distrik long Wes Nu Briten na Dick Tulum bilong Bela viles, Mendi long Sauten Hailans Provins.

Dispela tripela man i nau stap aut long beil na bai kamap long Mendi Distrik Kot. Dispela haia ka i stap yet long plis sel long Mendi.

Enga plis bai kisim gen 6-pela ka

PLIS long Enga bai kisim gen 6-pela nupela ka long Provinsal Gavman long mekim wok bilong ol.

Sapos ol i kisim ol dispela ka, em bai mekim 10, ol namba bilong ka Provinsal Gavman i givim long plis long provins. Enga plis i bin kisim 4-pela ka pinis long mun Oktoba las yia.

Ol dispela ka bai bes long ol plis stesin long Wabag, Porgera, Laigam na Wapenamanda.

Provinsal Plis Komanda, Suprintenden Allan Kundi i tok, plis i gat progrem bilong kisim ol resev plis long helpim ol plis long ol distrik. Ol dispela risev plis bai wok klostu wantaim ol lain long viles kot na ol dispela ka bai sapotim ol long wok bilong ol.

Sapos sampela ol bikpela trabel i kamap long provins, ol ka ya bai sam-bai long givim han.

Gavana Peter Ipatas long las wik i tok, olgeta kampani husat i wok long Enga mas peim gut takis long Provinsal Gavman bikos gavman bilong em i putim bikpela mani long daunim hevi bilong lo na oda long provins. Em i tok, wok bisinis bai i no inap kamap gut sapos ol raskol pasin na kainkain trabel i bikpela long provins.

Bikos Enga Gavman i putim mani long kamapim gutpela sindaun long provins, em i bin singaut i go long ol bisnis haus long mekim gut long Provinsal Gavman.

Suprintenden Kundi i tok, Enga nau i stap isi na plis i amamas long wok bilong gavman bilong Ipatas.

Sik AIDS bikpela long Westen Hailans

PIUS MON i raitim

STAT long 1987 na i kam long Septemba 1998, wanpela ripot long Helt Dipatmen i tok, Westen Hailans i gat 92 man na meri i gat sik AIDS.

Dispela namba bilong ol man-neri em ol lain husat i bin go long haus sik na sekim blut.

Westen Hailans Disis Kontrol Opisa, Taelabu Siba i tok long dispela 92, 47 em ol meri na 40 em ol man. Ol narapela 5-pela em ripot i no tok klia.

Mista Siba i tok bikpela hevi nau em, ol lain krismas bilong ol i 15 na 45 i gat sik AIDS. Dispela kain grup bilong ol pipel, pasin bilong prenim na slip wantaim ol man o meri i stap strong tru. Long dispela rot, sik i ken surik i go long kainkain man na meri.

Dispela wok panimaut long ol lain i gat sik AIDS i bin kam aut long Tinsely, Kudjip na Hagen haus sik. Taim ol nes na dokta long hap i panim aut olsem ol manmeri husat i gat sik taipoid na malaria i no orait hariap, ol i sekim blut bilong ol long ol narapela sik, na ol i panim aut sik AIDS.

Ol haus sik ya i bin salim blut i salim i kam long Mosbi long sekim sik AIDS. Taim nambawan tes i tok olsem wanpela sik man o meri i gat AIDS, ol lain wok long haus sik i save testim namba tu na namba tri taim gen long save gut olsem dispela man o meri i gat AIDS o nogat.

Taim ol wok lain long haus sik i panim aut long namba tri tes olsem dispela man o meri i gat sik AIDS, het opis long Mosbi i save salim ol risals bilong ol tes i

go bek long ol provins we ol blut i kam long en.

Bikpela wari long provins na kantri tu em olsem planti yangpela man na meri i wok long kisim dispela sik na dispela bai sotim tru populesen bilong kantri. Planti pikinini bai nogat ol papa mama na ol lapun tasol bai i stap.

Long dispela ripot tu, bungim olgeta namba husat i gat sik AIDS long PNG namel long 1987 na Septemba 1988, em 1340. Long dispela namba, Pot Mosbi i bin gat 963, Isten Hailans 57, Morobe 41, Enga 29, Simbu 25 na Madang 21.

Ol provins i nogat nem, em ol provins i gat sik AIDS i aninit long 20.

Nesenel Kapitel Distrik i go pas long ol lain i gat sik AIDS, tasol dispela i no min olsem ol

lain Papua tasol i gat dispela sik. Mosbi em namel ples na planti lain long PNG i save go na kam olsem na dispela ripot i soim piksa bilong kantri na i no wanpela grup tasol.

Inap nau, namba tru Helt Dipatmen i bin panim husat i gat sik AIDS long kantri em 10,000 na dispela namba inap long surik i go long 15,000 sapos ol manmeri i mekim nambaut. Planti manmeri na pikinini husat i gat dispela AIDS i bin dai pinis. I nogat wanpela marasin long wol long pinisim dispela sik.

Mista Siba i tok, wanpela rot bilong stapim sik AIDS em long mekim gutpela wok awenes bai planti i ken save long dispela sik nogat. Narapela we ol pipel i ken lukautim ol yet em long stap isi na no ken paul wantaim planti man o meri.



• Wanpela lotu grup long Goroka i mas na liptimapim Bikpela long Goroka taun.

Maramuni ples balus long Enga i pas yet

MARAMUNI ples balus long Enga Provins i pas pinis na ol pipel long hap i kisim hat taim.

Sivil Aviesen Atoriti i pasim ples balus bikos Maramuni Lokol Gavman Kaunsel i no lukautim gut. Kaunsel i papa bilong ples balus. Ples balus i pas long mun Oktoba, 1998.

Maramuni em wanpela sab-distrik bilong Wabag. I gat klostu 7000 pipel i stap long dispela distrik. I gat 4-pela komyuniti skul, 5-pela ed pos na wanpela helt senta.

Ol pipel i save kisim ol sevis long ron bilong balus tasol. I nogat rot bilong ka i go long Maramuni. Ples ya i stap namel long Wabag na boda bilong Is Sepik. Em bai kisim klostu tripela de long wokabaut long lek i kam long Wabag taun.

Gavana Peter Ipatas i wari long dispela samting na i bin raitim pinis wanpela pas i go long bos bilong Sivil Aviesen Atoriti long opim gen ples

balus. Mista Ipatas i tok, em i no kisim wanpela bekim long dispela pas.

Em i tok, em i no save wanem samting i rong long ples balus bikos ples balus i wankain olsem bipo yet.

Gavana Ipatas i tok pinis olsem gavman bilong em bai putim mani long stretim dispela ples balus. Provinsal Gavman i wetim ol bikman long SAA long tokim ol long wanem samting long ples balus ol i ken stretim.

Em i tok tu olsem wok long nupela opis bilong Maramuni sab-distrik tu i stap. Timber Line Kampani long Hagen i kisim kontrak long wokim dispela opis tasol nau ol i no inap bikos ples balus i pas. Olgeta samting bilong wokim opis em bai ol i karim long balus.

Ol kain balus olsem Tuwin Ota o tu enjin na Sesena i save pundaun long Maramuni.

Redio Westen Hailans kraigen

REDIO Westen Hailans i statim pinis wok broadkas bilong em i go long ol pipel bihain long em i bin pas klostu long wanpela yia.

Gavana Pater Robert Lak i bin givim Redio Westen Hailans sampela mani bilong ronim stesin na tupela strongpela mita ben pawa bilong mekim wok broadkas.

Redio Westen Hailans em nambawan provinsal redio stesin long kantri long mekim wok broadkas long tupela mita ben pawa.

Provinsal Program Menesa bilong Redio Westen Hailans, Winterford Suharupa i tok, nau ol lain long Jimi, Is na Wes Kambia i ken kisim ol tok-tok bilong redio klia tru bikos kik bilong dispela ol mita ben pawa em strong moa. Na tu ol lain long Daru long Westen Provins na Rabaul long Is Nu Briten i ken harim 'Nek bilong Taragau.'


Mista Suharupa i tok, planti taim ol bisnis na ol gavman dipatmen long provins i no save yusim redio long putim aut ol progrem bilong ol. Em i askim ol long yusim redio moa.

Em i tok, Redio Westen Hailans em bilong ol na ol i no ken sem o pret long askim menesmen bilong redio long yusim. Em i salensim ol bos bilong wan wan divisen long Dipatmen ov Westen Hailans long lusim opis bilong ol na kam toktok long ol pipel wanem polisi na tingting bilong gavman long helpim ol pipel. Pater Lak i tok, i gat kainkain we bilong salim ol toksave na nius, tasol redio i save go long ol pipel hariap tru. Redio i no olsem ol nius-pepa we i save go wanpela o tupela de bihain.

Em i tok planti lain long ol bus i no save long rit o rait na redio i save mekim bikpela wok tru long skulim ol pipel long ol polisi bilong gavman na wanem samting gavman i laikim bai ol pipel i mekim.

Pater Lak i bin promis olsem taim em i stap long opis olsem rijional memba, sapot bilong em bai stap yet long Redio Westen Hailans.

Madang Nius



Balek Wail laip kisim luksave

JACOB BEGANI i raitim

BIHAIN long 23 yia, Balek Wail laip eria samting olsem 10 kilomita longwe long Madang taun i go long Bruce Jephcott haiwe i kisim luksave bilong gavman.

Long 1975, Dipatmen bilong Envairnmen na Konsevesen i tokaut olsem dispela eria em wanpela wail laip eria na gavman i gasetim.

Yunaited Nesens Developmen Program (UNDP) i makim Balek Wail laip eria gen sampela taim i go pinis bikos dispela eria i gat laim ston, smel wara (sulphur) na i gat planti ol wail abus na diwai long dispela eria.

Bipo ol asples lain i save kisim ripot bilong ol wail abus na diwai i kamap long Balek Wail laip eria. Tasol bikos ol i nogat gutpela save long mekim kain wok na tu Dipatmen bilong Envairnmen na Konsevesen i no mekim wanpela samting i kam inap tude, ol pipel i lus tingting olgeta long lukautim dispela wail laip eria.

Tasol long taim Mamose Rijinel Dairekta bilong Turis Promosen Atoriti, Erigere Singin i kisim opis long Madang, em i go het na painim rot bilong kirapim gen wok bilong lukautim dispela wail laip eria bai planti turis i ken go na lukim.

Em i lukim planti ol lain bilong kisim helpim, olsem ol pipel bilong Balek yet, ol wokman bilong provinsel gavman, ol politisen, na ol ejensi husat inap givim mani bilong kirapim dispela wail laip eria.

Em i mekim wanpela projek aplikesen i go long UNDP las yia na i askim sapos ol inap putim sampela mani long mekim dispela wok. UNDP i amamas long dispela sabmisen na i putim mani pinis bilong stretim ol liklik han rot insait long Balek Wail laip eria na mekim ol arapela samting bilong stretim dispela eria.

Kumul Fainensel Koporen i gat opis long Madang

BEN TAUMAI i raitim

KUMUL Fainensel Koporesen i gat opis nau long Madang. Dispela kampani i bin amamas planti ol wok man meri bilong gavman long Krismas.

Ol i bin kamap wantaim wanpela tingting olsem, sapos ol kastoma bilong ol i kisim dinau mani long mak bilong K400 na i go antap, nem bilong ol bai i go insait long wanpela dro bilong winim sampela mani.

Brens Menesa bilong Fainens Koporesen, Rodgie Deaquiz i tok olsem las yia em i namba wan taim bilong ol long go long Madang na opim wanpela opis bilong ol.

Olsem na ol i kamap wantaim dispela tingting long traim lukim sapos ol kastoma bilong ol i gat laik long kampani bilong ol.

Dispela tingting i no lus nating. Long Krismas, planti wok man meri bilong gavman i bin traim long resis long winim wanpela prais bai ol i gat moa mani bilong amamas wantaim famili bilong ol long Krismas.

Namba bilong namba wan prais mani em K250, narapela 5-pela lain husat i kam namba tu i kisim K100 na ol arapela 5-pela man meri husat i kamap namba tri i winim K50. Ol lain husat i winim prais em long,



• Gatedai Flierl husat i winim namba wan prais K250 i sekan wantaim wanpela wokman bilong kampani, John Simoi. Lukluk long baksait bilong Mista Simoi em narapela wokman bilong kampani, Joe Paru na Edvaisa bilong Provinsel Afeas na Lokol Level Gavman, Peter Torot.

Gatedai Flierl bilong Woks Divisen.

Em i winim K250 long namba wan prais, na ol narapela man meri husat i bin kisim namba tu prais em long Solum Fred, Rachael Mou, Simon Kambintik, Goi Torigis na Robert Himisa. Rom Kulala, Sumoy Rennie, David Mullul, Anthony Sika na Malcolm

Gaun bin winim namba tri prais.

Mista Deaquiz i tok olsem long dispela namba wan traim ol i lukim olsem i gat planti man na meri i soim laik long kampani bilong ol olsem na ol i tingting long kamapim wankain resis gen long Ista. Em i amamas tru long gutpela wok bung

ol pipel i soim na tu long provinsel gavman.

Mista Deaquiz i tenkim olgeta man meri husat i bin soim laik long resis long winim prais mani na i askim ol long traim gen long Ista. Ripot bilong dispela kampani i soim olsem planti ol man na meri i bin kisim dinau long dispela benk.

Stadi wok bilong Ramu Nikel main i pinis

STADI wok bilong Ramu Nikel projek i pinis na nau i stap long han bilong Nesanel Gavman bilong Papua Niugini, wanpela ripot i kam long Hailens Pasifik Kwateli ripot bilong pinis bilong Desemba 31, 1998 i tok.

Dispela ripot i soim olsem:

- Operesen kos bilong dispela projek i samap olsem US\$1.38/lb bilong nikel bipo long kobalt dinau na US\$0.41/lb bilong nikel bihain long kobalt dinau;

- Taim bilong wok i soim olsem 30 mun. Namba wan prodaksen bilong metal bai kamap long yia 2001 samting;

- Main laip, em bai kisim samting olsem 20 yia na i go inap long 35 yia;

- Kapitel kos bilong dispela projek em US\$838 milion, dispela i no kaunim sas bilong mani wok.

Menesing Dairekta bilong Hailens Pasifik, Ian Holzberger i tok, ripot bilong dispela stadi wok i soim olsem Ramu em wanpela planti mani bilong mekim wok bipo na bihain long kobalt dinau.

Dispela i helpim long kisim mani bilong kirapim dispela projek, kisim tok orait na painim maket bilong salim ol prodak bilong dispela projek.

Em i tok wok bilong painim moa mani bilong dispela projek i go het long las kwata we ol i lukluk long

sampela grup bilong wok bung wantaim.

Wanem bekim ol i kisim pinis i soim olsem ol dispela grup i redi long putim mani i go insait long dispela projek.

Projek beslain stadi bilong wanem kain hevi dispela projek inap kamapim long bus, graun, wara, solwara na ol samting bilong ol i pinis long las kwata aninit long lukaut bilong NSR Envairnmental Konsaltens.

Bihainim dispela, ol i mekim wanpela envairnmen plen we ol bai givim i go long opis bilong Envairnmen na Konsevesen bilong Papua Niugini gavman long dispela mun.

Dispela ripot bai strongim ol arapela wok stadi ripot na bai helpim long kisim tok orait bilong gavman long kirapim dispela projek.

Mista Holzberger i tok, toktok namel long gavman bilong PNG long Maining Developmen Kontrak na Spesel Maining Lis i go gut.

Gavman i tok ol i redi long hariapim dispela projek long namba tu kwata bilong 1999.

Em i tok tu olsem kampani i holim planti miting wantaim ol papagraun na i luk olsem ol i kisim planti sapot long ol papagraun.

Toktok bilong wanem kain helpim na ol kompensesen ol papagraun bai kisim i wok long go het yet.

Ol liklik kontrakta i no amamas long gavman

WENCESLAUS MAGUN i raitim

OL LIKLIK kontrakta bilong wokim ol rot na bris insait long Madang Provins i kros long Madang gavman na ol memba bilong Madang long Nesanel Palimen long i no luksave long ol na tok pait long givim ol sab kontrak long ol bikpela rot projek insait long Madang.

Mausman bilong ol na menesing dairekta bilong Pabel na Wes kampani, Peter Dumba i tok.

"Mi makim maus bilong ol liklik kontrakta bilong Madang olsem Mabora plent haia, Gama konstraksen, Not Ambenob Et Muing na kampani bilong mi yet long autim dispela bel hevi bilong mipela," Mista Dumba i tok.

Em i tok Nesanel Gavman, Madang Provinsel Gavman na ol memba bilong Madang long palamen i no toktok strong long givim ol sab-kontrak bilong Ramu-Madang haiwe i go long ol liklik kontrakta bilong Madang.

"Madang Provinsel Gavman i mekim wanem samting long ol liklik kontrakta bilong Madang na ol pipel bilong Madang

husat i stap long sait bilong rot long Ramu-Madang haiwe rot projek," Mista Dumba i askim.

Em i tok taim Nesanel Gavman na Madang Provinsel Gavman i givim kontrak i go long Downer Konstraksen bilong stretim Ramu-Madang haiwe, watpo ol i no laik givim ol sab-kontrak wok i go long ol liklik konstraksen kampani bilong Madang.

"Watpo ol i larim Downer Konstraksen i go het na givim sab-kontrak i go long Dekenai konstraksen, wanpela kampani bilong Papua na lus tingting long mipela ol liklik kontrakta bilong Madang," Mista Dumba i kros tru na i tok.

Em i tok projek bilong Ramu-Madang haiwe i kamap long Madang Provins, na Nesanel Gavman, Madang Provinsel Gavman na Downer Konstraksen i mas givim namba wan prairiti long ol liklik konstraksen kampani bilong Madang long kisim sab-kontrak wantaim Downer Konstraksen.

"Planti toktok i kamap long niuspepa, redio na televisen olsem Madang i go pas long bisnis. Tasol gavman i no luksave long ol liklik kontrakta na ol asples Madang na givim bisnis long ol.

I luk olsem Madang i kisim nem bilong go pas long bisnis bikos ol ausait lain tasol i kam mekim mani long Madang," Mista Dumba i tok.

Em i tok ol bikpela rot kampani, maining kampani, hotel bisnis lain, supra maket, fektori bilong smok, pis na ol kain bikpela kampani i kam kisim ol samting bilong Madang, mekim planti mani tasol ol liklik bisnis man meri bilong Madang i no gat sans bilong resis wantaim ol dispela bisnis jaiant.

Mista Dumba i tok tu olsem gavman i no save kisim takis long ol bikpela kampani long sampela taim, taim ol i winim kontrak long kirapim ol bikpela developmen long PNG.

Tasol long ol liklik kontrakta, gavman i no givim liklik sans. Nogat tru.

Gavman i mekim olgeta samting bilong kisim takis long ol. Olsem na gavman i no makim ol pipel bilong en. Nogat. Gavman i makim bisnis interes bilong ol ausait lain.

Em i pret sapos kain pasin i go het yet, ol arapela bikpela projek i laik kamap long Madang olsem Ramu Nikel main projek i ken bihainim wankain rot.



Lae Nius

Fainens opis i no givim mani yet

YAKAM KELO i raitim

Sampela gavman opis wokman long Morobe provins i no bin kisim potnait pe bilong ol long mun Januari bikos i nogat mani i kam long Waigani opis long lukautim pe bilong ol pablik sevans long 1999.

Dispela i mekim sampela pablik sevans woka long sampela gavman opis long Lae i no bin kisim potnait na ol i abrusim tupela potnait pe bilong ol.

Tasol insait ripot long Morobe edministresen i tok olsem long las wik, sampela mani i kam long Waigani na dispela mani i go insait long sait bilong potnait pe bilong ol wokman.

Ripot i tok dispela mani i no ful mani bilong karamapim potnait pe bilong ol pablik sevans woka long Morobe provins. Dispela em hap tasol inap wanem taim mani bilong

Morobe provins aninit long baset i kam long provins.

Ripot i tok Morobe provinsel baset i bruk pinis tasol wok bilong kisim kaikai bilong baset i kam i no pinis yet. Bikos dispela em wanpela bikpela wok we olgeta rekot bilong mani long i go long wanwan wok na eria i mas kamap klia na stret long bikpela kompyuta bilong Fainens opis long Waigani. Na bihain dispela rekot i mas go gen long kompyuta bilong Morobe Treseri opis. Taim olgeta rekot bilong mani i go stret long tupela bikpela kompyuta bilong treseri opis long Mosbi na Morobe i orait, bai kaikai bilong baset i go aut long ol wok na eria bilong inapim baset bilong provins.

Olsem na long dispela as, Morobe provins i gat mani bilong em yet we em i save kamapim we i mak long K42 milien na mani bai i kam long Nesenel Gavman ol i kolim nesenel gavman grent, mak olsem

K34 milien i no go insait long kompyuta yet. Rekot i stap tasol ol fainens wokman i no paitim namba i go insait long kompyuta yet bikos em i bikpela wok tumas na bai ol i isi yet inap wanem taim ol i pinisim, ripot i tok.

Wantok i askim wanem taim bai dispela wok i pinis tasol ripot i tok dispela wok inap pinis long namel bilong mun Februari, 1999.

Dispela ripot i tok sapos mani bilong potnait pe i no kam hariap, bai ol wokman i ken bungim hevi tu long bihain. Bai ol i no inap kisim pe long wanpela o tupela potnait bihain inap olgeta mani bilong baset long sait bilong potnait pe i kamap long pasbuk bilong Morobe provinsel edministresen.

Narapela tu ol arapela wok i mas wet yet inap pasbuk bilong Morobe edministresen i kisim ful mani i kam long Fainens opis long Mosbi long karimaut ol wok bilong provins aninit long baset plen bilong 1999.

Namba bilong smok nogut i go antap long Morobe

EKTING Morobe Provinsal Komanda (PPC) Simon Yipam i bilip olsem namba bilong smok nogut (marijuana) i wok long go antap insait long Morobe provins.

Yipam i tok olsem bihain long ol i holim pasim wanpela yangpela man husat i groim dispela smok nogut long gaden.

Nem bilong em Peter Petai bilong ples Bau long Morobe Patrol Post husat ol plis i holim em long Fonde las wik na putim em long plis sel.

PPC Yipam i tok, "mi bilip olsem dispela hevi bilong smok nogut i no long Morobe distrik tasol, long ol arapela distrik tu long provins na tu long Lae siti yet."

Em i tok ol pipel long ples mas wokbung wantaim na traim helpim long toktok long ol yangpela pipel long stretim dispela hevi na noken hariap long kisim i go long plis.

Hariap long kisim i go long plis na sasim ol i go long kalabus save bagarapim ol yangpela long ol arapela pasin nogut, em i tok.

Komyuniti lida askim ol pablik sevans long wok gut

SINGAUT i go long ol pablik sevans woka long Bulolo Wau long ol i mas mekim gut wok bilong ol long sevim tru ol pipel bilong ples. Dispela singaut i kam long wanpela komyuniti lida bilong Wau Giding Tony long dispela wik.

Mista Tony i tok olgeta pablik sevans man na meri i mas tingim wok bilong ol stret long sevim ol pipel na i no bilong sindaun nating o raun nating ka long rot.

Em i tok ol pablik sevans long Bulolo Wau i no ken traim tu long wokim ol liklik wok bisnis olsem tred stua o pmv ol arapela kain wok bisnis. Sapos ol i laik wokim bisnis, ol i ken go bek asples bilong ol na mekim bisnis.


Mista Tony i tok ol pablik sevans i aplai long wok bilong sevim pipel na gavman i kisim ol. Olsem na ol i mas sanap long wok bilong ol stret.

Em i tok sapos wanpela pablik sevans i no mekim gut wok bilong em, bai ol i ripotim em stret long ol bosman bilong gavman na memba bilong ol Samson Napo.

Bikman ya i mekim dispela toktok bihain long em i lukim planti wokman bilong gavman long Bulolo Wau ino save sindaun gut long opis bilong ol na sevim ol pipel long hevi na wari bilong ol. Taim ol asples manmeri i go kamap wantaim hevi bilong ol, nogat wokman i stap long sevim ol.

Em i tok olgeta pablik sevans i no ken ting ol i hait na mekim samting bikos ai bilong pipel istap long olgeta hap long lukim ol na ripotim.

Em i tok strong olsem ol pablik sevans i mas tingim olsem gavman i kisim ol long sevim ol pipel na ol i mas sanap stret long dispela wok bilong ol. Em i askim ol dokta na nes, plisman, ol didiman na kiap na olgeta pablik sevans woka insait long Wau Bulolo eria long tingim na mekim gut wok bilong ol long dispela yia 1999 na i go.



• Wara i pundaun long maunten long ples Butaweng long Finsafen. Dispela em wanpela naispela hap tru long lukluk raun na kisim kol win. Foto Franco Nebas.

Haus kalabus i bagarapim ol yangpela pipel: Yipam i tok

FRANCO NEBAS i raitim

EKTING Morobe Provinsal Plis Komanda (PPC) Simon Yipam i tok olsem haus kalabus i save bagarapim ol yangpela pipel.

Yipam i mekim dispela toktok bihain long ol plis i holim pasim wanpela yangpela boi long Bau ples long Morobe Patrol Post long las wiken. Ol plis i holim pasim

Peter Petai long las wik bihain long em i groim smok nogut (marijuana) long gaden bilong em. Em nau i stap long plis sel.

Yipam i bilip olsem i no long Morobe tasol smok nogut i wok long kamap tasol long ol arapela distrik tu.

Em i tok, "dispela pasin em ol pipel long Morobe i bihainim long ol arapela provins, long wanem

bipo i nogat dispela kain pasin i save kamap tasol nau em i kamap.

Dispela long wanem, taim ol yangpela pipel i wokim ol liklik trabel, ol pipel o viles kot i no laik stretim tasol hariap tasol kisim i go long plis na sasim ol i go long kalabus," em i tok.

Haus kalabus em olsem skul bilong ol trabel lain. Taim ol i

mekim ol liklik trabel na i go insait long kalabus. Em ol i lainim planti nupela samting.

Bihain long pinisim dispela liklik taim long haus kalabus ol i save pinis o harim gris toktok bilong ol lain husat i mekim bikpela trabel na save bihainim.

Yipam i tok olsem, "em i moa gutpela long ol komyuniti o viles kot i stretim ol dispela liklik trabel

na sapos ol i no inap orait i ken kisim i go long plis. Dispela i ken helpim ol dispela yangpela pipel.

Long wankain taim yet, Yipam i tok olsem namba bilong smok nogut long provins i wok long go antap long taun na tu long ol distrik long Morobe.

Em i laik salim tok lukaut olsem plis bai mekim save long ol dispela lain husat i groim smok nogut na smokim tu.

OL LIKLIK STORI

BUSTIN ANZU i raitim

Brata kilim brata long Menyamya

WANPELA man Menyamya nau i stap long han bilong ol Menyamya plis bihain long kilim i dai brata blong en long las wik Sande.

Dispela hevi i kamap bihain long tupela brata i bin kros long sampela hevi i bin kamap namel long tupela yet.

Ekting Provinsal Plis Komanda Simon Yipa i tok liklik brata bilong man ya i bin wok long gaden na bikpela bilong em i bihainim em i go wantaim wanpela bus naip na katim em long nek bilong em. Em lusim planti blut na i dai sem taim.

Yipam i givim nem bilong em olsem Garson Robert na em bilong Gigi ples Kapo, Menyamya. Bikpela brata bilong em nau i stap long Menyamya plis stesin.

Ol plis bilong Wau na Lae i go long mekim wok painimaut.

Masta Yipam i tok dispela kain hevi em i no save kamap bipo. Dispela i soim i no pasin bilong ol man na tok kain hevi olsem i liklik na ol yet inap long stretim isi long hauslain na pinisim olgeta.

Em i tok man ya bai kot long kilim i dai brata bilong em.

Stilman kilim i dai sekyuriti gad long Malahang

PLIS long Lae i wok long mekim wok painimaut long i dai bilong wanpela sekyuriti man long Malahang Teknikol Hai Skul long Mande moning.

Lae siti plis bos Tony Wagambie i kolim nem bilong dispela man olsem Yetep Tokumai na em bilong Menyamya distrik insait long Morobe provins. Man ya i gat 4-pela pikinini na save stap long ples Yanga.

Dispela birua i bin kamap long bikmoning bilong Mande we pawa i blekaut long Malahang ples na sekyuriti ya wantaim narapela i was long dispela skul.


Samting olsem 5-pela stilman i bin brukim banis na kam insait long banis na traim long brukim opis na stilim ol samting insait long skul.

Tasol tupela sekyuriti i lukim dispela na traim long rausim ol i go. Ol stilman i pait bek na holim pasim Yetep. Ol i rausim siot bilong em na pasim tupela lek bilong em na han. Sem taim: tu painim hap laplap na pasim maus bilong em na bihain paitim em.

Ol i mekim olsem na larim em i stap arere long opis na em i dai. Ol stilman ya i go insait na stilim ol samting insait long opis bilong hetmasta na stilim kompyuta.

Mista Wagambie i tok olsem dispela kain pasin em i no bilong ol man na em i no amamas stret.

Ol plis i wok long mekim wok painimaut long dispela birua.



• Rises stesin long Bubia, Lae i soim ol wara melon ol i save planim na salim long maket. Ol i soim ol bin na arapela kaikai tu.

Graun long Salamaua hai skul na stesin i go long Kela pipel

YAKAM KELO i raitim

LOKOL Len Kot long Lae i givim graun Salamaua hai skul i sanap long en i go long ol pipel bilong Kela viles insait long Salamaua, Morobe provins.

Len kot disisen long Januari 21, 1999 i givim dispela graun i go long Kela viles bihain long ol i bin kot wantaim narapela asples grup ol i kolim Walama na Lagui.

Walama len grup em wanpela rejista len grup, tasol mejstret Sasa Inkung i skelim ol stori tumana, ol samting ol tumbuna i planim na ol lek mak wantaim arapela samting we i stap long graun. Wantaim stori bilong Luteran misin long 1906 we misin i raun long wok misin long hap na evidens bilong ol arapela klen tu i sapot long givim dispela disisen igo long ol pipel bilong Kela ples.

Insait long kot disisen bilong mejstret Inkung, em i tok ol pipel bilong Wamala na Logui i bin givim stori bilong ol long tumbuna bilong ol i save wok-abaut long dispela hap graun bipo. Ol i givim stori long ol mak na bandri bilong ol we wara i ron long en i go inap long maunten tasol nogat wanpela bilong ol i gat len mak long dispela hap graun we toktok i kamap long en.

Mista Inkung i tok ol pipel bilong Kela i givim stori bilong ol long tumbuna bilong ol i save raun long ol dispela hap graun na ol i gat ol mak long olpela ples na nupela ples wantaim olsem kokonas, saksak, mango na arapela moa samting i stap long ol dispela hap we toktok i kamap long en.

Mista Inkung i tok long ol klia evidens em i gat, Luteran misin i bin go long Salamaua eria namel long 1906 na 1907 na bihain Salamaua stesin i

SALAMAUA RIPOT

bin kamap taim Australia gavman i kam insait.

Long dispela taim bilong ol waitman i kam, ol pipel bilong Logui na Walama i no bin mekim wanpela wok o stap antap long dispela hap. Ol pipel bilong Kela tasol i bin stap long dispela hap bikos Luteran misin buk long tok ples Yabim we ol i bin raitim long 1955, long pes 95 i tok, tru ol pipel bilong Kela na Asini i stap long ailan (Salamaua poin) ol i gat bus na saksak i stap long meinlen. Graun we toktok i

kamap long en. Dispela i min olsem ol pipel bilong Kela i bin stap long dispela graun pas-taim long ol waitman i bin kamap long hap.

Mista Inkung i tok long disisen bilong em olsem ol arapela ples husat i stap insait long dispela kot i nogat wanpela evidens we i soim olsem ol i save wokim gaden o haus na ol arapela wok long dispela hap graun inap ol waitman i kamap long hap inap nau.

Mista Inkung i tok long evidens, ol pipel bilong Kela i bin yusim dispela graun toktok i kamap long en long bipo taim bilong tumbuna yet i kam inap

nau. Na ol arapela tripela ples husat i toktok long dispela hap graun i nogat wanpela klia evidens long wankain mak na ol samting bilong ol long dispela hap.

Bikos long ol wok na samting we i stap long dispela hap graun we Salamaua hai skul na stesin i laik sanap long en, Mista Inkung i skelim olgeta evidens na stori i go pinis na mekim oda.

Ol pipel bilong Kela ples em papa bilong dispela graun posen 69C we Salamaua hai skul i sanap long en na tu posen 70C we Salamaua stesin bai sanap long en.



• Sampela famili long Morobe provins i mekim save long wok gaden long redim nupela gaden bilong planim kaikai.



• Ol mama grup long Wampar, Makam i soim bilas ol i wokim.

Lukautim gut samting bilong gavman

"SAPOS mipela i bagarapim samting bilong gavman, i min olsem mipela i no laikim na rispektim gavman. Taim bilong bipo i pinis. Mipela i kisim independens 23 krismas i go pinis na mipela i noken bagarapim ol samting bilong lukautim na helpim yumi," Ekting PPC Simon Yipam i tok.

Mista Yipam i mekim ol dispela tok-tok bihain long ol raskol man i kukim wanpela gavman ka we ol plisman

bilong Aseki i yusim. Dispela i kamap long las wik Tunde long Bulolo taun.

Dispela ka i bin go pas long graun na ol i no inap long rausim na larim i stap. Ol raskol man i go insait long nait na kukim dispela ka.

Mista Yipam i tok dispela em soim olsem ol i stap yet long ol taim bilong ol tumbuna taim ol i no kisim independens yet.

Bulolo laik kamap Kauboi taun gen

PLANTI komyuniti insait long Bulolo taun nau i surik long planti pasin nogut i kamap isi isi insait long Bulolo. Tasol i no olgeta komyuniti i stap insait long dispela.

PPC Simon Yipam i tok planti liklik hevi nau i stat long kamap, em long wanpela setelmen tasol long Karanas setelmen.

Em i tok ol lain long dispela hap i wok long mekim planti trabel we i laik bagarapim gutpela nem bilong ol pipel long Bulolo.

Em i mekim toktok bihain long wanpela hevi we ol mangi long Karanas setelmen i bin brukim wanpela stoa bilong ol lain Finsafen long Bulolo maket na ol Bulolo plis i go long ronim ol. Ol i bekim na sut long ol plis. Ol plis i kirap sutim wanpela long ol dispela stil mangi.

Em i tok tu olsem taim apinun, ol i save wokim ol kainkain trabel long ol manmeri long maket na dispela i no gutpela tumas.

Em i tok tu olsem ol kristens insait long Bulolo i mas prea long ol dispela lain we ol i mas tanim bel. Na tu ol papaman ol lida na kaunsil i mas lukluk long stretim ol dispela hevi.

Em i tok tu olsem sapos ol i no inap, bai ol plis i lukluk long en. I no gutpela long karim ol dispela liklik komplek long plis we ol yet inap long stretim.

Em i tok tu olsem ol papamama yet i mas lainim ol pikinini bilong ol gut.

"Hevi i stap long komyuniti em ol lidas insait long komyuniti i mas lukluk long en."

Angau menemen mas raus

FRANCO NEBAS i raitim

NAMBA tu bikpela haus sik long kantri Angau haus-sik insait long Lae siti i laikim ol menemen i mas raus na nupela mas kisim ples.

Dispela em long wanpela petitsen ol nes, dokta, ol arapela wokmanmeri na komyuniti lida i givim i go long Gavana bilong Morobe Luther Wenge.

Long petitsen we ol maus manmeri bilong ol i karim i go long Mandé na givim long Gavana Wenge long ol hevi nau i wok long bungim ol wokmanmeri long Angau.

Petitsen i tok olsem, ol i laikim sep eksekutiv opis (CEO) Margaret Samei husat ol bod bilong Angau i makim em gen long dispela posisen bilong em

long raus na tu ol bai memba husat i stap nau long pinis tu.

Dispela em long wanem, aninit long lida sip bilong Samei na ol bod i stap nau i no gutpela tumas we ol i bilip olsem i wok long bagarapim Angau haus sik.

Long sampela toktok, (hevi) we ol i bin putim wantaim dispela petisen em, ol i no amamas long CEO long makim man bilong em long wanpela posisen long Angau.

- Ol fi we ol i kisim long ol sevis long haus-sik i go we na i nogat gutpela samting o marasin long haus sik.

- I no gat gutpela wok bung wantaim ol nes na dokta.

- I no gat gutpela wok bung wantaim ol menemen na wok manmeri.

- Menesen i no save lukluk long hevi bilong ol wokman, nes,

dokta na arapela wokmanmeri.

- Nogat gutpela komyunikesen long ol dokta husat i stap long duti, long dispela as planti sikman i save dai.

- Ol sekuriti gad i save rausim sikma long geit we sampela i sik nogut tru i klostu dai.

- Ol sikman long wod nogat gutpela kaikai na ples bilong slip.

Dispela em ol hevi bilong ol wokman i givim wantaim petisen long Gavana.

Gavana Wenge i sore tru, na tok promis olsem em bai lukluk long dispela hevi.

Em i tok, ombusman bai sekim Angau, em bia kisim dispela tu go long Nesenel Minista bilong Helt na tu Provinsal Minista bilong Helt na PPA mas wokim ripot we bai go long (PEC) provinsal, eksekutiv kaunsel long skelim dispela hevi.

Nogat gutpela helpim long dinau Philemon i tok

MEMBA bilong Lae Bart Philemon i tok Skate Lasaro gavman i toktok long kisim dinau long lukautim 1998 na 1999 baset bai bagarapim ikonmik menemen bilong kantri.

Em i tok taim gavman i holim pawa em i soim tru olsem em i nogat pawa long toktok wantaim Wol Benk/IMF long kisim dispela dinau mani.

"Gavman i feil long soim strong bilong em taim em i toktok wantaim Wol Benk/IMF. Tasol i givim baksait na pasim toktok wantaim Kredit Kopresin Benk long Yurop we nau i lusim mipela. Na nau gavman i tanim bek na lukluk long Wol Benk/IMF," em i tok.

"Mi gat strongpela bilip olsem gavman bai kisim longpela taim long stretim ol dispela toktok long kisim dinau.

Mi laik bai Praim Minista na gavman bilong em mas sekim ol yet gut tru.

Mi laik toksave long Praim Minista olsem Papua Niugini i gat mak na level bilong em yet long Wol Benk/IMF na rot bilong kisim dinau mani i stap long han bilong gutpela gavman.

Mi laik /skruim tok tu olsem Menesing Dairekta bilong Wol Benk, Sven Sandstrom i bin tok olsem sampela samting PNG i mas mekim long kisim helpim long ol narapela kantri.

Em gutpela gavman i nogat paul pasin," Mista Philemon i tok.

Em i tok tu olsem gavman i feil long pasim tok wantaim Wol Benk na IMF na dispela tu i mekim na Kredit Benk long Yurop, i les long helpim Papua Niugini.

"Dispela pasin tasol na gutpela rot bilong kisim dinau mani i hat na i no inap strongim 1999 baset gut na strongim eksens reit.



• Sampela famili long Makam i bung long kea senta taim graun i bin bruk long Makam long 1994.

Skul yia i stat wantaim planti paul tingting

YAKAM KELO i raitim

OL skul insait long olgeta hap bilong Papua Niugini i stat long dispela wik we sampela skul i orait long statim skul na planti i gat hevi yet bikos long skul fi sabsidi bilong nesanel gavman.

Insait long biksiti Mosbi, planti skul i bungim hevi long dispela wik Mande long skul fi sabsidi we i no kamap yet long skul bilong ol. Na tu Nesanel Kapitel Distrik Komisnin (NCDC) i bin askim planti skul long ronim skul bilong ol bihainim baset plen bilong ol long dispela yia.

Long Mande dispela wik, wanpela bikpela skul insait long Mosbi em Ward Strip komyuniti skul we em i rausim ol wokman bilong em olsem ol sekyuriti gad, ol kuskus na wokmanmeri bilong opis. Bikos mani bilong skul we NCDC bai givim i no inap lukautim ol dispela wokmanmeri. Skul i save gat inap mani bilong ronim wok bilong skul stret na mani i save kam long gavman long baim potnait pe bilong ol wokman em NCDC i katim dispela na i laik lukluk long skul sabsidi tasol.

Wanpela bikpela klasrum bilong gret 8 we NCDC tu i wokim i no pinis yet na skul i wok long pilim wari long dispela tu bikos ol i no klia sapos NCDC bai kam yet long pinisim wok bilong dispela skul o nogat.

Bikpela hai skul long Gorden we i gat gret 7 inap long gret 12 i tokaut olsem ol i askim ol studen long baim ful skul fi bilong hai skul. Skul i askim ol papamama long baim ful skul fi mak

NCD RIPOT

olsem K700 bilong wanwan studen.

Skul i tok sapos skul fi sabsidi we NCDC bai givim long ol i kamap, orait ol studen bai givim bek hap mani bilong ol bek. Sapos dispela mani i no kamap, gutpela long ol sumatin i baim skul fi bilong ol pinis.

Wantok i painimaut olsem dispela pasin i stap long olgeta komyuniti na hai skul insait long biksiti Mosbi.

NCDC i bin tokaut olsem olgeta pikinini long elemetri skul long

dispela yia i no ken baim skul fi bikos NCDC bai lukautim dispela. Ol pikinini long elemetri inap baim mak bilong skul fi long mak olsem K80 na K100. Long ol arapela gret i go antap long 12 na vokesenel skul insait long siti, NCDC bai baim hap na papamama bai baim hap skul fi bilong ol sumatin.

Planti papamama bilong ol sumatin i luksave long dispela na i laikim dispela samting i mas kamap tru. Tasol ol skul tisa i wari long dispela sabsidi i mas kamap tru na go long han bilong ol skul bai olgeta wari bilong ronim na lukautim skul i mas kamap gut.

Diro laik kamapim Imejens Sevis

KENNEDY EDENE i raitim

SENTRAL PROVINSAL Gavman i wok long tingting long kamapim Disasta na Imejensi Kodinesen Senta nau bilong em yet insait long provins.

Dispela Imejensi Sevises tasol bai wok klostu wantaim NDES Gavana Ted Diro tok las wik. Mista Diro tok, provinsal Disasta na Imejensi Kodinesen Senta em long lukluk na wok hariap tru long ol disasta na arapela bagarapim we i kamap long ol pipel.

Em i tok, dispela senta bai tu monitarim na wok long ol haiwe birua na gutpela ron bilong ol pipel.

Mipela bai go na helpim ol man i gat wari o hevi na long ol raskol pasin insait long provins, Mista Diro tok.

Em i no toktok long hau bai mani


bilong dispela Sentrel Provins Disasta na Imejensi Senta (CPDES) bai kam tasol, em i tok bai kam tru long Nesanel Disasta na Imejensi (NDES) senta hia.

Mista Diro i mekim dispela toktok long bekim ripot olsem Sentrel Provinsal Gavman i no bin sevim ol laip bilong tupela fisamen husat i dai long Fraide las mun long solwara.

Mista Diro sapatim gavman bilong em olsem, em i no wokim wanpela samting. Na long toktok bilong Provinsal Afeas na Lokol Level Gavman Afeas, Minista Dibara Yagabo, Gavana tok, em i wok bilong em Minista Yagabo.

Tupela man bin dai long Rigo taim ol i go tromoi umbin long solwara we ripot i tok ol i bin pas long rif na dai.


Tupela daiman bilong Tauruba viles long Rigo insait long Sentrel Provins.



Graun bilong DCA • Dispela setelmen long Erima arere bilong Jacksons ples balus i gat plen bilong Sivel Eviessen long mekim ol wok long en. Ripot i tok dispela em graun bilong DCA.

DO SOMETHING FOR YOU!

Learn Something New With ICS® Distance Learning.



- Learn at home.
- Materials are written in easy everyday English.
- No previous experience necessary.
- Mail or fax today!

ICS LEARNING SYSTEMS

INTERNATIONAL CORRESPONDENCE SCHOOLS

Dept. TTS39, Box 1900, Scranton, PA 18501-1900 U.S.A.
 FAX: (717) 343-8462
 http://www.icslearn.com

World's Recognized Leader in Home-Study Training for More Than 100 Years.

ASSOCIATE IN SPECIALIZED BUSINESS DEGREE PROGRAMS

- 60 Business Management
- 61 Accounting
- 80 Business Management with option in Marketing
- 81 Business Management with option in Finance
- 64 Applied Computer Science
- 68 Hospitality Management

ASSOCIATE IN SPECIALIZED TECHNOLOGY DEGREE PROGRAMS

- 67 Electronics Engineering Tech.
- 63 Civil Engineering Tech.
- 62 Mechanical Engineering Tech.
- 65 Electrical Engineering Tech.
- 66 Industrial Engineering Tech.

- 07 U.S. High School Diploma
- 02 Electronics
- 05 Hotel/Restaurant Management
- 13 Professional Secretary
- 35 Travel Agent
- 14 Air Conditioning & Refrigeration
- 32 Art
- 59 Catering/Gourmet Cooking
- 23 Medical Office Assistant
- 24 Dental Office Assistant

- 51 Fashion Merchandising
- 33 Motorcycle Repair
- 52 Surveying & Mapping
- 22 Wildlife/Forestry Conservation
- 47 Animal Care Specialist
- 89 Small Engine Repair
- 48 Computer-Assisted Bookkeeping
- 08 Legal Assistant
- 42 Dressmaking & Design
- 87 TV/VCR Repair
- 04 Auto Mechanics
- 12 Interior Decorator
- 18 Bookkeeping
- 06 Electrician
- 03 Child Day Care Management
- 38 PC Specialist
- 55 Diesel Mechanics
- 41 Journalism/Short Story Writing
- 94 Fitness & Nutrition
- 85 Drafting
- 40 Photography
- 72 Appliance Repair
- 27 PC Repair

- 26 Teacher Aide
- 70 Computer-Assisted Small Business Management
- 79 Electronics Technician
- 25 Gunsmith
- 30 Floral Design
- 15 Home Inspector
- 58 Private Investigator
- 39 Medical Transcriptionist
- 76 Freelance Writer
- 84 Pharmacy Technician
- 56 Pet Groomer
- 54 AutoCAD
- 01 Programming in BASIC
- 37 Visual Basic
- 36 Visual C++

Get Free Information—Mail Entire Ad Today, Or Fax to 717-343-8462. Write the number of the one career that interests you.

MR / MRS / MISS _____ AGE _____

ADDRESS _____ (Please print clearly) POSTAL CODE _____

CITY/COUNTRY _____ PHONE _____

ICS ACCREDITATIONS AND APPROVALS

ICS is an accredited member of the Distance Education and Training Council in Washington, D.C. and is approved by the Pennsylvania State Board of Private Licensed Schools. ICS Learning Systems has been reviewed and approved as a Certified Provider of continuing education and training programs by the International Association for Continuing Education and Training.



Elcom laik pulim pawa lait long Koiari asples

KENNEDY EDENE i raitim

JENERAL MENESA bilong Papua Niugini Electricity Commission (PNGEC) Mista Sev Maso i tokim ol Koiari las wik long stretim gut ol yet na lukim Elcom we ol i redi long putim pawa i go insait long ol ples.

Mista Maso tok, Elcom em i redi long bringim pawa lait program i go insait long viles bilong ol Koiari lenonas tasol ol i mas ogenaism ol yet gut na kam long em.

Em tokim ol Rouna o Omani papagraun insait long wanpela raun tebel kibung long Aopi haus we tupela lens dipatmen na Eda Ranu tu bin sindaun long en.

Mista Maso bin tokim ol papagraun siaman Mista Eibe Marava long kam na lukim em long opis bilong em, hariap tru wantaim ol infrastruksta plen bilong ol.

Insait long dispela miting tu, Elcom bos i tok i no bin amamas tumas olsem planti kleim bilong ol Koiari i wok long kam long opis bilong em na em no save wanem kleim long lukim na stretim.

Sauten rijon asisten dairekta bilong Lens Mista Adrian Abby bin makim ol Lens Dipatmen.

Long dispela kibung ol Lens bin tokim ol Omani papagraun olsem ol bai wok long graun sait na ol bai mekim wanpela sabmisen long dispela hap graun i go long Nesanel Len Komisen we bai kisim olsem 3 wiks, Mista Launa tok.

Dispela hap graun ol wok long toktok em i posen 914.

Mista Abby tok, taim sabmisen bilong lens go kempen, ol man bilong (NLC) graun rejistresen lain bai lukluk long em na sapos em i orait, ol bai wokim wanpela ripot gen na salim i go long Nesanel Eksekutyutiv Komisen

bilong Stet long wokim eks-gratia peimen long ol papagraun.

Mista Leonard Kila bin makim Eda Ranu tasol em i bin lusim namel long kibung, we em i tok em i gat narapela kibung long go long en.


Olsem na i nogat wanpela strong bilong ol Eda Ranu long ol papagraun.

Tasol Mista Abby tok bai toktok long ol Eda Ranu bihain.


Ol Rouna Omani papagraun bin amamas long dispela kibung tasol ol i tok, ol laik harim gutpela toktok insait long tupela mun samting, long dispela kleim bilong ol

Long bihain long miting ol papagraun bin tok, ol bai kisim wanpela kibung long Furimutu ples klostu long Bluff-Inn Motel.

Dispela kibung em long wokim ol plen bilong ol papagraun olsem pawa i kam long ol ples na ol narapela samting.



• Dispela i no raun wara nating. Dispela raun wara tasol i kamapim pawa na lait i kamap long ol haus na planti samting i wok na wok i kamap. Em Yonki Dem long Kainantu eria, Isten Hailans provins.



• Antap: Ol plisman long bipo i save gat moa stail winim ol plisman bilong tude. Lukim stail bilong tripela plisman ya antap long wanpela motobaik.

• Raithan: Ol sampela sumatin bilong Irian Jaya husat i pinisim yunivesiti na raun nating. Ol i sanap wantaim OPM komanda William Ondel na Thomy Yangam (beksait).

• Aninit: Ol sampela yut lain long Tabubil i raun holim felosip insait long Ok Tedi eria.

• Aninit Raithan: Dispela em wanpela meri Baruni long Sentral provins (raithan) nem bilong em Ahuta Lino i bin karim pikinini long krisman nait stret Desemba 25, 1998. Liklik bebi meri ya i kisim nem bihainim star ol tripela save-man i bin bihainim i go painim Jisas. Nem bilong bebi em Skybell o Belo i krai long klaut.



WANTOK spots wilken

Westen Hailens Spots Kaunsil i stat gen

HAGEN SPOT RIPOT

PIUS MON i raitim

WESTEN Hailens Spots Kaunsil bai kirapim gen wok bilong em long developim na strongim spot insait long provins.

Kaunsil bai kam aninit long divisen bilong Komyuniti Developmen long Dipatmen bilong Westen Hailens.

Wanpela martial atis John Kouse bai go pas long em olsem siaman. Elizabeth Kissom em i tresera na Alphonse Pu, wanpela sinia ragbi lig referi em i sekretari.

Ol arapela memba bilong komiti i makim ol arapela spoting bodi insait long provins.

"Mipela i laik strongim wok bilong spot insait long rurel eria na tu long Mt Hagen siti," em i tok.

Kouse i tok bikpela hevi bilong kaunsil em mani. Na sapos kaunsil i ken stretim dispela hevi, ating bai sampela tenis bai kamap yet ya.

Em i askim olgeta spoting grup long provins long afiliat long Westen Hailens Spots Kaunsil sapos ol i gat tingting long kisim helpim long gavman.

"Nogt wanpela spoting grup o asosiesen bai kisim helpim long edministreta o gavana saos ol i no bihain rot long memba long Spots Kaunsil.

"Em i givim tok lukaut i go long ol kampani long noken givim sponsa i go long ol tim bipo ol i mas ringim kaunsil," Kouse i tok.

Napo baim afiliesen bilong Wau/Bulolo lig

WAU/BULOLO LIG RIPOT

ARI GUH DANDEE i raitim

MEMBA bilong Bulolo long Nesenel Palamen Samson Napo i bin pinisim wari bilong ol opisel na ol pilaia bilong Wau/Bulolo Ragbi Lig Asosiasen taim em bin baim K1,250 afiliasen fi long PNGRFL.

Napo i bin tokim Wantok olsem em i bin luksave long wari bilong ol ragbi pilaia insait long Bulolo na em i sapatim ol bikos em i laikim olsem PNGRFL mas luksave long Wau Bulolo Ragbi Lig Asosiasen olsem wanpela olpela lig asosiesen.

Wau/Bulolo Lig em bilong bipo tru we i bin stat op long 1930s i kam inap nau na i mas mekim wokbung wantaim long promotim sampela bilong ol dispela pilaia i go antap long Kumul.


Em i tok, nau yet Wau Bulolo Ragbi Lig Asosiasen i afiliat pinis mi laikim olsem olgeta opisel i mas kamapim wokbung wantaim long strongim nem bilong ragbi insait long Wau.

Mista Napo i bin tokaut tu olsem em i bin i gat bikpela amamas tru long singaut bilong ol opisel na ol lig pilaia we em i lukim long Wantok Spot Nius na em i helpim long daunim bel wari bilong ol na em bai i amamas tasol long wokbung wantaim ol opisel long promotim ragbi insait long Wau Bulolo yet olsem memba bilong ol.

Wantok i bin toktok wantaim interim presiden bilong Wau Bulolo Ragbi Lig Asosiasen Samson. Hiogai long dispela afiliasen fi we Mista Samson Napo i bin peim na em i bin amamas tru.

Em i makim maus bilong ol interim opisel na mekim bikpela tok tenkyu na amamas i go long memba.

Em i tok ol bin i gat planti tingting na wari i stap bikos ol i salim pas long



• Samson Napo.

planti bisnis tasol i no kisim wanpela bekim.

Mista Hiogai i salensim olgeta bisnis haus insait long Wau, na Bulolo long helpim na promotim ragbi bikos memba Mista Samson Napo i bin mekim pinis na ol narapela i mas mekim wankain olsem.

Bikos em i tok kain spot olsem ragbi, soka na basketbal em ol kain bikpela spot insait long Wau na Bulolo we i save pulim ol planti manmeri na ol bisnis haus i mas lukluk i go insait long sapatim na promotim bikos, ol i save mekim bikpela mani long ol.

Long ragbi yet ol opisols i amamas gen bikos, spots tasol bai i mekim na lo na oda long Wau bai i stap isi gen bikos planti yangpela bai i bisi tru long pilai na ol no inap tingting nogut moa long kamapim trabel.

Nau Bulolo ragbi lig i gat amamas bikos long kain ol sapat olsem na ol i gat ol biknem pilaia ol David Buloko wanpela prodak bilong Wau Bulolo husat i stap nau long ovasis kontrak long pilai na narapela tupela en long Simon Kundi long Kumul husat i save pilai wantaim Lae Bombas na Joe Tonar.

Dispela yia ol i gat bikpela strongpela tingting long kamapim sampela moa gutpela prodak bilong Wau Bulolo long joinim lain bilong ol tripela yia i go longpela liklik.

Manalos i wokim bikpela selebresen

POT MOSBI MENS SOFBAL RIPOT

MANALOS i gat tupela selebresen long wiken bihain long em i autim tupela tim long Sarere na Sande.

Long Sarere, Manalos i wipim ol boi Dolphins 5-2 na long Sande, ol i waraim stret ol boi Malangan 15-1.

Namba tu pitsa bilong Manalos Nelson Kiap i kamapim gutpela pilai stret taim em i sensim pitsa tru, Ismael Marnapal.

Win bilong Manalos i sutim stret em long 21 poin. Em i gat tripela klia poin long tupela tim husat i sindaun long namba tu ples, Gold Cup Gazelle na Alert Security Elcom long 18 poin.

Braun Eagles husat i lus long Gazelle long Sarere 4-0 i winim NGI 6-2 long Sande long holim yet posisen bilong ol long namba foa ples. Ol arapela tim i sindaun olsem NGI 14, MSC 12, AB Bears 10, Tigers 8, Hawks 7, Malangan 2 na Dolphins 2.

Bears tasol i no winim wanpela gem long las wiken. Ol i dro wantaim Tigers 2-2 long Sarere na long Sande ol i dro gen wantaim Gazelle 1-1.

Egens long Gazelle, Bears i putim wanpela strongpela gem stret long pitsa bilong ol, Patrick Pilak.

Tupela tim wantaim i no skoa inap long namba 6 ining taim Oseah Utul i kam hom taim ol AB Bears i mekim wanpela asua ya.

Utul i wokim wanpela bant na winim namba wan bes. Na bihain

bihain Francis Tumbe i paitim wanpela gutpela bal na sotstap bilong Bears Lindsay Pulu i no holim gut na Utul i kam hom.

'Greame Gangloff i bekim dinau bilong Gazelle taim Pulu i paitim wanpela gutpela bant.

Pulu i no kam hom bihain long ol i wokim tri daun ya.

Win bilong Eagles tu i gutpela bikos pitsa Easau Vinarang i paitim wanpela hom ran egens long pitsa bilong NGI Michael Pukai.

Wanpela gutpela gem em namel long MSC na Hawks we Bernard Diap junia i rekotim tasol wanpela ran long win 1-0.

Chris Kavanamur tu i pilai gut long rekotim wanpela hom tasol long helpim Tigers i winim MSC, Elcom winim Hawks 9-2 na NGI i autim Malangan 9-2.



• Willie Boas bilong Malagan i skrep hom long winim bes taim ol i salensim Manalos las Sande. Manalos win 15-1. Photo: BAE KIMALI.

Difens i daunim pawa bilong Harlequins

POT MOSBI YUNION RIPOT

JOE KARUKURU i raitim

DEFENCE i kirapim paia long las minit long winim Harlequins 26-24 long Sevens Kap grenfainel long Bava oval.

Harlequins i gat nem tasol Difens i traim tasol. Bikpela tok amamas long dispela win i mas go long ful tim tasol i gat sampela pilaia olsem John Kondi, Richie Manuta, Chris Kavale na winga James

Miviri i kamapim strongpela pilai stret long tim.

Defence i winim K250 we Invesmen Koperesen bilong Papua Niugini i bin givim olsem prais mani.

Bikpela laik na strong bilong Defence long winim taitel i soim tru taim ol i ran bihain long skoa 12-5 long hap-taim.

Tasol Harlequins i soim olsem em i king bilong yunion long Pot Mosbi taim em i skorim tupela kwik trai na surim skoa i go long 24-5.

Defence i no wari. Ol i pilai na putim het tasol long gem i go inap hatwok bilong ol i karim kaikai.

Ol boi long Murray Bareks i bekim tupela trai long daunim skoa long 24-19. Orait ol i pilai i go na Kondi i lukim wanpela spes na givim siksti i go na putim wanpela trai long levelim skoa 24-24.

Taim em i lainim bal long kikim konvesen, wisel i trai long fultaim. Orait em i mailim gut tru na kikim i go long kisim tupela poin long win 26-24.

Harlequins i mas sutim tok long ol yet long i no putim strongpela difens. Ol i daunim ol boi soldia olsem na ol i kisim taim.

Billy Rapila husat i go pas long Harlequins long putim trai long laik bilong ol yet i no mekim gutpela difens tumas.

Harlequins i winim Telikom 21-12 long semi finales na bihain wilwilim Skailan long kamapim long grenfainel. Na Defence i waraim stret. Biksi Raiders 15-0 na Brothers 19-0 long mesa semi fainels long kamap long fainel gem.

Kain stail save kirapim das long Bisini park

• Olpela pilaia bilong Word Pabliishing Nikuma i pilaia nau wantaim Ilektorel Komisin long Pablik Sevans netbal kompetition long Pot Mosbi. Tim bilong em i win.

• Antap: Ampaia i apim han long soim olsem strait aut

• Raithan: Ol meri long Word Pabliishing netbal tim i traim lak long winim taitel na pilai long divisen wan neks ya.

• Aninit: Fulbek bilong Telikom Gabriel Wampa i pulim bal na abrusim ol pilaia bilong Pot Mosbi Jenerel Hospital long kik resis bilong Pablik Sevans las Sande. Telikom memem stret ol dokta ya 4-0.

• Fulbek bilong NBC i laik traim rausim bal agens long pilala bilong Diwai. Diwai i strong yet na win 1-0.



RABAUW WIMEN SOFBAL RIPOT

Ol mama long Tavui nogut oh!

C-Vui i wok long kirapim yet das long Rabaul wimens sofbal kompetise taim ol i wilwilim stret ol susa long Dodgers 18-3 las wiken.

Tasol Dodgers i autim belhat bilong dispela lus taim ol i

nekim Burma Tigers 7-5 long wanpela gem long apinun.

Planti ol lain long Rabaul i save olsem arapela nem bilong C-Vui em klap bilong ol mama long Tavui ya.

C-Vui i klia lida stret. Bihain long em Burma Tigers, Norths 1 na Manalos, olgeta i sindaun long namba

tu ples wantaim 12 poin. Ol mama long Tavui i win bikos ol lain Dodgers i no paitim gut bal na i no kamapim gutpela pilai long infil eria insat long namba wan na tu inning long rekotim 10-1.

Dodgers i mekim tripela ran tasol i kam long Sera paivu, Miriam Tamean na

Kulmai Paivu bihain long ol birua bilong ol i go long wail na rekotim 18 skoa long winim dispela gem.

C-Vui i save pilai long Kokopo wantaim Is Nu Briten sofbal tasol nau i joinim Rabaul Amata Sofbal kompetisen. Insait long arapela gem, PNGBC lus long

Norths 6-12, Manalos autim Burma Raiders long wanpela poin 11-10.

Ol opisel bilong RASA i tokaut olsem ol meri bai pinis las raun long dispela wiken na bihain bai statim fainel. Ol man bai statim fainel bilong ol long dispela wiken.

Pitsa i holim ki bilong All Stars na Bears

POT MOSBI WIMENS SOFBAL RIPOT

TUPELA pitsa Pat Iwaroi bilong All Stars na Margaret Joseph bilong AB Bears i go pas long win bilong tim bilong ol las Sarere.

Iwaroi i wokim gutpela wok olsem pitsa na All Stars i nekim Mazda Carps 5-0. Orait, Joseph i helpim Bears long wilwilim stret ol susa ya bilong Gold Cup Gazelle 6-0.

Pat i bung gut tru wantaim ketsa, susa bilong em yet, Del

Iwaroi long stapim ol Mazda long skorim poin.

I tru Pat i no save pitsa strong tasol ol pilaia bilong Mazda i save painim hat ru long paitim bal bilong em.

Ol meri Mazda i no konektim gut bal bilong em. Ol i save abrus na paitim bal i go antap we i mekim ol All Star pilaia long ketsim na autim em ya.

Joseph i bung gut tru wantaim ketsa bilong Tessie Komek long autim ol biknem beta bilong Gazelle. Jenny Pilak, Helen Singiat, Ellie Tibe i bin gat sans

taim ol stap long bes tasol em i salim ol i go bek long hom bes. Em i givim ol K2 stret bikos ol meri ya i gat namba long paitim bal ya.

Gazelle i luk olsem bai kisim taim ya taim Bears i gat sikspara arapela rana husat tu i sanap long gem. Bears i angre stret long win olsem na ol i rejistarim wanwan poin long olgeta sikspara ining.

Diane Gideon i plai gut tru na em i rekotim tupela ran na ol arapela ran i kam long Joyce Inguba, Helen Tata, Stephanie Sete na Rachel Yoke. Win

bilong Bears nau i surikim ol i go antap long poin lata. Namba tu tim Wantok i sindaun long namba tu, All Stars na Mazda Carps 11, long namba tri ples.

Anna Wosely i pilai gut tru long sait bilong All Stars. Ol arapela pilaia em Pala Manet, na tupela susa ya Pat na Del Iwaroi.

Royals i no putim wanpela tim na Norths i win.

Poin lata em AB Bears 19, Shell Wantok 13, Vavoline All Stars 11, Mazda Carps 11, Gold Cup Shell 8, Norths 7, Rouna Quarries Royals 2.

Junia lig bai holim nambawan miting

PNGRFL JUNIA LIG RIPOT

NAMBA wan bikpela miting bilong PNG Junia Ragbi Lig bai kamap long dispela wiken long Goroka.

Miting ya em long makim ol eksekutiv bilong junia ragbi lig na tokaut long sponsasip bilong junia lig, em PNGRFL i sainim wantaim Coca Cola Amatil bilong PNG.

Insait long miting, ol bai tokaut long ples bilong anda 17 na anda 19 ragbi lig sempionsip.

Anda 17 bai kamap long wanwan asosiesen bipo long ol i ken resis long zone level na bihain long nesenel level. Long resis bilong nesenel level, em ol top tim long rijen bai resis ya.

Na resis bilong anda 19 bai kamap namel long sempionsip long wanpela hap we PNGRFL bai tokaut long en long bihain taim.

Bosman bilong PNGRFL Developmen opis long Goroka, Kevin Murphy i tok mak bilong sponsasip em i abrusim hap a milien (K500,000). Pati long tokaut long dispela sempionsip bai kamap long Pot Mosbi long Februari 13.

Junia Developmen opisa long Hailens Joe Tokam i tokaut olsem miting ya sapos long kamap long Januari 30. Tasol planti ol asosiesen i no baim afiliesen fi olsem na ol bai holim long dispela wiken.

Tokam i bilip olsem olgeta asosiesen i baim afiliesen fi long PNG Junia Ragbi Lig. Nau yet PNGJRL i gat sikspara senta tasol olsem Wewak, Madang, Tari, Ialibu, Kerowagi na Nondugl.

Em i namba wan taim bilong Kerowagi na Nondugl long afilieset long PNGRFL na tu PNG Junia Ragbi Lig.

Koiari lig baim K500 long joinim PNGJRL

KOIARI LIG RIPOT

KOIARI Ragbi Lig Kaunsil nau i afiliet pinis wantaim Papua Niugini Junia Ragbi Futbol Lig bihain long Koiari Developmen Atoriti i baim K500 i go long PNGRFL.

Charlie Gade, asisten program menesa bilong KDA i givim K500 long Koiari Ragbi Lig Kaunsil em tok, long makim long ol KDA eksekutiv, em i wishim ol kaunsil na ol pilaia long putim tim long PNGRFL.

Siaman bilong KRCL Kennedy Edene i makim maus bilong KRCL na tok amams i go long Gadei.

Mi laikim yu na ol eksekutiv bilong yu long givim dispela helpim, dispela helpim em i bikpela tru olsem na KRCL wok long gat wari long painim mani long rejistresen.

Dispela nau bai opim rot bilong Koiari long trim amamasim ol pilaia bilong em. Dispela em i namba wantaim, Koiari bin memba bilong PNGRFL, long taim ol i stat long lig bilong ol 10-pela yia i go pinis.

Ragbi lig (KJRL) bai stat na tu bai givim sans long ol long patisipet long Nesenel junia sempionsip na helpim bilong Junia Developmen Program bilong refris, kosa, trenna, tim menesa na edministrata bilong ol gem.

Koiari nau yet mekim namba faiv lig long rejista long PNGJRL.

Ol narapela em Kerowagi, Madang, Nondugl, Wewak na Koiari yet.

PNGRFL jenerel menesa Mista Martin Adamson tok amamasim long Koiari long rejistim tim bilong ol.

Em i tok long rejistim junia bilong yu Koiari yupela gat rot em i op long rejistim long senia tim wantaim K1000.



• Dispela kain pilai bilong ol Malangan long autim ol man na ol winim ol Malanos 15-1. long Pot Mosbi men sofbal resis long las wiken. Foto: Bae Kimali.

PMGH i kisim taim long Cellnet

PABLIK SEVANS SOKA RIPOT

HENRY MORABANG i raitim

CELLNET i soim tru pawa bilong en bihain long em i wilwilim stret Commerce 6-0 long bikpela gem bilong pul B long Pablik Sevans kik resis bilong ol man las Sande. Ating ol Cellnet i mas wetim yet skipper Francis

Moiyap long winim dispela gem. Moiyap i bin go malolo tupela wik long Australia na em i kam na kirapim stret skin bilong ol boi Peigtel.

Moiyap yet i sutim wanpela gol, na i setim tupela poro strai-ka bilong em Gabriel Rooney na John Ngahan.

Yangpela Ngahan yet i skorim 4-pela gol.

Dispela gem namel long Cellnet na Commerce i no strong tumas bikos ol boi Cellnet i wok long isi na skorim gol ya.

Arapela gutpela gem tu em namel long Telikom na Pot Mosbi Jenerel Hospital. Ol boi long Telikom Rumana i wilwilim stret ol dokta long haus sik 4-0.

Insait long ol arapela gem, Transport i dro wantaim Elcom 2-2, Health i fofitim ICPNG, Diwai autim PNGBC 2-1, NCC dro wantaim Attorney General 1-1, Police i kisim isi poin long IRC. Na long pul wan, Education i dro wantaim BPNG 0-0, DCA i rausim laisens bilong Air Niugini 1-0, NSO wilwilim DAL 5-1 na

NCDC i dro wantaim Harbours Bot.

I gat sampela liklik tenis long poin lata bihain long dispela gem.

Vais presiden bilong Pablik Sevans Soka Asosiesen Simon Koima i tok olsem 5-pela wik i stap yet na ol fainel bai stat. Olsem na wanem tim husat i gat tingting long win i mas taitim bun ya.

Koima i tok olgeta yia long taim bilong fainel, kompetisen i save strong tru.

LFA bai stat long wiken

LAE Futbol Asosiesen (LFA) bai statim pri-sisen soka kompetisen bilong em long dispela wiken.

Vais presiden teknikal John Peka i tok olsem ol i statim pri-sison bilong ol kwik long wanem kalenda bilong ol long dispela yia i tait stret.

Dispela em long wanem bai i gat Hailans/Momase klab sempionsip long mun Mas 5-7, 99. Na tu wokabaut bilong Momase skwat i go long Jayapura long Ogas 16-19.

Peka i tok, "Pri-sisen resis bai

stap inap log tupela wiken stat long dispela wik na pinis long Februari 15."

Saming olsem 19 tim i soim laik long pilai insait long dispela resis. Tim bilong ol man em 13 na 6-pela bilong ol meri, em i tok.

Ol tim bilong ol man bai pilai long raun robin sistem. Tupela top tim long wanwan pul bai salens, long fainols.

Pul bilong ol man i gat 3-pela puls. Log pul wan em Mopi, West, Topiak, Ara na Borabora. Long pul tu, Faze, Goro, Hapapu na pul (3),

Blu Kumuls, Tolec Buresong, Mitif and Wastai.

Long resis bilong ol meri ol top 4 tim em bai go het long fainols. Ol tim bilong meri em, Bara, Blu Kumuls, Mopi, Poro, Goro na Nadzab.

Peka tok tu olsem klab afilases fi em open nau we sinia em K70 na junia K50, pilaia rejista fi i sanap olsem sinia K10 na junia K5 long wan wan pilaia.

Olgeta fi mas baim i go LFA akun namba 507407 ANZ Beng, Lae.

Mommers bai holim wok yet bilong FIFA


HENRY MORABANG i raitim

PRESIDEN bilong Papua Niugini Futbol Asosiesen Peter Mommers bai holim yet wok olsem siaman bilong Osenia Wimens komiti maski em i lus long ileksen.

Dispela em i toktok bilong presiden bilong Osenia Futbol Konfederesen (OFC) Charles Dempsey CBE.

Mista Dempsey i mekim dispela tok klia olsem Mommers i siaman bilong wimens komiti bilong OFC.

"Long pasin bilong FIFA na OFC, taim ol i makim wanpela eksekutiv long taim bilong em, em bai stap inap taim bilong em i pinis. Mommers i gat 4-pela yia olsem



• PNGFA presiden Peter Mommers.

siaman olsem na em bai stap yet olsem presiden bilong wimens

komiti," Dempsey i tok.

Bos bilong OFC i kliaim tok bihain long sampela paul toktok i kamap olsem Mommers bai lusim olgeta wok em i mekim long OFC na FIFA.

Bikpela wok bilong Mommers em long sindaun insait long Wimens Kongres bai kamap long Los Angeles. Semtaim tu, bikpela Wol Kap kik resis bilong ol meri tu bai kamap long dispela hap.

Wanpela bikpela wok bilong siaman bilong OFC em long kirapim wok bilong yut kik resis bilong ol meri.

Dempsey i tok ol meri tu i gat wok long soka fil taim ol i lusim haus kuk. Olsem na OFC na FIFA tu i gat spes long helpim soka bilong ol meri long kamap strong.



• Gol difenda bilong Coca Cola Caroline Lahari i painim poro long pasim bal long Praivet Kampani netbal kompetisen.

Bai gat soka kompetisen long Lahi o nogat?

BIKPELA wari i wok long kisim ol klab husat bai pilai insait long resis bilong Lahi Soka Asosiasen long dispela sisen.

Toktok i wok long go raun olsem Lahi Soka Asosiasen i nogat mani long ronim kompetisen bilong em long dispela yia.

Dispela long wanem ol klab menesmen na ol pilaia i no kisim toksave long ol eksekutiv bilong asosiasen we bai i gat resis na ol i no singaut long AGM bilong ol tu.

Wanpela sinia kosa husat i no laik givim nem i tok olsem i no bin gat wanpela AGM bilong asosiasen tasol ol i kirap nogut long lukim long pepa olsem Lahi i pes long baim afiliasen i go long PNGFA.

Em i tok, "nogat AGM na olsem wanem Lahi i baim fi hariap na tu mipela i no bung na pasim toktok long makim kendidet bilong

mipela long dispela PNGFA ileksen bilong presiden.

Long sampela tok win i kisim mipela, Lahi i givim sapot long PMSA long kendidet bilong ol Andrew Madia. Dispela i no gutpela long wanem i nogat AGM na em i no kendidet bilong mipela tu," em i tok.

Long wankain taim yet, tok win i wok long go het olsem, taim na de bilong baim afiliasen fi long vot long PNGFA jeneral ileksen i surik i go moa long arapela taim.

Long dispela taim tu em Momase/Hailans blok i strong yet long rausim olpela eksekutiv na votim nupela. Ol i bilip olsem ol i gat namba na baim pinis hap fi we PNGFA i makim long em long vot.

Ileksen bilong nupela eksekutiv bilong PNGFA bai kamap long Februari 27, 1999.

LFA redi long holim Hailans soka fainels

FRANCO NEBAS i raitim

LAE Futbol Soka Asosiesen (LFA), i redi tasol long holim fainols bilong Hailans Soka Klab kompetisen long Mas.

Dispela Hailans sempionship em i open resis we ol klabs long Hailans na Lae i resis long winim bikpela prais mani.

Kain resis olsem em nambawan taim i kamap we i winim ol arapela tonamen bilong PNGFA i gat bikpela prais mani long winim.

Bihain long samting olsem 6-pela wiken i go pinis long dispela kompetisen em ol tims we i sambai long go fainels em, Momads (Hagen) Blu Kumuls (Wabag), Karlem (Hagen), Elcom (Wabag), Blu Kumuls (Hagen) na Drifters (Hagen) long ol man.

Bilong ol meri, Teachcom (Wabag), Blu Kumuls (Wabag), Telikom (Goroka), na Pascol (Hagen).

Long dispela wiken bai lukim ol las gems na fainels bai kik op long Mas 5-7 long LFA Pak long Lae.

Tupela klab long Lae husat tu resis long dispela resis Poro na Buresong i makim pinis ol oge-naising komiti long kamap bilong dispela fainels.

Ol lain husat i stap olsem opisels long dispela komiti em, John Peka (trenspot), Nelson Wension (sekyuriti/presentesen), Peter Nime (Gate tiket), Augustine Guarin (sektari/media) na James Kasi na Sampson Bonai (Nius Tim).

Sektari bilong dispeal komiti Augustine Guarin i tok, olsem ol komiti i wok long wok hat tru long stretim ol samting long holim dispela fainols.

Em i tok, "ol wok long go het na olgeta samting bai redi long dispela taim bilong fainels."

Long wankain taim yet, em lokel LFA pri-sisen kompetisen bai kik op long dispeal wiken.

TOKSAVE

Telikom soka klab

■ TOKSAVE i go long olgeta ol olpela na nupela pilaia bilong Telikom Soka Klab olsem trening bilong yupela i stat pinis.

Ples bilong trening em St. Martin fil beksait long olpela edmin hostel.

De bilong trening em, Monde, Trinde na Fraide long moa toksave kolim Joe Exton o Gidix Nasa long 472-1797.

Poro soka klab

■ Poro Soka Klab husat i resis long LFA kompetisen i laikim ol meri long pilai long klab bilong ol.

Poro em wanpela nambawan klab long LFA husat nau tu i resis long Hailans Soka Klab sempionship na i wok long ron antap long fil bilong ol.

Sapos yu husat meri i gat laik long pilai soka em Poro Soka Klab tasol em i nambawan ol i save trening long St. Martin fil long Tunde Fonde na Fraide.

Long moa toksave ringim kosa Peter Nime long 473-1618 o Augustine Guarin long 472-2117.

Guria soka klab

■ DISPELA toksave i go long ol olpela na nupela pilaia bilong Guria Soka Klab long Lahi Soka Asosiasen olsem trening bilong yupela i stat pinis long Tunde.

Trening de em Tunde, Trinde na Fonde long Scout fil taim bilong stat trening em 5pm. Sapos yu laikim moa toktok kolim kosa Richard Nagai long 472-3316, Eddie Fred - 472-3719 o klab menesa John B. Kelly long 472-4283.

Wes Nu Briten Sevings na Lons Sosaiti bai op bek

WES NU Briten Sevings na Lons Sosaiti bai op bek gen long neks mun, bihain long em i bin pas insait long sikspela krismas.

Sosaiti i bin save wok gut long 1970s na 1980s tasol i bin pas long yia 1993 bikos long hevi bilong wok edministresen na paulim mani.

Ripot i kam long provins i tok Provinsal gavman i laik kirapim bek Sosaiti bikos em i lukim olsem em i gutpela rot long helpim ol grasrut pipel bilong ples. Ripot i tok as long Sosaiti em long helpim ol pipel i putim liklik sevings bilong ol na tu long kisim dinau mani bilong helpim ol wantaim skul fi na ol liklik wok projek we ol i laik kirapim insait long ples na komyuniti.

Ol komesel beng i no save givim gutpela helpim long ol grasrut pipel na sosaiti em i wanpela gutpela rot long ol pipel long kisim helpim long en, ripot i tok. Long las yia, ol toktok long kirapim sosaiti i bin kamap tasol Provinsal Gavman i wok long painim mani long karimaut dispela wok.

Deputi Gavana bilong Beng ov PNG Wilson Kamit i bin givim tok orait long kirapim bek Sosaiti.

Siaman bilong Ikonmik Sevis long Wes Nu Briten Provinsal gavman Lucas Waka i tok em i no isipela samting long Gavman long kirapim bek Sosaiti, tasol ol i lukim bikpela laik bilong ol pipel na ol i painim mani long mekim dispela wok ya.

Wes Nu Briten Provinsal Asembli long wanpela spesel sindaun bilong em las wik i bin pasim toktok long lonsim bek Sosaiti long Mas 24.

Provinsal baset i bin katim K150,000 bilong dispela wok, tasol antap long en ol i laikim K50,000.

Ripot i tok Provinsal Eksekutiv Kaunsil i bin wokim disisen long asembli i aplai long dispela mani long Kandrien Distrik haus sik projek fan. Projek i gat K200,000 long en.

Dispela mani, ripot i tok, em ol i oraitim pinis tasol Provinsal Gavman bai i bekim wantaim tras fan mani em i kisim long Nu Briten Pam Oil Limitit kampani.

Gutpela lidasip kamapim divelopmen long Is Nu Briten

WALTER DARIUS i raitim

MINISTA bilong Fiseris Sir Mekere Morauta i bin strongim ol provinsal na nesanel lida bilong Is Nu Briten long go het long wok bilong go pas na gaidim kantri, olsem tasol ol i bin wok long mekim insait long laspela 20 krismas. Sir Mekere i bin autim dispela toktok i no long taim i go pinis, long wanpela bung we i bin kamap long ples Salel insait long Pomio distrik. Gavana Francis

Koimanrea i bin askim Sir Mekere long stap insait long 34 anivesari selebresen long amamasim Pomio/Kivung Asosiesen na bikpela kaikai na ol piple bilong ples Salel, asples bilong Gavana, i bin putim kamap bikpela kaikai na ol singsing tumbuna.

Em i tok Is Nu Briten i gat nem long kamapim planti gutpela lida long provins na kantri. Na long dispela taim, taim planti provins i bungim ol hevi long go hetim na mekim ol wok kamap, bikos ol lida na pipel i no save wok gut bung wantaim, Is Nu

Briten i laki long gat ol gutpela lida long stiaim gut provins.

Em bin tok planti ol arapela provins i lukluk long Is Nu Briten long gutpela stia long lukautim ol provins bilong ol. Na em bin strongim ol pipel long go het na wok gut wantaim ol lida bilong ol.

Sir Mekere i tok maski PNG i bin kisim politikel independens long 23 krismas i go pinis, nogat bikpela wok i kamap long sait bilong trupela ikonmik divelopmen. Olsem na em bin tok long sait bilong ikonmik wok mani, PNG i gat longpela rot yet long go long en. Em bin tok i no Gavman tasol i save kamapim ikonmik divelopmen tasol ol pipel tu i mas wok na helpim long dispela wok. Tasol em i tok long wankain taim tu, Gavman na ol arapela divelopmen ejensi i mas helpim ol pipel.


"Olsem ol lida, yumi mas kamapim ol rot long ol pipel bilong yumi i ken kamapim ol wok na helpim wok divelopmen insait long kantri. "Is Nu Briten i gat planti gutpela samting long en na em i laikim ol gutpela polisi, ol gutpela lida husat i gat strongpela tingting long helpim ol pipel bilong ol.

"Provins i gat wok yet bilong go pas na givim gutpela stia long kantri. Bikpela samting em mi strongim yupela long wok bung wantaim," Sir Mekere i bin tok.

Gavana Sir Silas Atopare long las yia i bin wokim wankain toktok taim em bin wokim wanpela lukluk raun i go long provins las yia. Em bin tok Is Nu Briten i ken kamap olsem lida long soim gutpela piksa insait long kantri bikos em gat gutpela lidasip we i save wok gut wantaim Gavman, ol praivet sekta na pipel long planti krismas.



• Ol pipel bilong Midiba ples insait long Madang provins i painim wanpela pikinini pik long bel bilong mama pik i gat 6-pela lek. Foto: Margaret Munjin.

 **TOYOTA**
DYNA

OL STRONGPELA TRAK I WOK OLTAIM

Ol i wokim Dyna trak i strongpela inap ol kain hevi bilong PNG yet. I gat ol kain Toyota Dyna trak bilong ronim bisnis na i gat planti gutpela kain kain trak na ol kain trak bilong fitim stret tintin bilong yu. Ela Motors Toyota Parts tru na Gutpela Sevis i sanap baksait bilong givim helpim, na yu inap save Toyota Dyna bai i helpim yu ol taim.

Ela Motors
 **TOYOTA**
COMMERCIALS

PORT MORESBY 3229400 • LAE 4722322 • KOKOPO 9829100 • RABAU 9829188 • MADANG 8522188 • GOROKA 7321844
MT HAGEN 5421888 • WEWAK 8562255 • KAVIENG 9842132 • KIMBE 9835155 • TABUBIL 5489060 • VANIMO 8571254
PORGERA 5479367 • KUTUBU 5496685 • BUKA 9839915 • LIHIR. 9864099 • ALOTAU 6410100

Presiden Clinton gat bikpela sans long stap long sia



• Loya Cheryl Mills i wokabut i go insait long kot rum.

• **LEPHAN - AMERICA:** CHERYL MILLS wantaim 33 krismas, wanpela blekmeri na smatpela loya bilong Presiden Bill Clinton bilong Amerika i kamap long namba tu de bilong kot.

Kot i sindaun long harim sas bilong Presiden Clinton long em i mekim rong taim em bin wokim prenpasin wantaim Monica Lewinsky, wanpela wokmeri long Wait Haus, palamen (haus) bilong Amerika.

Dispela kot i bai lukim sapos Presiden Clinton i raus o i stap long sia olsem lida bilong ol pipel bilong Amerika.

Planti bikman long palamen o Senet bilong Amerika i bin aiwara taim ol loya, we Mis Mills i wanpela long ol, i sanap na autim ol toktok bilong ol long dispela trail kot.

Loya Mis Mills i bin givim wanpela strongpela na gutpela toktok long sapatim sait bilong Mista Clinton. Em bin glasim Mista Clinton long wankain lida olsem ol biknem lida long Amerika olsem John F. Kennedy na Martin Luther Junia.

"Yumi luksave long ol, maski ol i wokim sampela asua, ol bin wokim planti gutpela samting long helpim ol pipel bilong ol na wol tu," Mis Cheryl i bin tok.

Em bin tok pasin we Mista Clinton i bin wokim i no gutpela tumas tasol em no wanpela kriminel rong. Dispela em i namba tri wik long trail kot bilong Presiden Clinton na i luk olsem bai no inap lusim sia.

Senet kot i mas gat 67 vot long rausim em (Presiden Clinton) tasol long wanpela vot we ol bin kisim long stat bilong dispela wik, ol vot i go olsem 54 i egensim em na 44 i sapatim em. Senet i no laik rausim sas we ol i sutim long Mista Clinton olsem em i wokim bikpela rong long traim haitim na giaman taim em bin wokim dispela prenpasin wantaim Mis Lewinsky. Nau Senet i askim tripela pipel long givim gen ol toktok bilong ol. Em long Mis Lewinsky yet, pren bilong presiden em Vernon Jordan na narapela wokman long Wait Haus, Sidney Blumenthal.

Poto i kam long Daily Telegraph

Hevi long Great Barrier Rif

GREAT BARRIER REEF, AUSTRALIA: Great Barrier Rif em dispela bikpela rif long Kwinslen namel long Australia na PNG. Nogut poto i kamap long dispela rif we i gat bikpela liksave long wol olsem wanpela bikpela na naispela rif wantaim ol kain pis, sei na plents bilong solwara long en. Long las wik, rif ya i kisim nem olsem namba wan bagarap ples long ol solwara hap. Wanpela 12 mun wok stadi we Wol Wide Fund (WWF) for Netja i bin karimaut i soim samting olsem ol save

tromolm 22 milien ton pipia na fetalaisa long Great Barrier Rif long wan wan krismas. Konsevesen Dairekta bilong WWF Ray Nias i tok gutpela wok bung i nas stap namel long Kwinslen na Federel Gavman long sevim dispela rif. Great Barrier Rif i bin kamap olsem namba wan long ol marin eria long Australia we i gat bikpela bagarap long en. Dokta Nias i tok pasin we ol i save tromolm ol agrikalsa kemikol i wok long bagarapim rif tru ya.

Yangpela Sientis kisim luksave na winim namba olsem "Young Australian" bilong yia.



• **Dokta Bryan Gaensler**

AUSTRALIA: YANGPELA SAIENTIS bilong Australia, Bryan Gaensler husat i gat 25 krismas i winim awod olsem "Young Australian of the Year" winim ol arapela wantok bilong em, sampela em ol biknem lain. Dokta Gaensler em i wanpela saientis bilong Sidni na em i wok wantaim NASA long Amerika. Samting we

em i kisim luksave long en em wanpela wok risesem bin kari-maut long ol sta we i save pondan. Long wok rises, em bin painaut olsem olgeta sta i save poin o lukluk i go long wanpela rot tasol na dispela em long "magnetik not pol" poin long galeksi o rot bilong ol sta. Em i tok em i save laikim tru ol poto

bilong Star Trek na dispela i bin skruim tingting bilong em long kamap olsem wanpela saientis. Em tok taim em i liklik yet, em i save laikim tru program na em i save luklukim long vidio bilong papa bilong em. Em i gat ol Star Trek uniform bilong em yet tu yal Tasol maski em i wanpela strongpela sapota bilong Star Trekk na em i wok long NASA, em i tok em nogat bikpela tingting long raun long spes. Em i tok em laik yusim awod o prais long mekim ol pikinini Australia i laikim saiens na sutim tingting bilong ol long saiens.

Em i tok ol saientis em ol bikpela pikinini tasol na ol i tok olgeta pikinini em mama i karim em ol olsem saientis bikos long olgeta taim, ol laik save long ol samting na ol i askim "watpo" na ol samting ol olsem. Em i tok taim em i liklik, em save gat bikpela laik long ol sta na ol arapela samting long skai tasol em no bin save olsem em ken kamap olsem wanpela saientis bilong dispela samting long Australia. Dokta Gaensler i bin winim tu prais olsem "Young Australian of the Year Saisens" prais.

Poto na stori i kam long Daily Telegraph

Irak singaut long ol Arab kantri long egensim Amerika na Briten



• **Presiden Saddam Hussein**

BAGHDAD IRAK - Iraq i sanap na tok strong long yusim olgeta rot long paitim Amerika husat long dispela taim i karimaut balus kempein long en (Iraq).

Olsem na ol palamen memba bilong Iraq i singaut ol pipel long ol arapela Arab kantri olsem Kuwait na

Saudi Arabia we gavman bilong ol i save pren wantaim Amerika na Inglen na larim ol i yusim ol ea beis bilong ol long egensim ol dispela gavman. Gavman bilong Saddam Hussein i singaut tu long ol arapela Arab kantri long rausim tambu na go egensim pait we Amerika na Briten i karimaut long Iraq na "no fall" zon ol i putim long hap we ol balus i ron long en.

Difens Minista bilong Kuwait, Sheikh Salem El-Sabah i tok dispela toktok we Iraq i mekim long ol neiba bilong em em no laspela tasol gavman bilong Kuwait bai sanap strong long lukautim kantri na pipel bilong em.

Las wik long Tunde, ol paita balus bilong Amerika na Briten we i bin wok long patrolim ol no flai eriana wanpela misail i bin kilim dai 11-pela pipel long ples ol i kolim long Basra.

Stet Seketeri bilong Amerika, Madeleine Allbright long wanpela bung long Cairo, Ijip wantaim Presiden Hosni Mubarak, i bin tok Amerika i no laik yusim fos tasol em i laikim Presiden Hussein long bihainim ol lo insait long Yunaitet Nesens Sekyuriti Kaunsil resolusen.

Indonesia lukluk long givim independens long Is Timor

YUNAITED NESENS, NU YOK - YUNAITET NESENS i kirap nogut long ofa bilong Indonesia olsem em bai lukluk long givim independens long Is Timor.

Portugal, kantri we i bin lukautim Is Timor bifo long Indonesia i tekova i bin holim toktok wantaim Indonesia long ol dispela samting aninit long was bilong Yunaitet Nesens.

Infomesen Minista Yunus Yoshfiah long las wik i bin tokaut long dispela samting bihain long Portugal na Indonesia i bin kirapim ol toktok na Yunaitet Nesens i kodinetim na was long tupela kantri i karimaut ol toktok. Long ol ripot, Mista Yoshfiah i bin tok sapos planti pipel long Is Timor i egensim pasin long gavman

bilong Indonesia i givim moa pawa long en (Is Timor), gavman long Jun bai sindaun long rausim pawa we insait long 20 krismas, Indonesia i kisim Is Timor na mekim olsem wanpela provins bilong em.

Yunaitet Nesens Seketeri Kofi Annan wantaim man i makim Is Timor long UN, Jamsheed Marker i no bin kisim wanpela toktok long dispela samting bipo Indonesia i tokaut long dispela tingting bilong em. ol opisal bilong UN na Portugal bai kisim ol kliapela toktok long dispela samting long Indonesia na samting ya bai i stap long top lista long UN agenda.

Ol pipel bilong Is Timor em ol i lain bilong Lotu Katolik na i bin stap aninit


long lukaut bilong Portugal taim Indonesia i bin tekova long ailan ya long 1975. Portugal i no klii olsem dispela em nupela polisi Indonesia i laik kamapim long Is Timor o nupela rot tasol long go hetim olpela samting we em i save toktok long en.

Inap i kam nau, Jakarta i save tok nogat na nogat olgeta long givim tingting long laik bilong ol Is Timor pipel husat i laikim independens. Planti lain olsem biknem Nobel Prais wina na Katolik Sios lida bilong Is Timor, Bisop Jose Ramos Horta i tok ol bai i wet, stap isi na lukim sapos ol dispela toktok we Indonesia i mekim em i tru. I gat ol ripot tu olsem

Indonesia bai lusim i go fri na putim long haus ares o kalabus tasol lida husat i go pas long grup bilong Is Timor husat i pait wantaim Indonesia long ailan (Is Timor) i bruk lus na kisim independens, Xanana Gusmao.

Long 1992, ami na gavman bilong Indonesia i bin kalabusim Gusmao long 20 krismas long sas bilong pait egensim gavman (bilong Indonesia).

Ol ripot i tok Gusmao i tok em i gat bikpela wok yet long mekim insait long wok politik bilong Is Timor na em i laik stap insait long ol senis na toktok we i sut long ailan bilong em nau.



PNG

BUSINESS

ISSUE NO: 304

FEBRUARY, 1999

PAGES 28

70t

1999
What's in store!



J.P. 1999!

FEBRUARY *Issue*
I stap long salim Nau!

LAI PSTAIL

Rispektim laip God i givim

STEVEN GIMBO i raitim

WANPELA man i gat bikpela mani na pawa na tu planti meri i save i gat laik long em. Em i ris tru. Em i gat planti kainkain ka, bot, hos, motobaik, na haus. Em i ken kisim wanem meri em i laik long en. Na em i ken mekim wanem samting em i laik long en bikos em i gat mani na dispela mani i givim em pawa na biknem.

Na em i wanpela wel man stret. Yu save spak, pamuk, kisim strongpela drag, na ol arapela pasin nogut. Em i go het long dispela kain laipstail bilong em i go inap long wanpela taim nogut.

Long wanpela taim em i pilim sik liklik na em i go lukim dokta bilong em tasol dokta i no inap long painimaut stret sapos em i kisim wanem kain sik. Olsem na dokta i givim em sampela kus na het-pen marasin, na i salim em i go long slip na malolo. Tasol em i no pilim orait. Em i painim olsem bodi bilong em i les long kaikai. Na em i pilim ai raun. Orait em i go lukim dokta gen na dokta i kisim blut bilong em long sekim.


Long apinun, dokta i ringim. ".....ah, Sir, mi laik tokim yu olsem, ah, yu i gat binatang HIV insait long blut bilong yu. Ah.....olsem na yu mas....." Turangu baga man ya i no inap long bilip! Kirap nogut i kisim em. Em blekaut olgeta.

Dispela ris man ya i tingting planti olsem: "AIDS! AIDS! Ah, mi no bilip. Mi bikman tumas, mi bikpela man tumas long kisim disela kain sik. AIDS? Ating dokta i mas mekim sampela asua na miksim ol blut bilong narapela long nem bilong mi."

Tasol dokta i tokim em gen olsem em i gat Binatang HIV bilong dispela sik AIDS!

"AIDS? Wai mi? AIDS i no laik kalap i go long ol narapela, wai mi? Aids i no laik kalap i go long ol pipia manmeri nabaut ya, wai na mi? Husat tru i givim AIDS long mi? Dispela meri las wik yah... Wanem nem bilong em? Mi lus tingting pinis! O narapela bilong pastaim yah. Insait long wanpela wik mi i slip wantaim 4-pela meri ya na husat tru i givim mi dispela sik. Nogut mi kisim long ol narapela meri pastaim mi bin siip wantaim ol? Man, dokta i no laik toktok gut na bai mi ken save."

Tasol em tu leit! Na em i save olsem em bai indai olsem na em i no laik indai nating. Em i belhat bikos wanpela meri i givim em dispela sik olsem na em tu i laik givim long planti arapela yangpela meri bai ol tu i dai olsem em. (Ol dispela yangpela meri tu bai givim i go long narapela bipo long ol i dai sapos ol i no save olsem ol i gat dispela sik).



Dispela man i les long em wanpela i dai. Olsem na em go het long mekim pasin pamuk. Em i slip wantaim planti yangpela meri na i givim ol dispela sik. Na nau em i go het long mekim ol dispela pasin. Olsem na sapos yu wanpela yangpela meri na wanpela mani man o ol arapela kain man nabaut i laik kam kisim yu go long hotel o wanem hap, maski, nogut em dispela man mi stori long en.

Yu bilip long dispela stori, ah? Sapos yu bilip orait yu mas putim dispela stori long het bilong yu olgeta taim na tirigim gut. Dispela stori em i no trupela stori, tasol wankain samting i save kamap tete long olgeta hap bilong wel.

Wanem as tingting bilong dispela stori bilong mi? As tingting bilong dispela stori

em i olsem: Yumi olgeta manmeri i ken kisim sik AIDS sapos yumi i no lukautim yumi yet gut. Sik AIDS i no inap kea sapos yu wanpela King, o Maniman, o Praim Minista, o Ragbi Star, o Musik Star, o Muvi Star. Sik AIDS bai i no inap kea tu sapos yu wanpela yangpela skul manki o meri wantaim naispela pes olsem bilong ol angelo, o wanpela trangu man o meri, o wanpela papa bilong 10-pela pikinini. Sik AIDS em i no inap kea long yumi olgeta.

Olsem na yumi ol manmeri i mas kea na lavim ol arapela manmeri. Long lav na kea bilong yumi, yumi i mas helpim yumi yet na ol arapela long abrusim na tu helpim ol lain husat i gat dispela sik nogut. Long ol pasin yumi save mekim, yumi i mas senisim na traim long mekim

• Antap: Wanpela soim bilong sik Aids kempen i soim ol manmeri long yusim kondom

• Lephan: Ol wokmanmeri bilong huas sik i redim ol progrem bilong karim aut Aids kempen.

• Aninit lephan: Wanpela yut grup insait long Mosbi siti i kamapim wanpela pilai long hau man i save kisim Aids na bihain dai long dispela sik nogut.

ol samting we bai i ken stopim sik long kalap long yumi na ol narapela. Sik i ken kalap long yumi long asua bilong yumi yet o long asua bilong ol arapela. Em mi minim olsem sik i ken kalap long yumi sapos yumi mekim pasin pamuk nabaut o sapos yumi i kisim blut long haus sik we ol i no sekim gut o sapos yumi yusim ol sap resa em narapela husat i gat dispela-sik i bin yusim pinis.

Tasol bikpela samting yumi olgeta mi mas tingim em olsem: Sapos wanpela man o meri i kisim dispela sik, orait long gutpela Kristen pasin ol i noken traim long givim sik i go long arapela. Dispela em bikos taim wanpela man o meri husat i save olsem em i gat sik AIDS na i givim i go long narapela orait em yet i save olsem em i kilim dispela man o meri.

Em i noken mekim dispela pasin, tasol em i mas go kisim kaunsil na helpim long ol planti sios ejensi, medikel o ol bikpela haus sik klostu long em. Ol i ken helpim em.

Yumi olgeta i pikinini bilong God. Sapos yumi bihainim tru ol pasin God yet i laikim long en orait bai yumi i no inap long kisim dispela sik nogut, ol narapela bagarap tu. Na tu God i no laik bai yumi bagarapim ol arapela manmeri. Taim yumi bagarapim ol arapela em yumi bagarapim ol lain bilong God yet. Kain pasin olsem long givim sik AIDS i go long narapela taim wanpela i save olsem em i gat AIDS. Taim dispela man o meri i save yet na i givim sik AIDS long narapela orait em i kilim dispela arapela. Dispela man o meri i save olsem sik AIDS i nogat marasin tasol em i givim sik nogut long narapela na bai arapela ya tu bai indai bihain.

Dispela em i no gutpela pasin bikos yumi i mas rispektim laip bilong yumi yet na bilong ol arapela. Em dispela laip em, God yet i givim long yumi. Wanem samting ol manmeri wantaim dispela sik nogut i ken mekim em long kisim kaunsil na long prea na givim laip bilong ol i go long bikpela. God yet i save helpim ol lain husat i bilip long em. Yumi i mas putim laip bilong yumi long han bilong em.

Yu tumbuna bilong graun

YU SAVE olsem yu gat planti bilien kina sevins long laip bilong yu o nogat? Sapos yu guria long dispela askim, stap isi bikos yu gat wanpela samting i winim olgeta mani long wol.

Dispela samting i mekim yu wanpela bilienia long Papua Niugini. Planti ol pipel i save ting, ol i tarangu bikos ol i nogat mani.

Taim ol i no gat mani, bai ol i no inap long baim ol bikpela samting olsem ol ka, TV, redio na tu ol klos na ol naisplela bilas bilong haus. Em sampela samting ol lain long taun na siti i ken tingim.

Ol lain long ples stret bai tingting long ol samting olsem kolmen lam, spet, naip, akis, ol klos na ol samting bilong slip olsem blanket na pilo.

Ol famili long ples na taun bai tingtim ol dispela samting tasol planti taim bai ol i sot long mani long baim.

Sampela lain bai i no inap long kisim wanpela bilong ol dispela ol kago bikos K10 o K20 em bikpela mani.

Taim yu nogat mani, yu save ting yu wanpela tarangu man o meri.

Dispela tingting i tru na i no tru wantaim. I tru bikos yu lukim sampela lain i gat planti samting we yu yet i nogat. I no tru bikos, mani i no olgeta samting long laip bilong yu.

Long PNG, yu no nidim mani long stap laip. Ol tumbuna bilong yu bipo i nogat dispela samting yumi kolim mani tasol ol i bin stap. Ol i no sot long wanpela samting long laip bilong ol.

Ol kantri olsem India, planti lain i nogat mani na kaikai na ol i save kam aut long bik rot na ol stua long askim ol pablik long kisim ol kaikai o mani. Planti bilong ol tu i save dai long hangre na pundaun nambaut long ol rot na haiwe.

Long PNG, dispela kain pasin bilong askim ol pablik long mani na kaikai i wok long kamap bikpela long ol taun na siti. Tasol i nogat wanpela ripot olsem wanpela kain lain olsem i bin dai long hangre.

Yu ating i no save olsem yu gat wanpela bikpela presen long laip bilong yu. Dispela presen em graun bilong yu. Long graun i gat bus bilong yu, i gat diwai bilong yu, yu gat wara, yu gat kainkain abus na planti planti samting

PETER MAIME i raitim

moa.

Graun bilong yu em olsem mama bilong yu. Em i ken givim yu kaikai na em i ken givim yu wara. Yu gat kainkain binatang long graun, yu gat kainkain kumu na sayor, yu gat bus marasin long oraitim sik bilong yu, yu bai gat diwai bilong mekim ol haus na tu paia wut bilong paia. Yu yet nau, yu rabis o yu ris.

Ol kantri olsem Saina, planti famili i nogat graun bilong ol long wokim gaden. Ol i nogat spes arere long haus bilong ol long ol pikinini i ken pilai nabaut.

Planti bilong ol dispela kain famili i save stap long plet o rum long ol dabol stori haus.

Ol ripot tu i tok olsem sampela lain long Saina i save pulamapim ol graun i go antap long haus bilong ol na planim sampela ol kaikai olsem anion na tomato.

Tude long PNG, planti manmeri i wok long kam long ol bikples olsem Mosbi na Lae. Planti i save kam long panim wok na mani. Ol pipel i lukim olsem laip long taun i isi na nais.

Long Mosbi, ol ples arere long siti i pulap long ol setelmen. Sapos yu bin stap long Mosbi longpela taim, yu ken tok olsem ol setelmen i nau kamap bikpela na surik i go moa yet na kisim ol nupela graun.

Ol gavman opis na ol kampani i nogat inap wok long kisim olgeta lain husat i kam long taun. Sampela lain i kam wantaim ol famili bilong ol. Taim ol famili i kam long taun, ol i kisim bel bilong ol i kam na mas kaikai na stap.

Sapos wanpela memba bilong famili i no panim wok, dispela i ken givim hevi. Taun i no olsem ples bai yu go panim kaikai isi

long gaden.

Olsem na planti lain i save stap long strong bilong salim buai, daka na lus simok long rot. Sampela manmeri na pikinini i save bungim emti botol o tin ken long panim sampela makmak.

Taun na siti laip i no isi olsem ol planti lain i save tingim. Taun em ples bilong ol mani lain. Yu mas gat mani long stap. Sapos nogat, bai yu indai.

Ol samting long stua, prais em antap tumas. Skul fi em antap tumas. Olgeta samting, pe i antap tru.

Long ples, yu save kisim fri wara, long taun bai yu baim. Long ples, yu ken baim planti kaikai long maket wantaim K2, tasol long Mosbi em bilong wanpela samting tasol.

Yu tu bai baim pawa, ol pipia yu tromoi long siti kaunsel long rausim na ol haus rent.

Sapos yu wanpela wokman o meri na taim yu tingim ol dispela samting, bai skin bilong yu i pen bikos pe bilong yu long foitnait bai ron nating.

Ol lain i stap long ples i save dring klipela wara, kisim ol gutpela kaikai na save slip long ol naispela haus.

Planti ol wel na maining kampani husat i kam wok long PNG i givim bikpela bagarap long ol graun, bus na wara.

Ol wara i wok long drai, ol bus i kamap ples waitan na ol graun i nogat gris long planim ol kaikai.

Taim yu lukim dispela kain bagarap wantaim ol win mani ol papa graun i save kisim, ol dispela kain mani i no winim ol bagarap i kamap. Olsem na yu ken tingim, bilong wanem na Francis Ona i bin singaut long CRA, mama kampani bilong Bogenvil Kopa Main long baim ol papa graun K10 bilien.

Graun em tumora bilong yu. Kaunim hamas tumbuna bilong

• Wan Toea, Tu Toea tasol... dispela em i singaut bilong baka ya wantaim tin bilong em long pulapim mani long ol strit bilong Mosbi siti.



yu i bin stap na i givim long han bilong yu dispela graun yu nau i stap long en.

Hamas tumbuna bilong yu bai sindaun long dispela graun bihai? Inap yu tingim ol?

Planti ol wok manmeri nau stap long taun bai go bek long ples bilong ol taim ol i retai o resain. Taim ol i go bek, graun bilong ol bai lukautim ol.

Taim yu tok, yu sot long mani na kaikai, yu no sot olsem ol lain long India na Saina. Yu gat graun i stap. Em laip bilong yu. Lukautim graun na bus bilong yu.

Holim pasim bikos em bilien kina sevins bilong yu. Yu wanpela bilienia bilong wol. Ol tumbuna i bin givim long yu, yu bai givim long ol tumbuna bilong yu.

Long las krismas, 42 yangpela man bilong Kilau long Saut Simbu husat i bin hagamap nating long Mosbi i wokabaut i go bek long ples.

Ol i bin kisim taim stret long wokabaut long Kokoda Trail tasol ol i amamas olsem ol i go kamap

long ples tru bilong ol. Ol yut ya i bin tok, bai ol i no moa wari long mani na kaikai bikos olgeta samting i fri long ples.

Mi yetm mi wanpela ripota bilong dispela niuspepa. Mi amamas long wok bilong mi. Mi save poroman gut wantaim ol wanwok bilong mi.

Mi tu i bin raun long olgeta hap bilong PNG na lukim sampela ol gutpela hap. Tasol ples bilong mi em i stap long lewa. Oltaim, mi save tingim ol pipel na ples bilong mi. Mi gat bikpela graun bilong mi. Mi papa bilong ples.

Mi gat sampela ol kopi diwai i sanap long graun, sampela ol marata i gro, sampela ol karuka i sanap, sampela ol diwai mi yet planim i stap.

Mi no save lus tingting. Mi save wanpela taim bai mi go bek long ples.

Bai mi soim pikinini man bilong mi graun bilong tumbuna bilong tumbuna bilong em, na graun bilong papa bilong papa bilong em na graun bilong em.



• Sampela famili long siti na taun i save stap long strong bilong emti botol.



• Ol dispela sumatin i bin nogat klasrum na ol i skul aninit long as bilong diwai.



• Planti pikinini i save amamas tru long go long skul tasol ol papamama i save brukim het tru long redim skul fi. Skul fi em bikpela salens bilong ol papamama.

Skul sabsidi bai go long skul long taim o nogat?

JOE KANEKANE i raitim

TUPELA wik i go pinis, Minista bilong Edukesen, Muki Taranupi i bin tok aut long long redio olsem Skate-Lasaro gavman i bin putim kamap pinis skul fi sabsidi.

Mista Taranupi tok olsem dispela mani em Fainens dipatmen bin tok orait pinis, na weit tasol long go long han bilong wanwan ol provinsel gavman long tilim i go long ol wanwan skul long kantri.

Em hamamas olsem dispela gavman i bungim taim stret long givim dispela K56 milien i go long olgeta skul long kantri.

Wanpela toktok we Mista Taranupi toktok i mekim na planti ol papamama i kirap nogut. Em tok, i tru olsem mani em i bin tok orait pinis tasol i gat nau em wok bilong ol ol lain long provisel level long luksave olsem mani i mas go long ol skul kwik taim. Dispela kain toktok bilong Minista i no gutpela long wanem i luk olsem bai mipela i gat bikpela hevi bungim ol skul na papamama gen.

Dispela hevi em pasin bilong mani i no save go long ol skul long taim. Na, minista i tok olsem, dispela wok i stap long han bilong ol gavana na wanwan Edukesen divisen. I gat sampela rot olsem, bai ol lain long ol provins i ken hariap long peim mani bilong ol skul, o wankain olsem las yia bai yumi wetim han bilong gavman tasol? Praim

minista, Bill Skate tu i tok olsem, pasin bilong tilim ol mani long han bilong ol skul i stap long han bilong ol lain long provins.

"Wok bilong mipela ol politisen em i bilong wokim disisen, ol lain long provins i mas luksave olsem mani mas go long ol skul long taim. Dispela ol dipatmen i mas rispektim mipela long ol kain disisen bilong mipela," em i tok.

Mani i kisim longpela taim

Las yia, planti skul long kantri i putim was long sabsidi long pela taim tru, tasol ol i kisim leit. Ol lain long provisel level i tok, provinsel gavman i holim pas mani, na ol lain long nesanel levul i tok mani i go pinis long provins.

Taim mani i stap wantaim ol lain long provinsel gavman, bilong wanem na gavman i no skelim mani i go hariap long ol skul. Dispela hevi we plenti provinsel gavman i save

wokim i mekim na planti ol skul i save kisim taim.

Planti bilong ol skul i painim hat tru long ronim skul, olsem na sampela i sasim ol skul pikinini. Sampela bilong dispela ol lain i go dinau long kisim ol skul saplai wantaim ol arapela samting, na taim ol kisim mani, olgeta mani i go bek long dinau. Yumi lukim plenti skul i pas las yia long wanem, i no gat mani long ronim skul.

Husait i asua

Taim Minista i bekim sampela askim long tok bek so, em i tok olsem wok bilong long kamapim polisi, na i gat ol pablik seven husat em wok bilong ol long hariapim wok long skul sabsidi i go long ol wanwan skul.

Tru, long sait long skelim wok i tru, tasol dispela kain sistem i wokim na planti lain i kisim bikpela taim. Nesanel Faines dipatmen i lusim mani i go long han bilong ol lain long provinsel gavman. Bikpela wok i stap long han bilong ol lain long provinsel gavman. Long wanem dispela em ol lain i bai

wokim na ol skul i bai kisim mani bilong ol long taim o nogat. Sapos ol i pulim taim tumas, bai yu painim olsem ol skul bai nogat mani long taim na plenti heve i bai kamap. Tasol sapos ol i hariap ating hevi bilong mani long ol skul, ating bai i no inap long stap moa.

Tasol nau yet, i luk olsem hevi bilong las yia, bai stap yet wantaim ol skul.

Sampela hevi ol skul i bungim

Sampela tisa, mi bungim i bin autim wari na tingting bilong ol long wanem hevi ol i bungim. Long Kiunga hai skul, ol sumatin i save kisim kaikai bilong ol long dinau. Taim ol i kisim mani bilong ol, olgeta mani i save go long olpela dina bilong ol. Long baim nupela kaikai, ol i mas go dina gen. Olgeta taim ol i save wokim olsem, na i no long taim bai ol kampani i save givim dinau long dispela skul i bai stop long givim dinau long wanem ol i no save wanem taim bai skul i kisim mani bilong em.

Long Simbu, memba bilong Kundiawa/Gembolg, Peter Weieng i tok, hevi i save stap namel long provinsel edukesen bot. Wok bilong dispela bot em bilong lukautim mani, na bihain i gat edukesen dipatmen tu husat i mas salim mani i go.

Taim mani i kam long Mosbi, mani no save go stret long ol skul. Em i mas go pastaim long dispela bodi husat i bai glasim pastaim ol askim i kam long ol skul. Dispela i save kisim longpela taim long larim mani i ken go kwik long ol skul.

Sampela hai skul i save askim ol bikpela stua long givim kaikai long ol dina pastaim na bihain ol i bai lusim sabsidi mani bilong ol long bekim.

Wanpela bilong dispela ol skul em, Kiunga hai skul long Westen provins. Long wanpela stori wantaim wanpela tisa, em i tok olsem, skul i save dinau long kaikai long sampela bikpela stua. Long wanem, mani bilong ol i no save kam long taim. Skul i mas ron yet, olsem na ol i painim sampela rot long sapotim ol yet inap long taim ol i kisim sabsidi mani.

Sabsidi i strongim ol skul o nogat?


Wanpela bikpela askim, we mipela planti lain i wok long askim em, sapos dispela skul fi sabsidi i halivim ol sumatin. Gavman i tingting long halivim ol papamama long peim skul fi. Tasol, long dispela pasin tasol, i gat sampela sait nogut bilong em. Sampela bilong ol dispela hevi em. Las yia, long NCD, planti ol papamama i wok long gat bikpela koros wantaim ol skul hetmasta. Long wanem, ol papamama i tingting gavman i bai peim projek fi. Tasol ol papamama yet i peim.

Yumi lukim tu olsem, planti ol papamama i wok long les. Na ol i surukim dispela hevi i go long han bilong gavman. Ol sumatin tu i wok long les, o i no traim bes long skul long wanem, papamama bilong ol i no peim. Pastaim taim gavman i no bin peim skul fi, yumi lukim planti ol sumatin i save wok hat tru long stadi hat na kisim wok.

Mi no save sapos dispela pasin i wok long kamap yet o nogat. Mi bai kirap nogut sapos planti ol pikinini no go skul. Gavman i katim bikpela mani tru long peim ol skul olsem na sampela eria olsem yunivesiti mas pasim sampela dipatmen bilong ol. Yunivesiti i bikpela skul we olgeta liklik lain long olgeta skul i save laik long go stap insait, tasol sapos yuni i pas, ating olgeta sumatin bai painim hat long go skul.

I no gat long long peim skul fi sabsidi tasol, gavman i mas glasim gut tru sapos, mani i bai halivim wok bilong edukeisen hia long kantri. Gavman i mas lukim sapos ol skul i bungim hevi, na bikpela mani tumas em gavman i wok long putim i go long dispela eria. Olsem, plenti lain save toktok, edukeisen em i fiutsa bilong mipela, na wanem samting mipela i wokim nau, bai mipela i save long ol yia i kam.

Tru gavman i putim bikpela mani tru i go long han bilong ol lain, tasol bekim bilong dispela kain pasin i surukim wok bilong edukeisen i go het o em bai mekim na bai mipela i bungim sampela hevi. Gavman yet i kirapim dispela kain samting na em yet mas gat rot long pinisim sapos sampela hevi i kamap.



• Taim bilong ol sumatin long stadi.

KANAGE

"Em nau, narapela wik bilong mi ken"



Kanage bilong Buang long Morobe provins. Wanpela taim meri bilong em i gat bel olsem na tupela i go long haus sik long Lae. Ol dokta i kisim misis Kanage igo insait na Kanage i stap ausait. I no longtaim, misis Kanage i kam ausait na Kanage askim, bebi we?. Na misis Kanage tok, sori paps, ol dokta i tok win i pulap long bel bilong mi olsem na ol i slekim win pinis. Taim Kanage harim olsem em i go insait na askim ol dokta, olsem wanem na misis bilong mi gat win tasol long bel bilong em?. Yupela ting mi karim pam bilong baisikol ah?.

**Boncoy Mossie
Bulolo**

Kanage wantaim poro bilong em Tobias i go stil long wanpela gaden. Kanage i go stilim ol painapol na Tobias i go stilim tomato. I no longtaim papa bilong gaden i kamap na holim Tobias na kilim em nogut tru. Orait papa bilong gaden kirap na tokim Tobias, yu kisim ol dispela tomato na subim long as bilong yu nau tasol na mi bai lukluk. Tobias kisim ol tomato na subim long as bilong em pinis na em stat long lap. Taim papa bilong gaden i lukim Tobias i lap em askim, yu lap long wanem, tomato i swit long as bilong yu ah?. Tasol Tobias kirap na bekim, nogat, mi lap bikos mi sori long Kanage ya, em stilim painapol long hap sait i stap.

**John Baum
Madang**

Papa Kanage i save stap long Goroka asples na les pinis long kaikai kaukau. Olsem na em i go long Mosbi long stap wantaim pikinini meri na famili. Taim em i kam daun long Mosbi, em i amamas tru long bungim pikinini meri na ol bubu bilong em. Taim ol i go kamap long haus, pikinini meri tokim ol pikinini long stori wantaim bubu Kanage na em bai kukim kaikai. Orait taim kaikai i redi pinis, olgeta pikinini i sindaun na kisim plet kaikai bilong ol. Kanage i lukim bikpela plet tru pikinini meri i givim em na em ting rais na em amamas nogut tru. Taim em i opim ai bilong plet na lukim ol kaukau i pulap long dis, em kirap nogut na askim pikinini meri, yupela salim tok long mi kam long Mosbi ya, na husat baim tiket bilong ol lain ya long kam?. Pikinini meri i paul tru long kwesten bilong papa Kanage. Yu save papa Kanage i lusim ples long kaukau tasol na ting bai em kaikai rais long Mosbi.

**Awa Tim
Lae**

Kanage stap long ples i go nogat na em i go raun long Mosbi. Wanpela wiken em i go raun long Boroko na bungim wanpela Sepik poroman bilong em long bipo. Orait tupela pasim tok long baim 6 peks na go dring. Tupela dring pinis na kalap long wanpela taxi. Taxi i karim tupela raun raun na bil bilong taxi i go antap long K50. Taim taxi draiva i askim tupela, tupela nogat K50 long baim. Mekim na draiva bilong taxi holim wanpela bikpela tamiok na soim tupela na pretim tupela



KANAGE, YU KAIKAI PINIS, YAH! BILONG WANEM NA YU KAM BEK GEN?!

SSH! PASTO, GIVIM GEN, MI NO KAIKAI LONG MONING NAMI HANGERE, YAH!

nogut tru. Draiva i tokim tupela, sapos nogat mani, yutupela bai kaikai hendel bilong mi o nogat bai yutupela i kaikai tamiok. Tupela i sotwin nogut tru na Kanage kirap na tokim Sepik poro bilong em, laip bilong mitupela i stap long maus bilong yu, yu kaikai na mitupela i go nating.

**Awa Tim
Lae**

Kanage em wanpela hapman bilong go karim lek wantaim ol yangpela meri Simbu. Wanpela taim em i bin go karim lek na bungim wanpela naispela meri bilong Sinasina. Taim tupela karim lek i go, Kanage kisim bikpela filings tru winim olgeta manmeri. Olsem na em tok win tasol long meri Sinasina, larim lek mekim wok na larim han bilong yu flai kam daun hetkota bilong mi. Orait long narapela de meri Sinasina i mekim plen pinis na haitim wanpela lip sarak na karim i go. Kanage i ting em i autim tiket bilong meri Sinasina pinis olsem na em stailim gut tru long bilas na i go. Taim tupela statim wok bilong karim lek gen, Kanage isi tasol tokim meri Sinasina, yu na mi em rait olgeta, rait patna ya. Larim lek i mekim long laik na han tu i mekim wok bilong em. Isi tasol meri Sinasina rausim lip sarak na holim long han. Taim em subim han i go na holim hetkota bilong Kanage, em karamapim lip sarak raunim olgeta hetkota bilong Kanage na Kanage bikmaus, yes rait, no no, hot wan, hot wan. Em bikmaus olsem na kirap kalap lusim ples bilong karim lek na kalap kalap i go long haus na i no kam bek moa. Olgeta manmeri insait long haus karim lek i paul nogut tru na ting Kanage i mas kisim sik longlong long meri Sinasina.

**Pita Marasin
Hagen.**

Kanage hangre wantaim na i go long lotu. Long lotu, pasto i givim komunian long ol manmeri na Kanage hangre tu olsem na em igo kaikai tasol. Em i kaikai komunian pinis na em i go sindaun. Tasol hangre i stap yet olsem em na em joinim lain gen na i go kaikai. Taim pasto lukim Kanage i kam bek namba tu taim, isi tasol pasto tokim em, yu kaikai pinis ya, bilong wanem na yu kam bek gen long sotim skel bilong ol arapela lain?. Kanage harim na bekim, pasto, em orait ya, mi winim longpela lain

pinis na kamap long alta ya, noken tok bikpela bai olgeta manmeri i harim. Nogut ol manmeri bai ting yumi wantok sistem ya.

**Elipek
Mosbi**

Kanage bilong Minz na em i go long Hagen taun na raun long ol stua. Em i raun i go na go insait long Steamship Hardware stua. Em i lukim wanpela naispela tamiok tru na em i go baim. Em i baim pinis na karim i go sindaun long bas stop long go bek long ples. Em i sindaun i stap na wanpela bikman bilong Tari i kam na askim Kanage, pren, yu baim tamiok bilong yu we?. Kanage kirap na tokim man Tari, mi baim long Singsep Andawe. Ol manmeri i sindaun arere i harim na lap indai nogut tru.

**Mek Du
Banz**

Kanage i bilong ples Yamap na em i maritim meri wantok yet. Wanpela taim, meri i gat bel na tupela i go long Wau haus sik. Taim meri bilong Kanage i karim pikinini pinis, Kanage i go insait long lukim. Taim em i lukim pikinini, em tanim het na tokim ol meri nes, olsem wanem, Yamap tu Yamap na Buka kamap?. Ol meri nes i paul olgeta na Kanage lus nating long haus sik.

**Topias Yateng
Wau**

Lapun Kanage wantaim pikinini meri i laik go salim kawiwi long Kimbe maket. Wanpela pmv ka i kam na tupela stopim na tromoi ol bek kawiwi igo antap. Tupela i isis tumas na boskru bikmaus long Kanage na pikinini meri olsem, yutupela goap hariap, noken westim taim. Taim Kanage harim olsem, em kisim rong tingting na rausim olgeta bek kawiwi i kam daun.

**Wawen Robasil
Kimbe**

Kanage i bilong Goroka na em i go salim ol kabis long Lae maket. Em i salim i stap na lukim wanpela meri Hagen i werim tait traisis na i kam. Ai bilong Kanage i lok stret long meri ya na han bilong em gurua na tasim as bilong meri ya. Taim meri Hagen i pilim olsem em tanim na tokim Kanage, isi long tasim tasol em bai hat long wok on

it. Taim Kanage harim olsem em bekim, em orait, its for tats filings tasol.

**Atex Tais
Goroka.**

Kanage wantaim poro bilong em i pasim tok na i go stilim pinat long gaden bilong wanpela man long nait. Tupela i stilim ol pinat pinis na Kanage i go sindaun bilong em yet na poro bilong em i go sindaun long narapela sait na tupela mekim save long kaikai pinat i stap. Kanage tu igat bikpela kela long het bilong em tasol em i save haitim long hat. Long dispela nait em i rausim hat na pulapim ol pinat long en na kaikai i stap. I no longtaim papa bilong gaden i kam na poro bilong Kanage i lukim na ronawe. Taim em i ron i go, em i lukim kela bilong Kanage i lait long mun lait na em i ting wanpela hap ston. Olsem na em i ron tasol i go holim het bilong Kanage na pulim kamaun na i laik tromoi long papa bilong gaden. Turangu Kanage i flai kam ausait na hap i dai bikos nek bilong em i lus na em i go slip tupela mun long haus sik. Ol dokta long haus sik i putim bikpela simen raunim nek bilong Kanage na em karim raun.

**Beutus Aukzy
Vanimo**

Poro bilong Kanage i dai olsem na Kanage wantaim misis bilong em i go long lukim. Tupela igo kamap long haus kra i na Kanage i go sindaun arere long paia wantaim ol arapela manmeri na kra i nogut tru istap. Kanage i kra i go na opim lek bilong em na sem taim, winis bilong em i hangamap i kam daun. Taim meri bilong Kanage i laik tanim na lukim winis bilong masta bilong em i hangamap i kam daun ples klia, em bikmaus, aiyo, masalai bilong ol Sepik tu i kam stap wantaim yumi ya. Taim Kanage harim olsem em bekim, masalai i wari long poro bilong em na i kam tu long soim wari bilong em ya. Olgeta manmeri long haus kra i harim na stopim lap na kilim skin long lap stret.

**Reks Yanga
Wewak**

Kanage save aigris tru long wanpela yangpela meri Goroka. Olsem na wanpela taim em i go long maket na giman raun long wetim meri ya bai i kam. Em i raun raun i go na klostu apinun na meri ya i kam. Taim meri ya i kamap, Kanage kisim hai filings na i go klostu long

meri ya na tokim em, rait meri, aste nait mi bin slip na mi driman long yu ya. Taim meri ya i harim olsem em bekim gen, mi tu bin driman na mi lukim wanpela kain man olsem yu ya. Man ya i em wanpela so op man tru na kus i no isi long nus bilong em. Kanage harim na tok, a mi save, em mas namba tu bilong mi ya.

**Patrick Bos
Kimbe**

Wanpela taim Kanage wantaim waitman bos bilong em i go painim pik long bus. Tupela raun long bus i go na waitman i lukim wanpela wel pik na em givim sotgan long Kanage long go kilim dispela pik wantaim sotgan. Kanage holim gan tasol na wokabout i go klostu long pik na em tokim sotgan, kilim em, kilim em. Tasol nogat wanpela samting i kamap olsem na Kanage i ting sotgan i mas hangre ya. Em rausim wanpela mau banana na subim long maus bilong sotgan. Tasol nogat wanpela samting i kamap. Em nau pik i ronawe taim waitman i kamap. Taim Kanage lukim waitman ya em tokim em olsem, em askim sotgan long kilim pik tasol em i no harim tok. Olsem na em ting gan i mas hangre na em givim em mau banana tasol nogat samting i kamap. Taim waitman i lukim olsem em belhat nogut tru na tokim Kanage, yu blari wel pik, go and hide. Waitman tromoi bet antap long Kanage na em karim pen na tekov i kam bek long haus.

**John Baum
Madang.**

Kanage bilong Karkar long Madang na wanpela taim em i go baim buai long Madang maket na mekimsave long spetim i stap. I no longtaim wanpela Bogia i kam na askim Kanage, pikinini, yu baim buai long we?. Kanage i les tru long man i distebim em olsem na em tokim lapun olsem, long beksait bilong yu. Taim lapun i harim em sem nogut na i go. Wanpela taim Kanage i ron long ka wantaim meri bilong em i kam long maket gen taim lapun Bogia i sanap na lukim Kanage i kam. Harim tru lapun i kirap na tokim Kanage, hey, yu kisim gelpren bilong mi i go we?. Taim Kanage harim na luksave olsem em sem lapun bipo em bin bagarapim em long toktok; Kanage skoa bilong Kanage i daun olgeta na em tekov.

**Kanage pren
Madang**

Kanage bilong Simbu na wanpela taim ol meri long blok i givim em nem bilong wanpela meri long tupela i mas penpren. Taim Kanage i raitim pas na meri ya i save bekim, Kanage i save dai na kirap. Amamas bilong em i save moa yet tru olsem em i gat wanpela yangpela pren meri. Wanpela de meri ya i raitim pas long Kanage long tupela bai bung long Suave maket. Olsem na Kanage i dres ap gut tru na i go sindaun i stap na wetim meri ya. I no longtaim meri ya i raun i kam na Kanage lukim na ron i go holim han bilong em. Tasol meri ya i kirap nogut tru na tokim Kanage olsem em i ting Kanage em wanpela yangpela boi. Tasol Kanage strong na tok, em mi tasol ya Mista Kanax. Meri ya harim na belhat nogut tru na tokim Kanage, yu no sais bilong mi, yu harim ah, yu lapun kela pinis wantaim planti tumbuna. Kanage harim na sem nogut tru na em kilim meri ya hap indai long maket long haitim sem bilong em. Ol manmeri i lukim na askim na Kanage tok, nogat pikinini meri i bikhet olsem na mi skulim em liklik.

Cathy Miamori Mosbi


Kanage em miiks blut bilong Hailans na Papua na em marit long meri Wes Irian. Wanpela taim Kanage kisim bikpela sik malaria tru na tupela i go long haus sik. Kanage pilim nogut na tokim meri bilong em, daling i luk olsem mi bai dai nau tete. Taim misis i harim em tokim Kanage, taim yu dai, olgeta pipel long Papua Niugini bai kraik nogut tru long yu bikos pohet bilong yu i olsem Sepik, hap ia bilong yu i olsem Madang, nus bilong yu i olsem Finsafen. Tupela hul long nus bilong yu i olsem Makam na Busu wara. Maus bilong yu i olsem wara Waria, maugras bilong yu i olsem Samarai stret na lewa bilong yu i olsem aigir stret na gras long het bilong yu i olsem as gras bilong ol lain bilong mi long Wes Irian stret. Taim Kanage harim olsem, em belhat na bikmaus long meri bilong em olsem, yu wel bis bilong Ela Bis. Ol manmeri i harim na lap indai stret long tupela.

Gideon Fomi Goroka

Kanage em wanpela hap man bilong pilai soka na planti manmeri i save ful sapot tru long em. Taim yu kisim bal i kam klostu long em, bai Kanage i lep rait long yu na yu bai kisim bikpela hevi tru. Kik bilong em tu i save hat wan olgeta golkipa i save pret long em. Wanpela taim tim bilong Kanage i go long gren fainel wantaim ol boi bilong Siassi solwara bruk. Ol kik i go na nogat skoa i kamap yet inap long klostu ful taim na wanpela boi Siassi i pulim bal i go klostu long golmak bilong lain bilong Kanage na em i wok long trik trik na abrusim planti lain bilong Kanage. Paps Kanage i sanap long namel na lukim dispela na bel bilong em i bagarap nogut tru na em lokim spit long hap yet na ron i go. Em i kamap long beksait bilong boi Siassi an i laik stralkim em wantaim bal tasol manki Siassi i save na kalap. Olgeta strong bilong Kanage i pinis stret long bal na bal i go brukim han bilong golkipa bilong Kanage ol yet na i go insait long golmak. Kanage i skorim gol i go insait long mak bilong em yet. Turangu Kanage i sem nogut tru bikos tim bilong em i lus long gren fainel na ol boi Siassi solwara bruk i winim gren fainel.

Junia Nickson Siassi

Kanage i kisim holide long wok na kisim famili bilong em na ol i go



KANAGE



long ples. Long ples olgeta manmeri i no save bung gut na mekim gut wok bilong ples. Wanpela taim bikpela miting i kamap na ol bikman i hatim ol manmeri long ples nogut tru long bikhet pasin ol i save mekim. Em nau Kanage i skelim olgeta toktok i go pinis na em i laik autim tingting bilong em tu long ol pipel bilong ples. Olsem na Kanage i sanap na bikmaus. Yupela olgeta pasim glu glang maus bilong yupela. Yupela i laik so op na apim nem bilong yupela long wanem samting?. Yupela i winim amaspela pait, edukesen, bisnis, drigr, ovasis na waitman pinis?. Bai yupela i stap kanaka olsem yet na go bek hait insait long as target bilong tumbuna bilong yupela. Sapos yupela ol man i karim, bai yupela i yusim het na senis. Tasol ating ol mungi i mas karim yupela olsem na pes bilong yupela olgeta i olsem king kong. Taim ol manmeri i harim, ol i lap indai nogut tru.

Rocky Ricky Wabeg

Kanage wantaim ol poroman bilong em i raun i go long gaden na em i lukim graun i bruk nabaut long olgeta hap na bagarapim gaden. Kanage i sanap skelim i go na em tokim olgeta pren bilong em, hei yupela kam na lukim. Ol bikpela buldosa bilong Woks i kam na brukim graun na i go pinis. Taim ol poroman i harim olsem ol i ting tru na ron i go long lukim. Taim ol i luk-save olse em ol pik i brukim graun nabaut, ol i lap indai bikos ol i klia olsem Kanage i tok pilai long ol.

Misis R Smaliya Sandaun

Kanage i bilong ples Samanai long Sandaun provins. Wanpela de em i go lukim kandre bilong em long ples Usari. Kandre i lukim Kanage na amamas askim em long tupela i go raun painim abus. Olsem na tupela i go painim abus

long bus na Kanage i go long wanpela gaden na lukim mak bilong pik i brukim gaden na kaikai ol tapiok na go pinis. Hariap tasol Kanage singautim kandre bilong em na tokim em, kam hariap na lukim, tapiok i kaikai pik pinis na i go. Kandre i paul na askim gen, yu tok wanem?. Na Kanage i tok, tapiok i kaikai pik pinis na i go. Kanage bilong em i kamap lukim na les nogut tru na kisim Kanage i go bek long ples.

Richard Smaliya Sandaun

Kanage i go long stua long baim Ox & Pam tin mit na wanpela paket noodles. Taim em i kamap long stua, em i tokim stua kipa, mi laik baim wanpela Oksen pan na snek snek. Stua kipa i go kisim tin mit na givim em tasol em i paul long snek snek olsem na em askim Kanage i laikim wanem. Tasol Kanage i strong yet na tok snek snek. Stua kipa i paul na soim olgeta samting long stua tasol Kanage i tok nogat. Taim stua kipa i soim paket Maggie noodles, em nau Kanage i bikmaus, thats the one, my kai. Stua kipa i lap nogut tru long Kanage na Kanage karim ol kaikai bilong em na lus long stua.

Emmelda na Bernadette Smaliya Sandaun

Kanage i bilong Arowe stret na wanpela taim em i raun long Kimbe taun long wiken. Em i raun raun i go na apinun tru na i laik go bek long ples. Ples i klostu olsem na Kanage wokabaut isi long rot i go na harim kraik bilong wanpela ka i kam. Kwiktair Kanage karim wanpela traipela hap diwai na tromoi i go blokim rot na em i go hait. Taim ka ya i kam na lukim diwai, ka i putim ful brek na kwiktair Kanage kalap long bus i kam ausait. Draiva i lukim na ting raskol i laik hensapim ol. Tasol Kanage i smail na

tok, nogat mi laik kalap long ka i go long ples ya. Draiva i belhat wantaim na tokim em, yu rausim diwai rot na kalap. Orait Kanage i rausim diwai pinis na kalap long beksait na ol i go. Draiva i belhat na i laik bekim olsem na em givim 60 stret na kamap long ples bilong Kanage. Tasol draiva i no stop. Em spit moa yet na abrusim ples bilong Kanage na Kanage bikmaus tasol draiva i no harim tok bilong em. Draiva i karim Kanage i go longwe tru na stopim ka tokim Kanage long go daun na wokabaut i go bek long ples bilong em. Bikpela ren tu na Kanage kisim bagarap long rot na wokabaut i go bek.

James Mu Kimbe

Kanage i bin giamanim meri pikinini bilong em olsem em bai i go lukim pilai. Tasol samting tru em i go long klap na mekim save long dring i stap. Taim em i dring i go, olgeta mani i pinis na em i spak wantaim na wokabaut i go bek long haus. Taim meri pikinini lukim em spak na i kam, ol i hatim em nogut tru long giaman pasin em i mekim long ol. Orait famili belhat na i no kukim kaikai bilong Kanage na em slip hangre. Long nait Kanage hangre kilim em stret na em i go sekim ol plet na sospen tasol nogat wanpela hap kaikai i stap. Kanage belhat tasol rausim nupela sospen meri i baim na karim i go salim long K10 na go baim bisket na tin mit na kaikai. Long moning meri painim sospen nogat na askim Kanage na em haitim tok. Tasol wanpela wik bihain, meri i painimaut olsem Paps Kanage i salim sospen long K10. em holim hot wara bilong tipot na tromoi antap long turangu Kanage na pes bilong em i senis i go wait.

Kanage Neba Mosbi

Krismas taim na Kanage i laik wokim liklik hom bru bilong em long dring na spak liklik long krismas

taim. Olsem na baga i go baim ol mau banana i kam na wokim hom bru i stap. Taim em i redim gut hom bru bilong em long wanpela botol i stap, em i hatim long kona bilong kabot. Tasol em ino haitim gut na misis bilong em painimaut na belhat nogut tru. Isi tasol Misis Kanage igo bungim ol lombo na kam brukim na tromoi wara bilong lombo i go insait miiks wantaim hom bru bilong Kanage. Taim krismas stret na ol manmeri amamas i stap, Kanage i karim hom bru botol bilong em i go sindaun wantaim ol bikman na ol i sindaun. Taim Kanage opim botol na apim wan maus na daunim, sore, ol lombo i laik kik bek, bel bilong Kanage i paia lait stret na maus bilong em i kuk wantaim na em kalap kalap long dispela hap na ol manmeri i ting Kanage i spak na amamas i stap.

Junia Max Popondeta

Kanage em man bilong bikmaus nating ol manmeri i save kam arere long haus bilong em na mekim planti nois. Em i save bikmaus na tok nogut tu long ol manmeri na ol i pret long harim ol tok nogut bilong em. Olsem na man o meri i wok-abaut long sait bilong haus bilong Kanage, ol i save wokabaut isi tasol nogat nois. Wanpela taim ol polis patrol i raun long strit na i kam long banis bilong Kanage ol i lap na mekim planti nois antap long ka. Taim Kanage i harim olsem em bikmaus i go bek long ol olsem, yupela man o dram. Maus bilong yupela op olsem maus bilong 44 galen dram, yupela sarap na pis op, blari musmus. Taim ol polisman i harim olsem, ol i kam insait long haus na askim Kanage, bikman yu tok wanem?. Taim Kanage lukim blu union na maus bilong sotgan, em kwiktair tokim ol, sori ol bos, mi no tok long yupela, mi tok long ol boi bilong mipela yet ya. Ol polisman i save olsem Kanage i giaman olsem na ol i kisim rop na pasim tupela han bilong Kanage i kam lokim maus bilong em na ol tekov na Kanage i lok insait long haus i stap.

Jim Braun Mosbi


Kanage i kisim balus long Mosbi na i laik go long Lae. Long Nadzab ples balus, lapun mama bilong Kanage i kam wet i stap na lukim Kanage i kam ausait long dua bilong balus na em bikmaus long terminol, i yaga boi bolong mi ya, wanpis lewa ya i kam. Kaumboi hat na hangisip long nek wantaim longpela ami traussis olsem ami bilong gavman ya. Ai galas tu i olsem ninga ya. Ol manmeri i harim na i no isi long lap indai long ples balus.

Kanage spai Lae

Kanage i lusim Lae na i go long Wewak long painim wok. Em raun long Wewak taun long maket na lukim ol flawa bilong Sepik na bel bilong em i seksek tru na em i laik stap olgeta long hap. Kanage i go long telefon na ringim poro bilong em long Lae na tokim em, kande, Wewak em tru paradais ya. Ol pisin ya flai flai nabaut nabaut long rot na hat long sutim long katapel ya. Yu kilim, bai narapela i mekim win long ia bilong yu, i no sot, pulap moa. Poro bilong Kanage harim na bekim, yu mas kisim planti ston na i go, nogut ston i sot na ol pisin bai tanim bek na pinisim yu. Kanage bekim, no waris, bun bilong Sio em mi karim i kam ya. Poro bilong Kanage i harim na lap nogut tru na tokim em, kisim blok na bihain tok-save na bai mi kam tu long Wewak. Yu save, Kanage i ai op long ol meri Sepik na em lus ting long go bek long Lae.

Jax Fox Wewak

Stori bilong kamap bilong tupela maunten



BIPO BIPO tru long ples Rakuanda insait long Mendi, SHP, i bin gat wanpela lapun man. Nem bilong em Lukumi.

Lukumi em wanpela kain man bilong lukautim ol planti pik na tu em wanpela bikman long ples. Em i nogat meri na tu i nogat pikinini i save stap wantaim em long haus bilong em. Olsem na Lukumi i save tingting long maritim wanpela meri long lukautim ol pik na tu long i stap wantaim em tasol, turangu em lapun pinis, na tu ol meri long ples i save les long maritim em.

Long wanpela taim, Lukumi i tingting long go raun lukim wanpela bes pren bilong em, Kuta Kati. Man ya mi tokim yu, em wanpela kain man bilong maritim ol meri. Na tu em wanpela poisin man stret. Tu, em wanpela man bilong kusai olsem na taim Lukumi go kamap long haus bilong Kuta Kati em i kros liklik long wanem Lukumi i no givim wanpela pik long em bai kilim na kaikaim. Tasol em (Kuta Kati) i no toktok. Tupela i stori i go na Lukumi i toksave long poroman bilong emolsem em i laikim wanpela meri bilong maritim. Olsem na mi kam raun tasol long lukim yu.

"Sapos yu laikim meri noken wari, meri ya bai paia stret long yu. Mi bai wokim wanpela samting. Na bai mi givim yu na bai yu go givim long wanem meri yu save i gat bikpela laik tru long maritim, " Kati i tokim Lukumi.



"Brata, wanpela stailmeri ras ya em i save aigris long mi, tasol mi nogat ol samting bilong yusim olsem na mi kam long yu, "Lukumi i tokim Kati.

Na poro bilong em i tok. Em bai dai stret long na mi maritim dispela meri. Mi bai givim wanpela traipela pik long yu. Em i orait noken wari. Toktok i pinis na Lukumi i go bek long haus bilong em.

Yu save, Kuta Kati i kros bikos Lukumi i no givim wanpela pik pastaim olsem na em

(Kuta Kati) i tingting long bagarapim Lukumi. Kain bilong ol posin man tu ya na em i wokim ol kainkain samting. Em i redi i stap. Okei long moning taim tru Lukumi ron i go long haus bilong poro bilong em. Na i tokim em long em bai yusim dispela samting. Taim em i kamap long ples, em tingting long givim samting long meri ya nogat, turangu Lukumi i go longlong. Em i go insait long wanpela bikbus tru na em i wokim wanpela haus namel long 2-pela maunten.

Nem bilong dispela 2-pela maunten em Yole na Limbo. Long hap we em i stap na dai long en, wanpela traipela ston i kamap.

Nem bilong dispela ston em Namuadaleme Kana. Na long nau yet sapos yuraun long ples Rakuanda bai yu lukim dispela 2-pela maunten em - Yole na Limbo na dispela ston Namuadaleme Kana.

**Joshua Koyakia
Mt Hagen**



Nem: Ricky Ato

Krismas: 18 (man)

Adres: Countryside, PO. Box 154, Bialla, WNB, PNG.

Save laikim: Go long lotu, harim gospel musik, diskas long tok bilong God na sea long tok bilong God long narapela. Raun long autris na open ea long maket na long taun. Mi laikim kristen meri mas bekim o rait long mi. Mi wanbel long bekim pas bilong yu husat yu rait i kam.

Nem: Sam Gea

Krismas: 19 (man)

Adres: Wagan SDA Church, PO. Box 11701, Lae Morobe Province.

Save laikim: Harim gospel musik, go lotu, raitim pas long ol pen pren, laikim meri long narapela provins long maritim.

Nem: Robeu Krisawa

Krismas: 18 (man)

Adres: PO. Box 936, Wewak, East Sepik Province.

Save laikim: Pilai soka, gita, go long lotu, na mekim prensip.

Nem: Kevin Thomas

Krismas: 20 (man)

Adres: Bialla Town Store, PO. Box 43, Bialla, WNB.

Save laikim: Go lotu na pilai volibal, lukim vidio, tok pilai wantaim ol pren na raun wantaim, raitim pas i go i kam na marit.

Nem: Stanley M. Billie

Krismas: 19 (man)

Adres: Ulau Community School, PO. Box 89, Aitape, Sandaun Province.

Save laikim: Harim musik, pilai gita, waswas long solwara, pilai volibal, go lotu, na ritim niuspepa, sapos yu husat i laik raitim pas long mi, mi amamas tasol long bekim pas bilong yu.

Nem: Nelson Alumasau

Krismas: 19 (man)

Adres: Ulau Community School, Post Office Box 89, Aitape, Sandaun Provins, PNG.

Save laikim: Waswas long solwara, go lotu, serim aidia, pilai soka, volibal, ragbi tas, ratim pas na bekim pas bilong husat i rait long mi na bai mi amamas long bekim.

Nem: Joe Heni

Krismas: 23 (man)

Adres: Sandau profesinol trening centa SPTC - Sales na Marketing, PO. Box 99, Aitape, Sandaun Province.

Save laikim: Go long lotu, stori wantaim ol pren, waswas, harim musik, ridim buk, go long skul, harim tumbuna stori na painim gutpela meri long maritim

Nem: Brian Sindra

Krismas: 17 (man)

Adres: Lakurumau Comim School, PO. Box 138, Kavieng, NIP.


Save laikim: Harim musik pilai soka ridim ol buk, stori na tok pilai wantaim ol poroman, raun lukim narapela ples.

Nem: Delcher Ray

Krismas: 18 (man)

Adres: PO. Box 410, Mendi, Southern Highlands Province.

Save laikim: Pilai tas, ritim ol buk, raitim pas long ol prens na save i gat laik long sindaun long grup na taitim bun long stori.



LAIPPLAIN

Dia Laipplain,

Taim mitupela gelpren bilong mi i stat long raun wantaim mi bin amamas long prensip bilong mitupela. Nau mi wari long wanem mi no save kisim strongpela laik na tingting taim mitupela i slip wantaim.

Mi wari nau ya. I gat sampela marasin we mi ken kisim long helpim strongim laik na prensip bilong mitupela na tu pasin bilong slip wantaim i ken go gutpela?

LESS SATISFIED

Dia Pren,

Yu askim mipela long helpim yu long rot bilong mekim gut kamap laip yu wantaim gelpren bilong yu.

Laipplain i no save tokim ol manmeri wanem samting ol i mas mekim tasol em i save givim luksave long ol na toktok wantaim ol long traime daunim ol hevi na wari bilong ol.

Namba wan kwesten bilong mipela em, wanem tingting bilong yu long mining na as bilong slip wantaim? I luk olsem yu ting em i wanpela samting we singel man

Laikim helpim long kirapim laik

olsem yu i ken mekim nabaut long amamasim yu yet.

Planti yangpela pipel husat i laik traim long slip wantaim ol patna i no givim bikpela tingting long kikbek i kam long mipela na tokim mipela long ol kain hevi we ol i bungim.

Tu, antap long dispela kain wari olsem bilong yu i gat planti yangpela meri i gat bel ol i no laikim na tu ol kain sik nogut i kamap olsem ol sik gonoria, VD, sik AIDS na ol kain olsem. Olsem planti ol arapela Kristen, Laipplain i luksave olsem pasin bilong slip wantaim narapela em i bikpela samting.

Mipela i luksave olsem dispela samting em i blesing long Bikpela Antap na em i mekim long ol marit lain i ken kisim amamas long en na tu, mekim kamap ol pikinini long dispela wol.

Mipela i ting olsem yu inap long kisim moa luksave long gutpela sait bilong pasin bilong slip wantaim narapela sapos yu luksave long bikpela laik yu gat dispela samting we i save wokim na pulim laik bilong ol man na meri long wanpela arapela.

Buk Baibel i tokim yumi olsem olgeta samting we yumi gat, bodi, laik, tingting na wok long susim rait na rong em Bikman yet i givim yumi.

Ol i hap long plen bilong em na wanem samting em i gat long yumi insait long dispela laip. Taim yumi gro ap, pasin bilong gat laik long narapela i save kamap bikpela na yu no inap long stapim. Tasol olsem ol arapela blesing, God i laikim yumi long luksave long dispela blesing

bilong gat laik na kontrolim. Na i no long laik i kontrolim yumi. Sapos yumi nogat gutpela stia skul, em i isi long yumi i wokim ol samting we bai i no gutpela long ai bilong God na i no givim luksave long en.

Yumi tu save bringim sem long yumi yet taim yumi luksave olsem yumi brukim tok bilong Bikpela. Buk Baibel i mekim klia olsem yumi wokim sin taim yumi slip wantaim narapela ausait long marit.

Planti Kristen manmeri i apinim olsem laip i gat nupela mining taim ol i luksave long God Bikpela i laikim ol.

Dispela luksave i gviiim ol digniti na stia long ol samting we ol i wokim long olgeta de i save kamapim ol gutpela samting. Na pasin bilong tingting long ol arapela, sea wantaim ol na helpim ol arapela, na i no tingting tasol long laik bilong wanpela.

Laipplain i no save long wanpela marasin we bai strongim laik long slip wantaim narapela.

Taim tupela pipel i gat bikpela laik long wanpela arapela na ol i marit na ol i gat luksave long wanpela arapela, i nogat marasin ol mas kisim we bai pulim ol i go long wanpela arapela.

Laspela askim em yu no gelpren i toktok long yutupela bai marit? Yutupela i save gut long wanpela arapela o gat bikpela laik long wanpela arapela long yutupela i ken marit? Sapos em i olsem, yu ting yu ken kontrolim laik bilong yu na i no slip wantaim gelpren inap yutupela i marit pastaim?

LAIPPLAIN.



PNG HIT
Parade
1999

**SPONSOR -
 TRADEWINDS**

WB	LW	TW	SONG	ARTIST
7	2	1	I Ro I To'u Ora Ra'a	New Generation
1	1	2	Lutu Na Yakava	Kabani
14	7	3	Ua Ro'o Hia To'u Tino	New Generation
2	3	4	Samarana	Vatdoro
15	11	5	Name Soda	Steve Lahui
4	4	6	Hard Luck Night	Unisounds
3	5	7	Kekeni	Noel Asi
5	8	8	Mighty Love	Kool Roots
11	9	9	If You Say	Kool Roots
20	12	10	Madio	Steve Lahui
10	10	11	Rumaruma Te Mou'a	New Generation
6	6	12	Meri Allan	Demas Saul
8	13	13	Madang	Demas Saul
0	0	14	Daiguai	Lia Osborne
13	14	15	Amari Ute	Patti Doi
0	0	16	Pace stel pica pica	xb1
9	15	17	Boen Sarere	Feedback
0	0	18	Swit teine bilong mora	xb1
12	16	19	Wairaone	Kevin Hoire
19	20	20	Aitape Mi Wari	Kabu Rita

IN:	Swit teine bilong mora	xb1
	Pace stel pica pica	xb1
	Daiguai	Lia Osborne
OUT:	Promis	Amrock Solid
	Sore Daddy	Patti Doi
	Hau bai yu save	Lista

PNG FM PTY. LTD.
 Trading as
NAU FM
 and
YUMI FM
 P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995

Finsafen pipel i no gat bilip long ol yet

Dia Edita,

MIPELA planti Morobe pipel i no amanas long yupela ol pipel bilong Finsafen long pasin o tingting bilong yupela long makim maus man bilong yupela i go long Haus Palamen.

Yupela i no gat ol save man tru, i kamap long Kate Jabin i stap long makim olsem mausman bilong yupela a? Lukim olpela MP em hapkas, olsem na i no wari long mani bilong yupela na em i paulim mani na nau kot i rausim em. Nau gen yupela makim wanpela man Simbu.

Sapos em helpim ol wantok long asples bvilong em wantaim sampela RIP mani, yupela i no ken kotim em. Larim em wokim bikos yupela i givim em olgeta rait pinis, na maski long kra i sapos memba helpim ol lain wantok hailens.

Mi sori tru olsem yupela rabisim pikinini Jabin Kate. Finsafen ilektoret em i no stap long hailen provins. Nau yupela salim wanpela bilong yupela Finsafen i go traim kontes long wanpela hailens ilektoret long neks nesenol ileksen.

Mi tokim yupela ol hailens bai rausim em wantu. tasol i kam bek long Finsafen. Long hailens politikis em i bilong ol man hailens na nogat ausait man i ken resis. Nau yupela opim rot pinis na olgela bai i kam daun na traim kamap kendidet long olgeta ilektoret bilong Morobe.

Planti bin kontes bipo pinis tasol ol i lus. Yupela olget 9-pela ilektoret bilong Morobe mas kisim gutpela tingting nau na lainim gut ol grasrut pipol bilong yupela gut.

Noken votim autsait man. Taim ol winim yupela asples na kamap lida bilong

yupela ol bai apim ol yet na tokim ol man olsem ol i moa yet winim asples. Ol i ken kontes, kirapim pati, kilim planti pik na yupela kaikai.

I no gat tok long dispela, tasol long vot, noken tromoi vot long ol. Ol i save sapos ol kontes long hailens bai ol i lus, olsem na ol i kam long traim yupela malumalum pipol long nambis.

Sapos yupela i no kisim gutpela tingting long dispela tok tok bilong mi orait bihain sampela yia i kam olgeta ausait lain tasol bai bosim ples bilong yupela. Na yupela kamap haus boi bilong ol.

Tok na mi tok, na save stap long yu man na meri Morobe long skelim. Olgeta

**Gideon Maie
 Lae, MP**

Praim Minista Bill Skate mas risain

Dia Edita,

LONG Wantok Niuspepa bilong wik Fonde Januari 7 1999, mi bin lukim tupela man i no wanbel long Praim Minista Bill Skate long lusim ol kalabus man i go fri.

Long narapela pas wanpela mangi Mendi tu em i tok, Mista Skate i mas risain. Mi sapotim dispela mangi Mendi na mi laikim Bill Skate i mas risain.

Mi laikim narapela praim minista i mas kisim gavman na ronim dispela kantri. Gavman bilong Bill Skate i no pinisim kain ol hevi olsem, Sandline, Mujo Sefa tape, na ol arapela hevi.

Nau em i narapela samting bilong lusim ol kalabus man i go fri olsem Krismas na niu yia present bilong ol pipel.

Mipela ol pipel i no amamas long ol dispela presen. Tasol mi ting olsem, Bill Skate wantaim ol minista bilong em, ol i



• Praim Minista Bill Skate

amamas long krismas na niu yia presen.

Dispela samting nau Bill Skate em i mekim, em i soim olsem em i ronim wan-

pela bisnis bilong em.

Na tu i luk olsem, lo na oda, em i luk olsem i no bikpela samting long dispela kantri. Sapos yu lukluk gut, bai yu lukim olsem, Jastis dipatmen, plis dipatmen na ol arapela dipatmen bilong lo i luk stupid.

Bill Skate i mas risain na Oposien i mas ronim gavman. Dispela samting, lo na oda, i no pilai samting. Mi laikim Bill Skate i mas i go long kot, na kot yet i ken skelim em.

Long tingting bilong mipela ol pipel bilong PNG, i no amamas long dispela pasin nau Bill Skate na gavman bilong em i wokim. Ol minista bilong Bill Skate i save bau daun tasol, taim lida bilong ol, Bill Skate i tok tok. Bill Skate i mas risain na Oposisen mas ronim gavman.

**Paul Pangins
 Wewak, ESP.**

Noken pik poket long Wewak taun

Dia Edita,

MI LUKIM wanpela pasin i no stret tumas olsem na mi laik autim long Wantok Niuspepa na olgeta manmeri bai lukim. Dispela em pasin bilong pik poket long Wewak bik bris. Ol mangi Sepik i save wokim long ol pasindia i laik kalap long sip.

Taim mi tok mangi em mi minim ol bikpela man wantaim olsem papa bilong wan o tupela pikinini.

Wewak i nogat gutpela sekuriti olsem Madang, Goroka o Lae. Olsem na ol man nating i save go miks wantaim ol pasindia long ples bilong kisim sip na pik poket long ol turangu pasindia. Na tu ol sip kampani i wokim gutpela banis waia. Ol bilong stap na kisim mani nating tasol ya.

Pik poket long Wewak bik bris i save kamap olsem: Ol wantok sekuriti bilong sip kampani i save larim ol mangi bilong pik poket go insait long banis na miks wantaim ol pasindia na sindaun wet tasol stap. Taim sip i laik go na liklik dua bilong banis i op na ol pasindia i resis long go hariap long sip, em dispela taim ol stil mangi tu i giaman ron i go paspas long dispela liklik dua na stilim mani bilong ol pasindia.

Ol turangu pasindia i no inap luk-save bikos olgeta tingting bilong ol i stap long go hariap long sip na kisim gutpela spes.

Bihain taim sip i stap pinis long sol wara na liklik kentin bilong sip i op na ol laik baim kaikai em ol luksave

olsem olgeta mani bilong ol i lus pinis.

Wanpela taim mi bin stap wantaim long MV Momase na mi lukaim olsem wanpela pasindia i lusim K2,000 long han bilong ol dispela pipia strit mangi bilong Wewak we ol nogat graun bilong go stap long ples na mekim gaden na kaikai na stap. Sem bilong yupela stret.

Sampela bilong ol em ol papa pinis tasol ol nogat sem na han bilong ol i no hevi long sekim poket na bilum bilong ol manmeri long stilim mani. Ol yanpela bilong Sepik i stap nating long setelmen long Wewak nogat strong long wokim gaden.

Sapos ol laik holim busnaip o tamiok em bai hevi tru long ol. Tasol long pik poket em ol tasol ya.

Mi bilong hailans tasol mi marit long Sepik na planti taim famili wantaim mipela save go kam long Sepik long sip na mi save gut tru pasin bilong ol tambu bilong mi na mi putim aut long pepa. Ol bikman bilong Sepik yupela lukim dispela pas bilong mi plis yupela mas wokim samting long stretim dispela hevi, nogut Wewak bai stap olsem tasol na Madang bai kamap namba 5 siti bihain long Goroka i kamap namba 4 siti.

Em tasol komplem bilong mi long ol tambu bilong mi long pasin nogut bilong ol.

**"Tambu bilong Sepik"
 Goroka
 Isten Hailans**

Kotim ol lida sapos ol i brukim lo

Dia Edita

MI LAIK putim liklik komplain bilong mi long nius em olsem, plani taim mi save stap na lukim olsem taim ol strit mangi o raskol i stil long benk o stoa, man ol i save kisim bikpela taim long kalabus.

Tasol bikpela samting yu mas lukim em ol biksot olsem ol lida long palamen, ol i save paulim bikpela mani bilong kantri na bilong wanim tru-na ol plis save larim ol stap fri? Ol i no save kalabus.

Yumi olgeta man yumi wankain tasol. Yumi mas kisim sem jagmen long wanem samting yumi wokim, maski yu politisen o save man.

Long kain pasin ol bikman long kantri save wokim em nogut.

Planti taim bai yu ritim long nius olsem ol minista o save man paulim mani tasol nogat kot o kalabus bilong ol.

Long dispela as na kantri i bagarap. Mi amamas tasol long yu husat laik sapotim o egensim tingting bilong mi. Tenkyu.

**Presley Vitz-Jailbet
 Pasam, Wewak**

Sapos yu laik salim ol pas bilong yu i kam long dispela nuispepa, Salim i kam long dispela adres:
**THE EDITOR
 WANTOK NEWSPAPER
 PO BOX 1982, BOROKO, NCD.**



Bik Bro REBO



SIPAK MAIKY



IGO MOA NEKS WIK!



**Spot piksa bilong
ol Mt Hagen soka na
eksen poto bilong
Pom Sofbal**





Wiken Spots Dro

PORT MORESBY WOMENS SOFTBALL ASSOCIATION INC.

1998/99 SEASON

Round Two - Date: 06/02/99
 Time Diamond Two Grade
 1030 AB Bears vs All Stars B
 1330 Admiralty vs Malangan B
 1500 Norths vs Mazda A
 Diamond Three
 1200 Royals vs Mazda B
 1330 All Stars vs Wantoks A
 1500 Gazelle vs Royals A
 AB Bears - "A" Grade - Bye
 Chebu - "B" Grade - Bye

LAE FOOTBALL ASSOCIATION (LFA) PRE-SEASON DRAW

(Saturday, 06 February 1999.)

Time	Fixture	P	G
0900	Boraboara vs Mopi	PI	I
0900	B.Kumuls vs Poro	W	I
1015	Poro vs Labu	PII	I
1015	B.Kumuls vs Wastai	W	II
1200	West vs Bara	P1	I
1200	Bara vs Nadzab	W	II
0200	Buresong vs Mitif	W	I
0200	Faze vs Goro	PII	II
0400	Borabora vs Topiok	PI	I
0400	Mopi vs Goro	W	II

Sunday, February 7, 1999.

0900	Poro vs Goro	PII	I
0900	B/Kumuls vs Mitif	W	II
1015	Mopi vs Bara	PI	I
1015	Bara vs Goro	W	II
1200	Buresong vs Wastai	W	I
1200	Faze vs Labu	PII	II
0200	Mopi vs Topiok	PI	I
0200	Nadzab vs Poro	W	II
0400	Buresong vs B/Kumuls	W	I
0400	Poro vs Faze	PII	II

GORDONS TOUCH COMPETITION

Round No: 15
Saturday, February 06, 1999.
C Grade

Time	Fixture
8.00am	Panthers vs Rabbits
8.40am	Warriors vs Steelers
9.20am	Sharks vs LB Heelers
10.00am	T/Dragons vs K/Eels
10.40am	B/Raiders vs GI Storms

B Grade

11.20am	Eagles vs E/Magpies
12.10pm	Steelers vs Warriors
13.00pm	Panthers vs T/Rabbits

A Grade

13.50pm	Eagles vs E/Magpies
15.00 pm	Steelers vs Warriors
16.10pm	Panthers vs Rabbits

Sunday, February 07, 1999

C Grade

8.00am	Tigers vs Bulldogs
8.40am	Eagles vs E/Magpies

B Grade

9.20am	Tigers vs Bulldogs
10.00am	B/Raiders vs GI Storms
11.00am	Sharks vs LB Heelers
11.50am	T/Dragons vs K/Eels

A Grade

12.40pm	B/Raiders vs GI Storms
13.50pm	Sharks vs LB Heelers
15.00pm	L/Tigers vs Bulldogs
16.10 pm	T/Dragons vs K. Eels

PORT MORESBY MENS SOFTBALL ASSOCIATION

Saturday, February 6, 1999.

09.00-10.30	A MSC vs AB Bears
10.30-12.00	A Hawks vs Malangan
12.00-13.30	A Dolphins vs Tigers
13.30-15.00	A F.Manolos vs Gazelle
15.00-16.30	A Alert Elcom vs B/Eagles

Bye NGI

Sunday, February 7, 1999.

09.00-10.30	A Hawks vs B/Eagles
10.30-12.00	A Malangan vs Tigers
12.00-13.30	A Dolphins vs Gazelle
13.30-15.00	A Elcom vs AB Bears
15.00-16.30	A Manolos vs NGI
Bye MSC	
10.00-11.30	B Tarangau vs Admiralty
11.30-13.00	B Hawks vs B/Raiders
13.00-14.30	B Karanas vs Malangan
14.30-16.00	B Gazelle vs B/Eagles
16.00-17.30	B AB Bears vs Tigers
10.00-11.30	C Elcom vs Tis Jets
11.30-13.00	C Manolos vs Dolphins
13.00-14.30	C NGI vs Norths
14.30-16.00	C B/Raiders vs MSC
Bye Samurái	

OKKAINHENS SOCIAL RUGBY LEAGUE COMPETITION

DRAWNS FOR THE SECOND ROUND AS FOLLOW VENUE: HOHOLA OVAL

07/02/99

09.30am	Usu United vs Negifi Bears
10.00am	Gunangi vs Yamaso
B Steven Usu United	
10.30am	Henz vs Krikrompa
B Bobby Negifi Bears	
11.00am	Uriano vs KCR
B Stanley Yamaso	
11.30am	Kaki Bros vs K. Hawks
B Steven Gunangi	
12.00noon	Tapaya vs Kesosa
B Gideon Henz	
12.30pm	Usu United vs Negifi Bears
A Livingstone Ute	
13.00pm	Gunangi vs Yamaso
A Depao Hicks	
13.30pm	Henz vs Krikrompa
A Hicks Livingstone	
14.00pm	Uriano vs KCR
A Ute Depao	
14.30pm	Kaki Bros vs K. Hawks
A Livingstone Hicks	
15.00pm	Tapaya vs Kesosa
A Depao Ute	

FIRST ROUND POINTS LADDER

Aee Grade	
Henz	16
Usu United	16
Uriano	15
Gunangi Falcons	15
Negifi Bears	14
Kesosa	13
Yamaso Raiders	12
Tapaya	10
Krikrompa	10
KCR	7
Kaki Bros	4
Kay Hawks	2
Bee Grade	
Kesosa	14
Negifi Bears	14
Kaki Bros	13
Tapaya	12
Usu United	12
Gunangi Falcons	12
Uriano	12
Henz	12
Yamaso Raiders	10
KCR	8
Kay Hawks	7
Krikrompa	6

PEPSI NCD PUBLIC SERVANTS SOCCER

Saturday, 06 February 1999.

Bisini 1

08.30	M1 Harbours vs Air Niugini
09.50	W1 DAL vs Harbours
10.50	M1 Teachers vs Works
12.10	W1 Transport vs Teachers
13.10	M1 NSO vs PMGH
14.30	W1 Air Niugini vs Diwai
15.30	M1 UPNG vs BPNG

Bisini 2

08.30	M2 Diwai vs ICPNG
09.50	W2 ICPNG vs IRC
10.50	M2 IRC vs Commerce
12.10	W2 BPNG vs PNGBC
13.10	M2 Defence vs A/General
14.30	W2 PMGH vs Fisheries
15.30	M2 Fisheries vs Police
Byes DAL (M1) Transport (M2)	

Sunday 07 February 1999

Bisini 1

08.30	M1 Telikom vs NCDC
09.50	W1 NCDC vs UPNG
10.50	W1 Defence vs Works
12.10	M1 Education vs NBC
13.10	W1 NPF vs Education
14.30	W1 Telikom vs DCA
15.30	M1 DCA vs NPF

Bisini 2

08.30	M2 PNGBC vs Cellnet
09.50	W2 Cellnet vs Police
10.50	W2 Health vs NSO
12.10	M2 NCC vs Health
13.10	W2 Commerce vs POSF
14.30	W2 NCC vs Elcom
15.30	Elcom vs POSF
NBC (W1) A/General (W2)	




MID-WEEK GAMES

Tuesday 9 February 4.45pm	M1 PMGH vs Teachers Bisini 2
Tuesday 9 February 4.45pm	W2 A/General vs IRC Bisini 1
Wednesday 10 February 4.45pm	M2 ICPNG vs POSF Bisini 2
Wednesday 10 February 4.45pm	W1 Teachers vs Works Bisini 1
Thursday 11 February 4.45pm	M2 Health vs IRC Bisini 2
Thursday 11 February 4.45pm	W2 PMGH vs Cellnet Bisini 1



ZENAG - Gutpela kiau

WANTOK SPOT



Sir Ignatius Kilage stedium bai kamap intenesenel soka fil

PAPUA Niugini bai i gat wanpela intanesenel soka stedium taim ol i stretim Sir Ignatius Kilage stedium long Lae.

Minista bilong Spots Andrew Kumbakor i autim dispela toktok bihain long presiden bilong Osenia Futbol Konfederesen Charles Dempsey i askim em long kamapim gut soka fil.

Dempsey i tok wanpela as watpo na ol kantri i no laik kam pilai long Papua Niugini em

bikos kantri i nogat gutpela soka fil.

Tasol Dempsey i tok em i guria stret long lukim ol PNG pilaia i ken pilai gut tru long kain soka fil bilong hia.

Sapos Si Ignatius Kilage stedium i kamap gut, em bai i gat sans long pulim planti ol kantri long Osenia rijen long kam pilai.

Ekskyutiv bilong PNG Spots Komisn John Kambuou bai go sindaun na paitim toktok wan-

taim Morobe Provinsal Gavman na tu Lae Siti Atoriti long stretim Sir Ignatius Kilage stedium.

Gavana Luther Wenge i sapatim tingting bilong minista bilong Spots Andrew Kumbakor long wokim Sir Ignatius Kilage stedium olsem bikpela soka fil bilong kantri.

Em i tok em i sapatim tingting na gavman bilong em bai givim olgeta sapat long minista Kumbakor.

Stori bilong pilaia

Nem: Monica Jonathan.
Spot: atletik
Betde: October 17, 1979.
Marit o Singel: Single.
Niknem: Jam.
Namba wan kaikai: Rais na tin pis
Wanem em gutpla smating yu ken tingim long taim yu stat pilai: : Mi winim bronze medal long Saut Pasifik Gems long Tahiti long resis bilong wimen 4x100 relay, **Wanem spot em yu gupela long em taim yu mangi:** Atletik
Husat pilaia em yu save laikim: Marion Jones bilong Amerika.
Wanem sinia pilaia i save helpim yu gut: Peter Pulu, whusat i save lainim mi long sampela teknik bilong ran.

Wanem ol arapela pilaia husat i save givim gutpela salens long yu long resis: Nogat.
Husat em arapela pilaia yu ting i gutpela long resis. A Wanpela wimen rana bilong Fiji Rachel Rogers.
Taim yu pinis long pilai, bai you mekim wanem long bihain taim? Mi kamap kosa
Wanem disisen em i helpim yu tru long kamap gutpela rana? Mi komitim mi yet long tren na kamap fit.
Wanem ol sampela eria yu ting yu gen stretim yu yet? Gutpela we long ran
Wanem ol samting yu laik mekim long bihain taim: Kamap olsem wanpela top rana long Saut Pasifik

Franco Nebas i raitim



Dempsey laikim Mommers i stap presiden yet


HENRY MORABANG
i raitim

PRESIDEN bilong Osenia Futbol Konfederesen Charles Dempsey i laik Peter Mommers i mas winim bek wok bilong em olsem presiden long karim aut wok em i statim.

Dempsey husat i raun long kantri long dispela wik i mekim dispela toktok taim em i harim olsem i gat bikpela toktok politik long senisim wok presiden bilong PNGFA.

Em i tok i tru em i wok bilong em long toktok long politik bilong soka hia tasol em i ting em i moabeta sem man i mas holim wok na pinisim ol wok em i statim.

Bos bilong OFC i apim tru nem bilong Mommers olsem em i save spesel edvaisa bilong em. Taim em i save painim hevi long ol trabe long ol arapela kantri, em i save ringim Mommers long kisim sampela klia toktok.



• Charles Dempsey.

Dempsey i tokim ol niusman long Pot Mosbi olsem em i no gutpela long mekim senis long eksekutiv klostu klostu.

Mommers yet i tokaut olsem em i laik resis long winim bek sia.

Em i tok olsem taim em i kam long opis, PNGFA i nogat wan-

pela mani stret tasol em wantaim ol eksekutiv bilong em i pait hat long bringim bek soka long laip.

Em i tok nau wantaim ol helpim i kam long FIFA na OFC, PNGFA i ken karim aut ol wok developmen. PNGFA i gat 5-ya developmen plen i stap, tasol em i no wok bikos i nogat mani long mekim ol dispela wok.

Arapela bikpela nius Dempsey i tokaut em OFC bai makim wanpela developmen opisa long wanwan mamba kantri.

Em i tok dispela developmen opisa bai strongim wok bilong junia developmen. Dispela developmen i karamapim ol meri, anda 13, anda 15 na anda 17 na tu refering na administresen.

Dempsey i tok tingting bilong makim developmen opisa i gutpela bikos dispela bai bringim tru soka i kam antap na wankain olsem Nu Silan na Australia.

Bos bilong OFC i tok FIFA bai baim dispela wokman na OFC na PNGFA bai i no inap tromoi stret wanpela mani long en.

Kempen i go strong tru

BIKPELA kempen bilong winim sia bilong presiden na ol arapela eksekutiv posisen bilong Papua Niugini Futbol Asosiesen i kamap strong tru.

Long dispela wik yet, Wantok i painim aut olsem i gat tripela grup i wok long resis long winim wok presiden.

Presiden bilong PNGFA Peter Mommers yet i sanap wanpis. Enga Soka Asosiesen i makim em tasol em i nogat namba tu sapat.

Mommers i laik winim bek sia long lukim wanem wok em i statim i mas pinis, olsem na em i laik resis gen.

Nau yet em i kamapim planti bikpela helpim we PNGFA i no save kisim bipo.

Sampela kain helpim em: kisim mani long Jemani Futbol Asosiesen long sapatim ol tarangu long Aitape (US\$10,000). Na sapos tingim, Jerman Embasi long Pot Mosbi i givim US\$30,000 taim disasta i stat nupela yet.

Mommers tu i kisim sampela helpim tu i kam long UEFA we ol i givim US\$15,000.

Presiden bilong PNGFA i sindaun tu long FIFA wimens komiti. Dispela komiti em i lukautim soka bilong ol meri long wol.

Presiden bilong OFC, Charles Dempsey i save lukluk long em olsem wanpela spesel edvaisa.

Dempsey i laikim tru olsem ol wanwan asosiesen i mas makim Mommers long winim bek sia.

Arapela grup em ol lain hailens blok. Ol hailens blok i makim David Chung olsem presiden. Chung em i sanap long tiket bilong Hailens na Momase tasol nau Momase i no afiliat, Chung bai painim hat liklik long winim vot.

Chung em i presiden na Mt Hagen i makim Simon Koima olsem sinia vais presiden. Na junia vais presiden em Michael Tomun bilong Buka na tresera em Seth Daniel.

Na namba tri grup i wok long winim planti sapat liklik em lain bilong Madiu Andrew. PMSA i makim Madiu olsem kendidet bilong ol long salensim Peter Mommers.

Na sinia vais presiden long dispela grup em Seth Daniels na junia em Michael Tomun.

Dispela grup tu i makim 4-pela biknem opisel olsem hetman bilong wanwan komiti. Grup i makim Kisakiu Posman olsem teknikel opisel long kosing, Paul Pondo - referi, Ellison Lapan - yut na Cathy Davani long kamap loya.

Ellison em wanpela strongpela man husat i go pas long Momase wantaim John Peka long traim rausim Mommers. Tasol nau em i lusim Momase na joinim nupela grup.

I luk olsem Momase grup i bruk bikos nau yet Lahi, Kaiapit, Gaifar na Wau tasol i afiliat long PNGFA. Ol arapela biknem senta husat i pairap long rausim eksekutiv bilong PNGFA olsem Madang, LFA, Wewak na Vanimo i no baim fi bilong ol.

Arapela gutpela stori tu em PSSA i no makim kendidet bilong PNGFA wimens kodineta Mary Albaniel long resis gen long sia bilong em. Na i luk olsem bai i nogat ileksen bilong wimens kodineta.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.